

सिलसिलवार
क्याह क्याह वनु?



म.क.रैना

सूची

व्यलायती गॅर	३
खज़ानु	६
स्वर्ग तु नरुक	१०
जुप्त तु ताक	१४
पास तु फेल	१७
कैटरपिलर	२०
डुडु	२५
सुह शिकार	३०
नबु लालु	३४
तालेह	३८
पॅत्युम बाज़	४६
त्रु-लूर	५०

व्यलायती गॅर

रॉत्य रातस आयि नु मे नैदरुय। न्यसुब रॉच्चुय गोस बु बेयि थोद वेंथिथ तु अनिगटि मंजुय दिच्च मे गरि कुन नज़र। यि गॅर ऑस पंचाह वॅरी प्रॉन्य। अम्युक डाइल ओस मॉलु तमुन्य रंगु तु अनिगटि मंज अथ वख्त वुछुन ओस नु सॅहॅल कथाह कॅह। मगर बु ति ओसुस शदादु। मे ओस गरि हुंद नब्ज ग्वडय थोवमुत रॅटिथ। रटुहॉ ना ? ऑखुर मे ति हय अथ नवि सरु वख्त वुछान वारु कारु त्रे वॅरी गॅयि। मे आसु अनि गटि मंज ति अमिचि सुच्चनु साफ यिवान बोज़नु।

वुनि ऑस रॉच्च हुंज अकॉय बजेमच्चु तु पांछ बजुनस ओस वुनि स्यटाह वख। मगर मे ऑस नैदर रॉवमुच्च। दिल बॅहलॉयी करनु खॉतरु सन्योस बु अथ गरि। यि ऑस म्यॉन्य बुड्य बबन अमृतसरु प्यठ पंचाह वॅरी ब्रॉठ अॅनिमुच्च। गॅर ऑस जान शक्लि। अथ ऑस्य त्रे कवर प्यठ तु अलारम ऑस त्यूत बडि दिवान जि पूर मॅहलु गछिहे हुशार। म्यॉनिस मॉल्य सुंदि वननु मुताॅबिक ऑस यि गॅर ग्वडु प्यठय बराबर रेडियो हिसाबु वख्त दिवान, मजाल छा जि अख मिनट गछिहे पथ या ब्रॉठ!

मगर त्रे वॅरी ब्रॉठ आव अथ गरि रछाह किशु। यि पेयि ताकचु प्यठ वॅसिथ तु गॅयि बंद। कुंजु कॅर्य कॅर्य ति चलेयि नु कॅह। असि ओस मॅहलस मंजुय अख जान गॅडी साज। तॅम्य कॅर अथ अँदरु नेबरु नज़राह, तु कलु गिलुनॉविथ वोनुन, 'यि नबा गछि नु ठीख कॅह। अमिच मिशीन छि बदलय।' मे खॅच्च शान। गछि ति किथु कॅन्य ठीख ? यि ऑस थोडॉयी कांह ज़चि गॅर। यि ऑस असली व्यलायतुच गॅर तु यि कथ ऑस असि बुड्य बबन कसम ख्यथ वॅन्यमुच्च।

गॅडी साज़न योदवय गॅर ठीख हेच नु कॅरिथ मगर ओस ज़ानन वोल। तॅम्य द्युत मे बराबर नेब जि अथ कुस हेकि ठीख कॅरिथ। मे ज़ोन गॅनीमथ। मे तुल पनुन यार राजु सुत्य तु वोतुस दोरान दोरान गुरगॅर्य मॅहल। अति कोडुम तस गॅडी साजु सुंद पय। अॅमिस कॉसिब गॅडी साज़स ओस नाव व्वस्तु रज़ाक। अॅमिस ओस नु दुकानाह वुकानाह कॅह। यि ओस गरस मंज बिहथुय गरि शेरान। कॉसिब ओस ना ? अॅस्य येलि अॅम्यसुंद गरु वॉत्य तु अॅम्यसुंदिस कुठिस मंज चायि, असि गॅयि अँछ बाह बाह त्रख। अति आसु ताकचुन प्यठ हतु बजु गरि सजॉविथ। अजि रूसी, अजि जापॉन्य तु अजि जरमॅन्य। यि कोर मे आँकुवॅनी अंदाज़। अख ज़ु बासेयम हिंदोस्तॉन्य ति। कॅह आसु चलान तु कॅह बिहिथ। असि कॅर व्वस्तस सलामाह। तॅम्य कॅर असि कुन अँडुय नज़र तु त्रोवुन कलु बेयि ब्वन कुन। दर अस्ल ओस सु अख गॅर शेरनस सुत्य आवुर। गरि वोल ति ओसुस ब्रॉह कनि बिहिथ। मे दोप, यि गव जान। व्वस्तु छु पॅज्य पॉठ्य व्वस्तु। पनुनि कामि सुत्य कॉम, न सवालुय तु न जवाबुय। गंटु खंड गॅछिथ तुल व्वस्तन कलु थोद। खॅरीदार गव ख्वश जि कॉम अंदेयि। मगर व्वस्तन वोनुस, 'अमु लाल, त्रे हज़ पेयी पगाह बेयि युन, तिक्याजि अथ रॉव राथ अख सुच्चन तु स्व पेयि अथु सुत्य नॅव गरुन्य।' खॅरीदारस फीर बुथिस ज़रदी। मे कुन बुथ कॅरिथ वोनुन, 'वन हज़ क्या करव ? यि गॅर ऑस म्यॉन्य मॉल्य वर्लड वारु वख्तु कांगो प्यठ अॅनिमुच्च। छे यि असली अप्रीकॅन्य माल मगर सुच्चन कति अनस ? व्वन्य हरगाह व्वस्तु रज़ाक अथ अथु सुत्य सुच्चन बनावि, ति लग्या जान ? कुजा अप्रीकॅन्य गॅर तु कुजा अथु सुच्चन ?' खॅरीदारन हेच्च व्वस्तस गॅर वापस। बुथिस खार्यन द्रुह तु द्राव।

व्वस्तु रजाक आसिहे वाँसि योहय पंचाह दुवंजाह ह्यु। मे कुन कॅरुन दोलु नजराह तु वोनुन, 'वन तु व्वन्य क्या बनि यथ वख्तस। कति अनु बु अँमिस अम्रीकॅन्य सुन्नन तु स्वय लागस ? ग्वडु छुना लूकन प्राह गोमुत। कबॉडिस ति हरगाह फुटमुन्न गॅर ह्यन मॅल्य, दपान छि यि आँस मे फलॉन्य आँशुनावन व्यलायतु प्यठु या अरबु प्यठु अँन्यमुन्न। हता यारु, येति छना अस्ल अस्ल गरि मेलान! बा ख्वदा हज़, राथुय वाँन्न मंज़ूर अहमुदस नॅव गॅर। यि छनस मामन करॉची प्यठु सूज़मुन्न। हता यारु क्याह वनय ? गॅर छा किनु क्याह ? टिक टिक छुस तिथु पाँठ्य गछान ज़न छि कुकिल बूल्य करान। प्यठु वनय अख सिरु कथ। मे वोनुनय मंज़ूर अहमुदुन्य मामन ज़ि करॉची हुंज़ुनय गर्यन छि अम्रीकाह वाँल्य पनुन नाव लेखान तु कुनान। हयो मंज़ूरा...' व्वस्तन लोय मंज़ूरस नाद, मगर सु आव नु कॅह। व्वस्तन वोन मे ल्वति पाँठ्य, 'सु आसी यारन निश गोमुत नॅव गॅर हावुनि।' मे कोर कलु सूत्य तसुंजि प्रथ कथि आंकार। मे आँस ना पनुन्य गॅर शेरुनावुन्य! बु ओसुस दिलु मँजी सॉचान ज़ि खबर कुस बद-रद वनि यि म्यानि गरि। बु गोस त्रन तु त्रुवहन। बु ओसुस यी सॉचान ज़ि मे गॅयि व्वस्तु संज़ कथ कनन, 'व्वलु साँ अन, च्ने क्या छुय ?'

मे कॅड खूच्च्य खूच्च्य फ्यरनु तलु गॅर न्यबर तु थॅवुमस ब्रॉठ कनि। वाँलिंजि थॅवुम थफ कॅरिथ। व्वस्तु रजाकन तुज यि अथस क्यथ तु वोनुन, 'वुछ तु हज़, यि गॅयि असली व्यलायतुच गॅर। अथ कुस वनि न ? बा-ख्वदा छुख कुस्मथ वोल। अज़ कल कति मेली युथ माल।' बु गोस व्वस्तु संज़ कथ बूज़िथ ख्वश। बुथिस आम नोव रंग। मे वोनुमस, 'यि हज़ पेयि ताकचु प्यठु वॅसिथ तु गॅयि बंद।' व्वस्तन थॅव गॅर पथर। बुथ गोस व्वजुल नार ह्यु। सु वोथ ज़न तु मे मार दिनि। दोपुन, 'यिथिस मालस छा अडु कायिर्यगी करान ? युथ चीज़ गछि तगुन रॅछरुन, नतु गॅयि क्वलि मंज़ दिन्य दॅरिथ।'

व्वस्तु रजाकन थॅव म्याँन्य गॅर अँकिथ कुन तु वोनुन, 'चु कति छुहॅम रोज़ान।' मे वोनुस, 'बु हज़ रोज़ान बाल गार्डन।' 'अदु गछतु करतु पनुन्य कॉम। कॉल्यक्यथ यितु वारु कारु, गॅर आसी तयार।' मे दोपुस, 'अथ कॅन्न हज़ पाँसु लगन ?' व्वस्तन वुछ नु मे कुन कॅह। सु ओस ब्याख गॅर अथस मंज़ रॅटिथ खोलान। दोपुन, 'पाँछ वपयि गछन सूत्य अनुनि।' बु द्रास गरु कुन वापस मगर दिलस रूदुम फ्रठ। 'युथ नु यि अमि गरि मंज़ु व्यलायॅती सामानु कडि तु दीसी सामानु नियस लॉगिथ ?' मगर करु हाँ क्याह ? नारस दिमुहॅवु नरि। अमि दूह आयि नु मे रातस नॅदरुय।

त्रेयिमि दूह वोतुस बु दुपहरन ह्यु व्वस्तु रजाकस निश। सु ओस बतु ख्यवान। दोपुन, 'हतु साँ गोबराह, मुबारख छुय। चॉन्य गॅर गॅयि ठीख, मगर च्ने पेयी स्व आथवारि ताम येती थवुन्य। चु कति यिख गरि गरि योर ? बु थवय तथ बराबर टेस कॅरिथ।' मे गव दिलस तसलाह। पानस कॅरिम ताँरीफ ज़ि बु कोताह गाटुल द्रास यिथिस व्वस्तस निश यिथ। सूती सूचुम, शायद आसुनस सुन्ननु ति मूजूदय, नतु वनिहे ना यि ? मे दिन्न ओरु योर नज़र। पनुन्य गॅर गॅयम नु कुनि नज़रि। बुथिस फ्यूरुम बेयि मोतुन मगर पानस द्युतुम तसलाह। दोपुम, टेस आसि ना यि बेयिस कुठिस मंज़ करान!'

आथवारि दूह वोतुस बु सुली व्वस्तु रजाकुन गरु। अँमिस ओस अख ल्वकुट लॅडकु सूत्य बिहिथ। तस आँस जान नपु नपु करवुन्य मछि गॅर लॉगिथ। मे तोर फिकरी ज़ि योहय गछि मंज़ूर अहमुद आसुन तु यि आसि अँमिस करॉची हुंज़ुय गॅर लॉगिथ। मंज़ूर अहमुदस आसु अथस मंज़ सरतलुवि बुरबतनि जोराह यिमन सु मश्कि प्यठ नचुनावान ओस।

व्वस्तु रज़ाकन कॅड म्यॉन्य गॅर अकि जोलनु मंज़ु तु थॅवन मे ब्रॉह कनि। दोपुन वुछ तु क्याह छि चॉन्य गॅर गुर्य सुंघ पॉठ्य रॅथ्य पकान। मे वॅर गरि नज़राह। अथ ओस डाइल तमुन्य लद। म्यानि गरि ओस सफेद डाइल। मे वोनस, 'त्रे हज़ छय क्याहताम गलती। यि छनु म्यॉन्य गॅर। तथ ओस सफेद डाइल।' व्वस्तन त्रोव व्वश। दोपुन, 'अहनू यारु, पज़र ह्य छु। यि मंज़ूर साँब छुना मे खानु मोल। यि छुय मे दोयिमि ज़नानि दशि गँड्य गँड्य ज़ामुत। अँमी क्या साँ तुल राथ चानि गरि हुंद डाइल तु नियन तथ टिकु वावुज बनॉविथ। वन तु क्याह वनस? तोति कोर ख्वदा साँबन रुत ज़ि अमी साइज़ुक द्राव अँकिस प्राणि गरि डाइल तु लोगुमस। नतु गॅयेयि गॅर ख्वद ज़द।' मे तुज, यि दॅप्यिज़ ति, वदान वदान गॅर अथस क्यथ। डाइल ओस कृहुन स्याख ह्यु ति तु आवस्योमुत ति। व्वस्तन त्रॉव मे डाइलु म्वखु अख र्वपय तु च़ोर र्वपयि हेच़नम। युथुय मे सलाम कॅरिथ वापस नेरुन ह्योत, व्वस्तन कोर मे आलव। दोपुन यि निसाँ गोबुरा पनुन अमानथ सुत्य। मे आव नु कॅह समुज। 'कुस अमानथ?' मे जवाब दिनु ब्रॉटुय तुज व्वस्तन कुनी चपाथ तु त्रॉवुन मंज़ूरस। तँम्य लोग वदुन। व्वस्तन दोपुस, 'यि छा गिंदन तमाशु? शिकस लदु, मोल लवी युतुय।' अमि पतु नियन तस अथु मंज़ु तिमु सरतलुवि बुरबतनि ज़ु तु पिलुनाव्यन मे कुन। दोपुनम, 'वुछू बबा, ख्वदा गवाह। बु छुसय नु काँसि हुंद चीज़ रटान। मे येलि गॅर तानु तानु करनु पतु जोडुन्य हेच़, यिमु ज़ु गिरारि तोरुम नु कॅह फिकरी ज़ि यिमु कत्यथ आसु अथ लॉगिथ? लेहज़ा, यि छु चोन अमानथ तु नितु सुत्य। हरगाह कुनि सातु गॅर बंद गछी, मे निशि अँन्यज़ि वापस, मगर यिमु गिरारि ति अँनिज़्यस सुत्य। खबर छा, तमि वख्तु मा यियि समुज कॅह। मगर अख कथ वनय, गॅर छय पँज्य पॉठ्य व्यलायँती। तान कॅडिथ ति छय यि बराबर पकान। यि कति बनी अज़?'

बु द्रास दिल मोलूल गॅछिथ। गिरारि ज़ु थव्यम च़ूरि युथ नु गरि कांह वुछि। मगर व्वस्तु रज़ाकुन अथु! त्रे वॅरी गॅछिथ ति आँस गॅर बे-वाय पॉठ्य चलान तु बराबर वख्त दिवान।

अकि लटि दिच़ मे बेयि गरि कुन नज़र। सुबहुचि त्रे आसु बजेमच़ु। मे ओस पांज़ि बजि नैदरि व्वथुन। मे वॅर बेयि शंगनुच कूशिश तु वुछान वुछान पेयम नैदर।



खज़ानु

अकि लटि आव मे बैयि तस फँकीरु सुंद बुथ अँछन तल। खोफनाख शक्ल, थोद कद, बजि बजि अँछ, कनन कनु वॉल्य, कलस सफेद दसतार, हँटिस स्वरफु चालि गुलोबंद तु अथस मंज कृहन्य तस्बीह। फँकीर ओसा पँज्य पॉठ्य फँकीरुय किनु सांगल, मे आव नु कँह समुज। मे गँयि सॉरिसुय पानस ज़न दुनन। तसुंज गोब तु खोफनाख आवाज़ गँयि मे बैयि अकि लटि कनन, 'वख छुय नु ज़्यादु कँह। यि मे वोनुय, ति कर। बस दून दूहन अंदर गछ्ख खज़ानु हॉसिल करुन। बाकय छय त्रे सॉरुय खबर।'

मे दिन्न ओरु योर नज़र। न ओस बुथि कांह तु न पतु। यि ऑस सिरिफ तस फँकीरु सुंज छाय, खसु मे पँतिम्यव चोरव दूहव प्यठ पानस ब्रॉह कनि ऑस बासान। मे कोर दिल दोर। तसुंजि कथि हेचुम वारु साम। ऑखुर बु क्याज़ि छुस यूत बांबुर्योमुत? तँम्य बिचारन क्याह वोन? तँम्य यि वोन, ति वोनुन सिरिफ मे मदथ करनु बापथ। मे ह्यँन्न तसुंजि कथि वारु साम। चोर दूह गँयि, येलि सु मे आवरेनि नेबरु कनि समुख तु वोनुनम, 'ज़िंदगी छय स्यठाह जीठ मगर कार छुय सोरुय पथर। क्याह क्याह करख तु कोत कोत वातख? हरगाह मानख, अख खॉर गछ्थ कँरिथ। शन दूहन अंदर अंदर छुय संगरमालु फवलनु वख्तु पखलन बालु थँगिस प्यठ वातुन। अति छुय सारिवुय खोतु बँडिस बुरज़ु कुलिस तलु कनि अख खज़ानु दफन। खज़ानस प्यठ कनि छु अख शाहमार बिहिथ मगर त्रु वुछिथुय चलि सु। बस त्रे छुय खज़ानस नख द्युन तु मे निशि वातुनावुन। न्यसुब म्योन तु न्यसुब चोन। बु छुसय हुथ क्वलि अपारि कनि रोज़ान। मगर कुनुय ज़ोन गँछिज्यनु कँह। कॉम छे स्यठाह मुश्किल। ब्याख नफर तुलिज्यनु सूत्य। खज़ानु छु स्यठाह बोड। त्रे पेयी नु कांह फख़। सथ पीरि ख्यनय आरामु सान, पतु छय पनुन्य मरज़ी। मगर अख कथ थव याद। हरगाह शन दूहन अंदर अंदर कॉम सपदि तु जान, नतु करन बु बदल असॉम्य तयार।'

खज़ानुक नाव बूज़िथ गोस बु ख्वश मगर खतरु बास्योम स्यठाह। मे ऑस करज़ु बलायाह अख कलस। बासान ओसुम वुमुर सोर्यम यि करज़ु नखु वालान। बु कर करु खांदर तु कर बसावु पनुन गरु? खदवय फँकीरु सुंद बुथ अँछन ब्रॉह कनि यिथुय ओस मे हेरिम शाह ह्योर तु बँनिम शाह ब्वन गछ्छान, मगर खज़ानु याद कँरिथुय ओस मे म्वर्दु अँछन ज़न गाश यिवान। मे कोर फॉसलु जि अज़ राथ क्युतुय नेरु बु खज़ानु हॉसिल करनु बापथ।

मँज़िलु ओस स्यठाह बोड। मे तुजि च्वचि देह मरु लॉचि गंड कँरिथ सूत्य तु गाश फवलवुनुय द्रास। ब्याख नफर सूत्य तुलनुक ओस नु सवालुय। हरगाह मुसीबथुय तुलुन छु, तु कुनुय ज़ोन क्याज़ि नु? मे क्या ह्यमथ छे ना? ब्याख कथ छुम हरफस गवाह तु मँडिस शँरीक बनावुन?

बु गोस पकान। बाल, जंगल, क्वलु, खाह पथ कुन त्रावान वोतुस बु दुपहरस बाँग्य कॉली मातायि हुंदिस मंदरस निशि। अति वुछुम स्यठाह बीरु। मे दोप लूख आसन आरती करनि आमत्य। ब्रॉट कुन वोतुस तु आरती वारती गँयम नु कुनि नज़रि। लूख ऑस्य लॉन कँरिथ अख अँकिस दकु दिवान तु ब्रॉट पकान। अख नवजवान ओस लॉनि स्योद करान तु काँसि काँसि लॉनि मंज बराबर न रोज़नस प्यठ टास ति लायान। मे प्रुछ तस नवजवानस, 'हे येति क्या दँलील?' तँम्य वोनुम असुनाह त्रॉविथ, 'बासान छु, नोवुय नोवुय छुख योर आमुत। त्रे छय ना किहिन्य खबर?' मे कँर कलस ज़ीर तु तँम्य वोन, 'स्वरगु प्यठ छु दर्मराज़न पनुन दुथ सूजमुत तु सु छु स्वरगु

लूकचि टिकट बॉगरान। यस यस मरनु पतु स्वरगस गछनुक शोख आसि, सु हेकि येती पनुन्य टिकठ ह्यथ।' टिकठ ऑस हथ र्वपयि, मगर मे आसु चंदस वुहय। मे कति ऑस खबर जि स्वरगुचि टिकट मेलन ज़मीनि प्यठय ? मे दोप जान गव मे बूज दरवेशु संज कथ तु यपॉर्य द्रास। यि कॉम ति थवव यपॉरी वॅरिथ। अद पाँसु जन छिनु बराबर चंदस, व्वजमिस पन्न ना ? अँस्य क्या चलवु कुन। बेयि पगहकि प्यठ यिमव अँस्य ति वारु कारु बड्यन मोहनियन मंज गँजरावन। खजानु आसि ना गरु वोटमुत !

मे बोज़नोव नव जवान बडु आरु हति बुथि पनुनि चंदुच दॅलील। तँम्य द्युतुम दिलासु। दोपुन अदु कॅह परवाय छुनु, बु करय सुफॉरिश। तसंदिस दिलासस प्यठ रुदुस बु लॉनि। बुथिस खोतुम त्युथ रंग जन तु मे वरॉय कुहन्य गछिहे नु जनतस। युथ नु नव जवान पौतुस कॅह दगा गछि वॅरिथ, मे लॉज तस सुत्य यारज। तस निशि नन्यव मे जि टिकट कुनुनुक कम्प रोजि पांचन दूहन जॉरी। यि नवजवान ओस कमि ताम बेयि शहरुक तु यि ओस दर्म राजुन्य दूतन पानस सुती ओनमुत। नव जवानस सुत्य कथु करनस लोग मे स्यठाह मजु मगर यि मजु रुद नु जादु कालस बरकरार। युथुय तँम्य मे पुछ जि टिकठ ह्यथ कोत छुय गछुन, मे फॅट्य ऑरख। जंगन चायम थरु थरु। दोपुम हय हे ! अँमिस गोछ नु शख आसुन गोमुत। नतु क्वसु चेट्य अँमिस जि मे कोत छु गछुन। मे द्युत नु तस जवाबाह कॅह, मगर तँम्य पृछुम बेयि, 'क्या साँ, कमन ग्वतुन गोख ? वनानुय छुख नु कॅह। अँस्य क्या सुत्य यिमोयि ?' मे दोपुस, 'हा न साँ तिछ कथ छनु। दफ बु ओसुस साँचान जि टिकटि हुंघ बाकुय पाँसु कति अनु ?' अमि पतु वॅर नव जवानन छ्वपय तु मे ति ह्योत तस निशि वारु वारु लोब।

बु रुदुस लॉनि मंज ब्रॉह पकान। बुथि ओस अख स्टेज बॅनिथ, यथ प्यठ अख बुजर्ग बिहिथ ओस। तस सुती ओस ब्याख अख नवजवान बिहिथ, युस लूकन निशि पाँसु ओस रटान। बुजर्ग ओस पानय टिकट बॉगरान। म्यॉन्य वॉर्य वॉन्न तु मे त्रावि वुह र्वपयि नवजवानस ब्रॉठु कनि। तँम्य वॅर मे दोलु नजर। मे दोपुस, 'बाया, अज छुय मे युतुय चंदस। हरगाह पन्नख, पगाह दिमय बाकय। अख्तुय दिमय पाँछ अलाव।' मगर नवजवानस गव नु असर कॅह। तँम्य कोर साफ इनकार। बुजर्ग ओस नु ऑसु सुत्य कांह कथ करान। सिरिफ ओस इशारु हावान। तँम्य कोर नवजवानस पाँसु रटनस मनाह। मगर बु कथ मानुहँस ? मे लोगुस रडु। मे पथ यिम लॉनि अँस्य तिमव लोग शोर। बु ओसुस नु कुनि सूरतस मंज टिकटि वरॉय नेरुनस तयार। म्वखसर चायि लॉनि मंजुक्य जु त्रे नफर मंजु तु कोरुख फॉसलु। वुह र्वपयि दिथ ह्यकु बु सिरिफ टिकटि हुंज बुकिंग वॅरिथ, तु टिकठ मेलि तेलि येलि बु बाकुय शीथ र्वपयि दिम। मे ज़ोन गॅनीमथ। अज करव बुकिंग, पगाह येलि बु खजानु वापस ह्यथ यिम, तेलि दिमोख बाकुय र्वपयि तु ह्यमोख टिकठ। दर्मराजुन्य दूतन मॉन्य यि कथ। कलु सुत्य कोरुन आंकार। मे पिलुनोवुन टिकटि बदलु अख काकुद यथ प्यठ वुहन हुंद रँसीद तु टिकटि हुंज बुकिंग दर्ज ऑस वॅरिथ। मे थोव काकुद चंदस मंज तु द्रास।

वति पकान पकान आव मे खयाल। मे दोप यिनु यिम मे पगाह फंद करन तु टिकठ दिनस करनम इनकार ! या अँस्यतन यिम म्यानि वापस फेरनु विजि डूंग बडॉविथ चॅल्यमुत्य ! मे चायि फिकिर। हरगाह गरु फेरु वापस बाकुय र्वपयि अननु बापथ, यपॉर्य गछ्यम खजानस प्यठ वातुनस चेर। मे द्युत पानस दिलासु, 'करन क्याह ? लूठ छा ? बुकिंग छना वॅरमुन्न ? फंद फिरेबी करन तु अदालथ वान छा दँद्यमुत्य ? अकि अकि ह्यमख हिसाब।'

पखलन बालस निश वोतुस बु सिरिं लूसिथ। अनि गटि मंज पहाडस खसुन ओस खतरनाख। मगर रोज़ कति रातस ? अथ जायि ओस जंगली जानवरन हुंद खतर ति स्यठाह। मे पेयि अँकिस यारि कुलिस कुन नज़र। कुल ओस बोड तु अँकिस लंजि प्यठ ऑसुस बेहनस ति जान जाय। मे दोप रातस गव अँती गुज़ारु करुन। बु खोतुस पँज्य सुंद पॉठ्य कुलिस। लंजि प्यठ बनॉवुम बेहनस किच्च जाय। च्वचि दँज मुच्चरॉवुम तु बँरुम यड। अमि पतु त्रॉवुम कुलिस प्यठुय नँदर।

सुबहुचि चोर आसुहन बजेमच्चु येलि बु हुशार गोस। वुनि ओस न्युक न्युक गाश ति यिनय। मे ज़ोन नु वख्त ज़ायि करुन मुनॉसिब। बु वोथुस कुलि प्यठ ब्वन। लोरि हना अख तुजिम अथस क्यथ तु ह्योतुम पहाडस खसुन। योदवय अनि गटि मंज साफ साफ ओस नु यिवान बोज़नु, मगर बु ओसुस आँकुवँनी वथ छांडान तु ड्वचुर ड्वचुर दिवान। बुथि ऑस्य कँड्य दार जंड। खवरन तु जंगन वोथ कँड्यव सुत्य मुसलु, मगर मे हॉर नु ह्यमथ कँह। बु रुदुस पादुर्य सुंह सुंद पॉठ्य ह्योर कुन लमान। खज़ानुक चेशकु ओसुय दिलस, सुती दिच्च स्वरगुचि बुकिंगि ति स्यठाह ह्यमथ। दून च्वन जायन गोस बु डुलु ति, मगर मे कोर दर्यर। मे ओस नज़रि तल सिरिफ पखलन बालु थोंग तु खज़ानु। वातान वातान वोतुस बु वारु कारु बालु थँगिस प्यठ मगर पान ओसुम अडु मोर गोमुत। वुनि आसु संगरमालु फवलुनय। मे त्रोव अँकिस पॉतरि कनि प्यठ डाफ।

म्यानि हिसाबु आसिहे मे ओड गंटाह गोमुत डाफ त्रॉव्यमृतिस जि मे गँयि कनन क्रख। ज़न ओस सुह कति ताम ग्रज़ान। मे गँयि वॉलिंज न्यबर नीरिथ। योत ताम वाचोस वारु कारु, व्वन्य गोछुम नु पोतुस सुह ख्योन! मे दिच्च ओरु योर नज़र। कुलाह कोटाह ओस नु कांह। दूरि अँकिस जायि गव मे होखमुत बुरज़ु कुल अख नज़रि। मे त्रॉव दव तु खोतुस अँथ्य कुलिस प्यठ। सुह गोम नु कुनि नज़रि। खबर यि मा आसिहे मे वँहमु! रछाह गँछिथ वोथुस बु कुलि प्यठ ब्वन। संगर मालु आसु तयार फवलुनस। मे लोग बोड बुरज़ु कुल छांडुन। दूर दूर ताम गोम नु कांह कुल नज़रि। मे दिच्च वारु व्वन्य तँथ्य कुलिस नज़र, यथ बु सुह सुंदि खोफु खोतमुत ओसुस। अति न ओस शाहमार तु न बास्योम खज़ानु। सूंचुम, खबर शाहमार मा आसि मे वुछान वुछानुय च़ोलमुत। खज़ानु हय आसि तु येथ्य कुलिस तल गछि आसुन।

मे ह्योत पॉतरि टुकरव सुत्य ज़मीनि खनुन। अथन खँतिम हठ। यीतिस कालस फोल पूर गाश तु सिरिं ह्योतुन नोन नेरुन। फुटु जोराह खँनिथ ति आव नु मे कुनि खज़ानु बोज़नु मगर मे हॉर नु ह्यमथ। सूंचुम कँह वख्त तकलीफ तुलिथ छि वुमरि ऑश करुन्य। बु रुदुस खनान। द्यव पतु त्रे तु त्रेयव पतु च़ोर फुट। मगर खज़ानु नदारद।

व्वन्य लँज मे त्रेश। बु दोर्योस पोन्थ छांडनि हुपॉर्य तु यपॉर्य मगर पोन्थ गोम नु कुनि नज़रि। अँकिस जायि वुछिम सासु बँद्य केम्य क़ूल अँकिस कँड्य जंडस तल बिहिथ। जंडस तलु कनिच ज़मीन ऑस अँदर। मे ओन अख पनु वँथर तु यि लोगुम अथ जायि मेच्चि मंज तिथु पॉठ्य जि अथ रुज़ तोंथ ब्वन कुन अलूंद। वारु वारु हेतिन अमि पनु वँथरु प्यठ पां फेर्य पशुपुन्य। मे थोव ब्याख अख पनु वँथरु कच्चुल ह्यु बनॉविथ अथ तलु कनि, युथ ज़न पोन्थ अथ मंज जमाह गछि। यि ओस बडु ज्यूठ कार। पां कच्चुलस लघुहँन यिथु पॉठ्य गंटु वादु बँरिथ यिनस। मगर अमि सुत्य रुज़ मे व्वमेद बरकरार।

पनु वँथरुकिंस कच्चुलस मंज येलि पां फेर्य दँह वुह जमाह गँयि, मे त्रॉव्य तिम ज़ेवि प्यठ। सॉरिसुय पानस पेयम शेहलथ। कच्चुल थोवुम बेयि जायि प्यठ लॉगिथ। सिरिं ओस व्वन्य स्यठाह

ह्योर वोतमुत। मे तुज दोर युथ ज़न खज़ानु वदि कडनु बापथ बेयि फुट जु फुट खँनिथ ह्यकु। युथुय बु खज़ानु ख्वडस निश वोतुस, मे चँज ख्वरव तलु मेच नीरिथ। ख्वडस मंज ओस बोड कृहुन शाहमार ऑर वँरिथ बिहिथ। मे वँर ह्यमथ। पँकीरु संज कथ हेचुन पँज नेरुन्य। शाहमार आव अथि, वारु कारु मेलि खज़ानु ति। पँकीरन ओस वोनमुत जि मे कुन वुछिथुय चलि शाहमार। सु चोल नु कँह। मे सूच खबर अँमिस मा पेयि नु वारु मे प्यठ नज़र। मे कोर तस हिश...श..श... तु दिचुमस ख्वरु सुत्य ज़ीर। शाहमारन दिचु कुनी ग्राय पानस तु याशाह वँरिथ दिचुन मे ख्वरस दवफ। बु प्योस अँती पथर। अँछन गोम अनि गोट तु अँछ लजम बुरज़ कुलिस कुन दरस। शायद गोस बु मँरिथ।



स्वर्ग तु नरुक

म्याँनिस अमानथ दिनस सुती गॅयि हट्ट कट्ट जवान जोराह मे ब्रॉह कनि पॉदु। यिम आसुहॅन नवि ज़मानुक्य यमदुथ। बुथ ओसुख प्रोन तु ह्यंग ति ऑसिख नु कॅह। अँकिस ओस क्लीन शेव तु बेय ओस फ्रॅच कट थोवमुत।

बु ओसुस वुनि युहुंद कद तु बाडवय सरु करान जि यिमव कॅर मे नर्यन दून थफ तु तुलुहॅस थोद। अमि पतु तुल यिमव आकाशस कुन कदम। बु गोस हॉरान तु परेशान। मे ओस नु ज़ांह ज़ॅमीनि प्यठ स्योद पकुन तगान मगर यिमन सुत्य सुत्य ह्योतुनस बु ति हवुहस मंज़ वुडव कॅरिथ पकुन। योदवय म्यानि नरि ज़ंगु आसु नु हिलान कॅह, मगर बु ओसुस रज़ि रोस्तुय ज़न हवॉयी फोजुकिस जंगी जहाज़ुक्य पॉठ्य पकान। मे ज़ोन जि मे छु ज़िंदुगी निशि अथु छोलमुत, मगर दिलुक तमाह, सु ओसुम ज़न वुनि ति कलु कॅडिथ। मे दिन्न ब्वन कुन वारु नज़र। शाहमार ओस ख्वडस मंज़ वुनि ति ऑर कॅरिथ बिहिथ। शायद ओस तस वुनि ति यि फ्रठ जि बु मा यिमु वापस तु खज़ानस करु कबज़।

दुनियिहा अख कॅडिथ वॉत्य अँस्य कथ ताम जायि। मगर मॉफी दिज़्योम! येति कति ओस दुनियाह? सु ओस ना मे मॅरिथ पथ कुन त्रोवमुत। आ, दॅपिव असमाना अख कॅडिथ वातुनोवुहस बु यम दूतव अँकिस जायि। क्लीन शेव यम दूतन कोड पतलोनु चंदु मंज़ अख चीज़ तु रोदुन ऑसस ब्रॉठ कनि। यि चीज़ ओस त्युथुय युथ सॉनिस दुनियिहस मंज़ टेलेफोन आसान ओस। रंग डंग ओसुस जान। शायद आसिहे यि ति टेलेफोनुय, मगर तार ऑसुस नु कॅह। असि ओस बूजमुत जि व्यलायतस मंज़ छि तारि वरॉयी टेलेफोन आसान। शायद मा आसिहे अँम्य जवानन ति तती प्यठ अनुनोवमुत। खॉर मे क्या अथ सनुन? मे ओस ज़ॅमीनि प्यठ पनुनिस गरस मंज़ फोन लागनुक अरमानुय रूदमुत। म्याँन्य मॉल्य ओस टेलेफोन महकमस मंज़ दॅह वॅरी ब्रॉठ पांछ हथ र्वपयि बॅरिथ फोन बुक कोरमुत। मगर सु कति फोन? येति बु अफसरन पृछनि गोस, दोपुहम, 'हता यारु च्चु मा छुख पागल गोमुत! येति छि वुह वॅरी ब्रूटिम 'ओन योवर टेलेफोन' वॉल्य ज़ु ज़ु सास बॅरिथ ति यपारी। च्चु कथ छांडान पांचन हतन प्यठ फोन?' मे फोर्यव नु जवाबुय। व्वन्य करेयि फॅकीरन मे यॉरी तु मे सॉंचोव जि बु ह्यमु ततकाल सकीमि मंज़ुय व्वन्य द्रोगि म्वलु फोन, मगर ज़िंदुगी द्युत नु साथ कॅह। हरगाह मे क्वदरथ खज़ानु लॅबिथ निनुक वख दियिहे, द्यव बु ति पनुनि दारि प्यठ बिहिथ तु फोन अथस मंज़ रॅटिथ मखन लालस आलव लायिहॉ, युथ तस हेरिम शाह ह्योर तु बॅनिम शाह ब्वन गछिहे! मगर सु कति। च्चकि बु शिकस लद। वनु कस?

मे त्रोव ज़्यूठ व्वश तु त्रॉवुम बेयि यम दूतु सुंदिस तारि रोस्तुय फोनस कुन नज़र। सु ओस कस ताम सुत्य कथ करान। मंज़ु मंज़ु मे कुन नज़राह त्रॉविथ कलु हिलावान तु मंज़ु असन खंगालु त्रावान। ब्याख यम दुथ ओस वुनि ति मे अथस थफ कॅरिथ।

कॅह काल गॅछिथुय त्रोव यम दूतन फोन चंदस तु पृछुन मे नाव। मे वोनस, 'बाया, ज़ॅमीनि प्यठ अँस्य मे लूख लोलु सान वनान 'साहबु'। नतु हरगाह पज़र बोज़ख, असली नाव ओसुम कृष्णदास। कृष्ण सुंद दास कम तु पनुन ज़्यादु।' क्लीन शेव यम दूतन कॅर मे बुथिस कुन नज़राह। वापस द्युतुन नु जवाबाह कांह। अँस्य रूद्य पकान, या वॅन्यतव वुडान। बुथि ओस सख

ओबर। मे पेयि बदनस टँडी। मे हेच्योयि यम दूतन सुत्य बेयि कथ करुन्य मगर तिम ऑस्य दूनवय मनहूस बलायि। म्यानि कथि द्युत नु तिमव कन केह। मे पेयि रुसवा गँछिथ छ्वपय करुन्य।

ओबर मंजु येलि अँस्य न्यबर द्रायि, मे वुछ बुथि अख बोड देवार। देवारस ऑस्य ज़ु दरवाज़। अँकिस प्यठ कनि ओस लीखिथ स्वर्ग तु बेयिस प्यठ कनि नरुक। मे ह्यच्योयि बड कुदामु सान स्वर्गस कुन पँद्य त्रावुन्य जि यम दूतव फ्युर ज़बरदस्ती म्योन चोँठ नरकस कुन। मे मान्योव नु कुनि वति मगर चल्योम नु केह। मे ओस नु ज़न नर्यन ज़ंगन ताकथुय। अंदर अचान अचानुय गव मे अँछन अनि गोट। मे यि नरकस मुतलिक बूजमुत ओस, बराबर ओस ती। जायि जायि ओस नार दज़ान तु यमु केँकर नारस ब्रोँठ कनि नज़ान तु नग्मु करान। शायद आसुहन क्वकर्मि अथ नारस मंजु दज़ान। कुनि कुनि जायि ऑस्य इनसान कुल्यन अलूंद त्राँविथ। अँकिस जायि ओस लूक अरसाथाह सँमिथ। तिमव ओस सख शोर लोगमुत। दर्म राज़ ओस पंडालस प्यठ बिहिथ तिमन सज़ाह बोज़नावान। बु येलि तिमन नज़दीख वोतुस, मे प्यव ज़न तु असमान कलस प्यठ। मे वुछ अति तिम तिम नफर, यिम ज़मीनि प्यठ स्यठाह दान तु प्वन्य करान ऑस्य। यिमन हुँद अख दर्शुन करनु बापथ लूख सासु बोद खर्चान ऑस्य तु मीलु वादु पकान ऑस्य। 'गव सु ओस सोरुय अपजुय!', मे वोन पानस सुत्य। मगर म्यानि सोँचनुच आवाज़ ति ऑस बडि गछान। फ्रेंच कटु वॉलिस यम दूतस गँयि म्योन्य कथ बूजिथ कन खडा। योदवय तस फिकरी ओस नु केह तोरमुत, मगर तोति दोपुन, 'अज़ कथ छुख नारस नरि दिवान? तति क्याजि सूँचुथ नु?' मे दोपुस, 'बाया! बु छुस नु ति सोँचान यि च़ु सोँचान छुख। बु छुस हॉरान गछान जि यिमव ज़मीनि प्यठ रुत्य कर्म कॅर्य, तिमव मंजु ति छि वारयाह मे येति नज़रि गछान।' यम दूथ ओस शायद ज़ानन वोल। दोपुन, 'ति छनु कथ। असली तल छि ज़मीनि हुँद्य लूख आसान क्याहताम, तु बासान क्याहताम।' मे म्यूल पनुनि सवालुक जवाब। पानस मुतलिक ओस नु मे शखुय कांह। बु ओसुस सिरिफ तु सिरिफ नरकू खॉतरय ज़ामुत। हरगाह मे कुनि सातु कांह रुत कर्म कोरमुत ति ओस, सु ओस मे तमी सातु दुनियिहस निश कुनिथ ख्योमुत। सु ओस नु कांह त्युथ नफर युस बु ज़ानुहँन तु यस नु मे पनुनि रुचि कामि हुँज कथ कन पॉव्य पॉव्य आसिहे वॅनिमुच़। मगर बु ओसुस सोँचान यिमन नफरन हुँद, यिमन ज़मीनि प्यठ स्यठाह नाव ओस तु यिम रुत्यन नफरन मंजु शुमार ऑस्य सपदान। म्यान्यन नज़रन तलय ऑस्य वुन्यक्यन कम अज़ कम अख दरजन तिथ्य नफर दर्म राज़स ज़ारु पारु करनस लॅग्यमुत्य। मगर जान गव, तिमन पेयि नु मे कुन नज़र, नतु गछिहेख वारय रुसवाँयी तु मे खसुहँन बॅल्य पाफ।

म्यानि खॉतर ओस शायद क्वदरतन रुतुय सूँचमुत। मे ऑस स्वरगुच बुकिंग वॅरमुच़ तु तम्युक रँसीदु ओस मे वुनि ति चंदस मंजु। मे छुडोव पनुन अथु जवानु सुँदि अथु मंजु तु ब्यूतुस अँकिस कनि पलस प्यठ। गासु द्रमुन मा ओस अति कुनि जि तथ प्यठु बेहमुहॉ! फ्रेंच कटु वॉल्य त्राँव मे कुन दोलु नज़राह, तु पृछुनम, 'क्या साँ यिती सुत्य थोकखु? वुनि छनु कथुय।' मे वोनस वापस, 'न साँ, स्व दॅलील छनु केह। असली कथ छे यि जि मे छि स्वरगुच बुकिंग ज़मीनि प्यठुय वॅरमुच़। पछ नय बिही, रसीदु हावय।' यम दूतस बीठ नु पछुय। दोपुन, 'हे यारु, च़े हिविस शिकस लदस कपॉर्य गँयि स्वरगुच बुकिंग? स्वरगुचि टिकटु छा आसान वति पेमच़ु जि च़े तुजुथ अख पानस किच़। तलु बा हाव?'

मे कोड चंदु मंजु काकुद तु होवुमस। काकुदस ओस टाकारु पॉठ्य दर्म राज़ सुँदिस दुथु सुँद दसखत। जवानस फीर बुथिस लेदरि छठ। काकुद होवुन पनुनिस साँथियस। तमि पतु

कॅरुख क्याहताम कथ पानुवॅन्य कथ ताम बदलय बोलि मंज। शायद आसिहे यि संस्कृत। मे आव नु कॅह समुज। असि कर ओस संस्कृत पोरमुत ? भगवत गीतायि हुंघ ति ऑस्य असि ग्वडनिक्य पांन्र या सथ श्लूक तगान परुन्य, तिक्याजि तिम ऑस्य ज़बॉनी याद। नतु कति अॅस्य तु कति संस्कृत ! मोल मॉज ति ऑस्य दिवान अंग्रीज्य परनसुय प्यठ ज़ोर। दपान ऑस्य पतु कथ लगिवु संस्कृत ?

बु रूदुस कटु चेश्मव तिमन दूनवुन्य यम दूतन कुन वुछान। फोन वॉल्य यम दूतन कॅर मे नरि थफ तु दोपुनम, 'हे बाया! सॉन्य छय नु कांह गलती। असि यि वोनुख, ती कोर। व्वलु हुमिस दर्म राजस हावव यि काकुद तु पृछोस जि व्वन्य क्या छु करुन ?' मे रोट दरकु। दोपुमस बस, येमि अलावु पकय नु बु अख कदम ति। त्वहि छुवु गछुन तु गॅछिव। बु प्रारोवु येती।' तिमव द्युत मे इजाजथ पथर बेहनस तु पानु गॅयि दर्म राजस निश। बु रूदुस यीतिस कालस ओरु योर वुछान। यि अंघ पॅख्य सपदान ओस, ति वुछनु सुती ओस दहशथ गछान। मे वोन कृष्णु बगवानस कुन, 'व्वन्य रॅछिज्यम येति योर। ऑखुर युथ छुस तु त्युथ, मगर म्याॅनिस नावस सुत्य छुना चोन नाव ति! हरगाह मे कॅह वुल्टु गछि, तमि सुत्य गछी ना च्चे ति बदनाॅमी। लूक वनन ना कृष्णु बोरुख नरकस।'

शायद बूज म्याॅन्य व्वनथ कृष्णु बगवानन। दूनवय यम दुथ आयि असवुनि बुथि वापस तु दोपुहम, 'हे बाया! न्यसुब मुश्किल गोय हल। मगर च्चे छय शीथ र्वपयि वुनि बकायाह। तिम कति अनख ? हरगाह शीथ र्वपयि अॅज्य बरख तु अॅज्य निमोथ स्वरगस। नतु छुय येती ब्युहुन।' मे ओस नु चंदस पाँसाह कांह। मे दोप तिमन आरु हति बुथि, 'बलायि लगोवु, दियिव ना तामथ व्वजुम। बु दिमोवु पतु वापस। स्वरगस मंज आसि मे कांह नतु कांह पनुन पाँसु वोल!' तिम वॅथ्य दर जवाब, 'असि कति गॅयि हारु पाँदु ? येति छा काँसि तनखाह मेलान वख्तस प्यठ ? अगर बिही, त्रे र्यथ गॅयि तनखाह निनुसुय। त्वहि छुवु पताह अॅस्य छि येति ऑश करान। ज़ानि हा यारु सोन पान, किथु वॅन्य छि अॅस्य दूह दूह कडान।' बु गोस यि दॅलील बूजिथ हॉरान। दोपुमख, 'क्याजि, येति छुना बजठ वजठ किहीन्य आसान ? तिम पाँसु कोत छि गछान ?' तिमव त्रोव व्वश। दोपुख, 'आसान क्याजि छुनु ? आसान छु, मगर सु सोरुय छु दिवताहन हुंदिस टी.ए. तु डी.ए. हस प्यठ खर्च गछान।'

'टी.ए. तु डी.ए.!! क्युथ टी.ए. तु डी.ए. ?' बु गोस हॉरान। तिमव वोन व्यस्तॉरिथ, 'तिम छिना कालु पगाह लाव लश्कर ह्यथ पृथवी लूक तु पाताल लूक गछान। तति छिनु तिम ज़्यादु दूहन ब्यहान कॅह, मगर तोत ताम युस ज़्यूठ फॉसलाह छु, तिम छि तमी हिसाबु चार्ज करान। व्वन्य हय बचि तु बचि क्याह ? अॅस्य ति छि छ्वपु दम कॅरिथ सोरुय बरदाश करान। करव ति क्याह ? येति मा छु तुहुंघ पाँठ्य हाई कोर्ट तु सुप्रीम कोर्ट ? यि दिवता पानु वनि, ति छु फाईनल तु अटल।'

यिम दॅलील बूजिथ चायि मे तुर। मे सूंच, अमि हिसाबु छु जॅमीनि प्यठ जनथ। हरगाह कांह नफर येति प्यठु हुत ताम ति क्रकु दिवान दिवान पकि, दॅहन जायन पृछुनस वति पकुवुन्य जि बाया कुस तकलीफ छुय ? येति छु यि बदलय तावन। असि मा छु युथ कुसाह ज़ांह वुछमुत ! हरगाह जॅमीनि प्यठ अॅकिस दूहस ति काँसि तनखाह बंद करन, हाई कूटी ताम कर्यख लार।

मगर वुन्यक्यस ओस नु अथ मसुलस प्यठ बहस करुन मुनाॅसिब। वुन्यक्यस ओस सवाल शीतन र्वपुयन हुंद। मे वोन फोन वॉलिस यम दूतस, युस दूयव मंजु सीनियर ओस बासान, 'बाया,

मे मानतु च्चु पनुन ल्वकुट बोय। छुना सलाह, मे निख वापस तथ बुरजु कुलिस निश। खबर शाहमार मा आसि च्चोलुमुत, बु दिमहॉ खज़ानस थफ। हरगाह बरादॅरी वॅरिव, न्यसुब गव तुहुंद तु न्यसुब गव म्योन। त्वहि हरगाह यि फ्रठ छु ज़ि बु मा च्चलु, हतुसाँ मे थॅव्यतव ज़ंगन गंड वॅरिथ।’ मगर अमि सुत्य अंदेयि नु काँम कॅह। तिमव वोन ज़ि अकि लटि परलूकस मंज यिथ छुनु वापस गछुनुक सवालुय व्वथान। मे रॅट्य तिमन खवर ज़ि कांह सॅबीला सूचतव म्यानि खॉतरु। ऑखुर म्यानि वुह र्वपयि, यिमु मे बुकॅिक करुनस दिचु, मा गछुन बिलकुलहय फॅक्य?’

फोन वॉल्य कोर बेयिस साँथियस सुत्य मशवरु। तमि पतु कोडुन चंदु मंजु बेयि फोन तु वॅरुन कस ताम सुत्य कथ। बुथि तलु ओस बासान ज़ि काँम छे अंदन वाजेन्य। कॅह काल कथ करनु पतु थोव तॅम्य फोन बेयि चंदस तु वोनुन, ‘हे अख सॅबील छय। हरगाह च्चे ज़ांह कालि काँसि बेछुवनिस या काँसि फॅकीरस छवपु दम वॅरिथ कांह पाँसु छुय द्युतमुत, सु यियी मुजराह।’ मे प्यव याद, मे ओस तॅस्य फॅकीरस नपु नपु करवुन हॅत्युन द्युतमुत, येम्य मे खज़ानुक पय ओस वोनमुत। तु यिहॅय अख कथ ऑस नु मे काँसि वॅन्यमुच़ तिव्याज़ि बु मा ओसुस यछान ज़ि कांह गछि खज़ानुकिस राज़स वॉकुफ गछुन। मे वोनुमख, ‘आ, द्युतमुत क्याज़ि छुम नु! फलॉन्य फॅकीरस मे पूर हथ र्वपयि द्युतमुत। व्वन्य गव च्चु वनुहम रॅसीदु हावुन, सु मा छुम!’

जवानन वॅर बेयि फोनस प्यठ कथ, तु हिलोवुन कलु। दोपुन, ‘कुसमतु वोल छुख। योहय अख रुत कर्म छुय नु च्चे काँसि निश वोनमुत तु अम्युक फल म्यूलुय वुन्यक्यस। व्वलु पख स्वरग लूकस कुन।’

अँस्य हेतिन स्वर्ग लूकस कुन नेरुन्य ज़ि पॅत्य किन्य वोथ हुय। नरकु मंजु पेयि किथु ताम पाँठ्य म्यान्यन कॅचन ज़ॉन्यकारन मे प्यठ नज़र। तिम आयि दोरान दोरान तु वॅरुख मे खवरन थफ। दोपुहम, ‘बलायि लगोय। अँस्य छि येति कुन्य मॅशीदि हुंद्य जिन ही गॉमत्य। कुनि छुनु दिल लगान। च्चुय योत ह्यकख असि दिलासु मदारु दिथ। मतु गछतु स्वर्गस कॅह। असि सुत्य रोज़ तु येत्य। अँस्य ऑस्य ना ज़ॅमीनि प्यठ चॉनिस प्रथ पॅजिस अपज़िस साथ दिवान! वुन्यक्यस कथ छुख असि वुछिथ कलु फिरान?’ यिमन मंज ओस गूकलु ति, येमिस मे ज़िंदु पानस हसमतुन्य वसमथ ताम खेमुच़ ऑस। सु ओस ज़्यादय पहान रज़न खसान।

मे सूच हरगाह बु यिहॅजि कथि कन थवु, बु गछु येमि मोकु निशि अथु छॅलिथ। वॅह्यताम वॅह्यताम बनेयि मे सवर्गस गछनुच सॅबील ज़ि यिमु शिकस लद गॅयि बूद। हता यारु बु क्या दारोवु कॅह? ज़ॅमीनि हुंद हिसाब म्वकुल्योव ज़ॅमीनि प्यठुय। गॅछिवू यारु, तोह्य पानस तु बु पानस। मे वोन तिमन आरु हति बुथि, ‘हे यारु बु ज़ानोवुय नु तोह्य। मे कथ छिवु अनान ऑर्य कटिन्य तॉर्य वॅट्य वॉलिथ। गॅछिव वॅरिव पनुन्य काँम।’ मे कोर यम दूतन इशारु ज़ि पॅकिव जल जल स्वर्ग लूकस कुन। तिमव रॅट मे नॅर तु हेच़्चुख वुडव करुन्य। मगर च़कि म्योन कुस्मथ खराब। युथुय बु ह्योर कुन ह्योतुनस खसुन, गूकलन वॅर मे ज़ंगि थफ तु द्युतुनम द्रसु। बु आस याशाह वॅरिथ कनिविस देवारस प्यठ लायिनु तु फोटुम कलु।

अँथ्य सुत्य गोस बु नॅदरि हुशार। मे वुछ पनुन्य माँज म्यानि ज़ंगि थफ वॅरिथ द्रसु दिवान तु वनान, ‘व्वथू व्वन्य। परबथ छुय ना गछुन! च्चेर गोय। यिमन यारन वोतुय ऑदि प्यठु प्रारान।’



जुप्त तु ताक

मे दिन्न अँछन मूरन। यि सौरुय ओसुस बु सोपुन वुछान। गरि कुन कँरुम नजर। पांछ आसु बजेमच्च। दरवाजस प्यठ अँस्य म्यॉन्य त्रे यार विजु, राजु तु निकु प्रारान। बु वोथुस थोद तु वोतुस आंगुनस मंज। अथाह बुथाह न्यूम छँलिथ। द्विबि द्राव कुरतु पाँजामु लोगुम तु द्रास यारन सुत्य परबथ कुन।

दर अस्ल ओस अमि दूह असि मैट्रिकुक रिज़ल्ट नेरन वोल। असि ओस कालय फॉसलु कोरमुत जि गाश फवलनु ब्रोंदुय गछव परबथ। अख दिमव प्रक्रम तु बेयि तुलव गँणीशु बलु निश तोमलु फँल्य। यि कसमतस आसि, ति ननि तँती।

अँस्य रूद्य निकिस निकिस गाशस तेज कदमव पकान। सफा कँदल, नोव कँदल, आँल्य कँदल तु नायोड त्रॉविथ वॉत्य अँस्य गँणीशु बल। अति कोर ट्योकाह पॉन्य पानस पानय, यि जॉनिथ जि हरगाह गुरु जियस निश गछव, सु पिलुनावि रँतन दीप। असि अँस्य नु पाँसु किहीन्य तु बँल्य गछिहे दँहन थी खजालथ। गणपथ जियस कोर नमसकार, परन पेयस तु द्रायि ब्रोंह कुन। बुथि ओस सु कुल यथ तलु कनि लूख तोमुल अँस्य त्रावान जानावारन ख्यनु बापथ। यिमय तोमलु फँल्य अथस मंज तुलिथ अँस्य लूख पनुन कसमत ति वुछान। खास कँरिथ अँस्य शुर्य पनुन पास या फेल वुछनु खॉतरु यिम तोमलु फँल्य तुलिथ गँजुरावान। ताकुल गँयोव पास तु जुप्त गँयोव फेल। यूत यूत कुल नँजदीख ह्योतुन वातुन, मे हेचुन जंगन थरु थरु अचुन्य।

ग्वडु तुल्य निकन तोमलु फँल्य तु दितिंन विजस अथि। बुथिस अँसुस लेदरि छठ फीरमुच्च। निकु ओस सोन लीडर तु प्रथ कांह कॉम अँस अँमिसुय प्यवान ग्वडु करुन्य। विजन गँजुराँव्य, यिम द्रायि काह फँल्य। दोपुन बाया, निकस छिवु काहनाँव्य सुंद्य काह। मतलब ताकुल तु पास। निकस आव बुथिस रंग वापस। अमि पतु तुल्य विजन पानु तु पतु राजन। विजस अँस्य कुनवुह, तु सु ति पास। राजस द्रायि साड पंदाह फँल्य, याने पंदाह पूर तु अख ओड। असि कोर सॉच। फॉसलु गव जि ओड छुनु मुजराह, यिम गँयि पंदाह बराबर। मतलब राजु ति पास। मे बडेयि ह्यमथ। मे सूंच, दूह छु रुत। सारिनुय छु ताकुल नेरान तु मे क्याजि नेरि नु। मे मोर याशाह कँरिथ तोमलु फल्यन जॉटु तु दितिंन निकस अथि। येमि किन्य बु पनुनि पार्टी हंड डिप्टी लीडर ओसुस, तमि किन्य ओस निकुसुय हक म्यॉन्य फँल्य गँजुरावनस। निकन गँजुराँव्य, ग्वडु अकि लटि, पतु बेयि लटि। बु ओसुस वॉलिंजि थफ कँरिथ तसुंदिस जवाबस प्रारान। निकन त्रॉव्य तोमलु फँल्य म्यॉनिस अथस मंज वापस तु वोनुन, 'बाया यिम छी शेतुवुह। न कम तु न जादु।' मे गँयि अक्लु बकल। गव अम्युक मतलब बुय योत छुस फेल। ति किथु कँन्य सपदि? राजन अँस्य पनुन्य सॉरी परचु मे नक्ल कँर्य कँर्य लीख्यमुत्य। सु गछ्या पास तु बु फेल? मे दोपुमख क्याहताम गलती छि गॉमुच्च। बु करोवु नवि सरु। अदु यि कसमतस आसि, ति मेलि। मे तुल्य दोयिमि लटि तोमलु फँल्य तु येमि लटि दित्य मे गँजुरावनु खॉतरु राजस अथि। तँम्य गँजुराँव्य। बराबर अँस्य सदाह फँल्य। मे तुजि व्वटु मगर निकन ह्युत फेश। दोपुन त्रेयिमि लटि छु वोनमुत व्वसतादन। बाक्यव कोर तसुंजि कथि तॉयीद। मे ह्योतुन आँरकु श्रान गछुन। यिथु तिथु तुल्य मे त्रेयिमि लटि ति तोमलु फँल्य तु गँजुराँविम पानय। मगर कसमतन ह्युत नु साथ कँह। यिम द्रायि बेयि जुप्तुय। मे नटेयि जंगु। चूरमि लटि बेयि वुछनुक ओस नु सवालुय, मगर पानस सुत्य सूंचुम,

‘हरगाह बु बगवानस फेलुय आसुहॉ करुन, तेलि क्याज़ि आसिहे दोयिमि लटि मे ताकुल आमुत?’ मे दोप न, दोयिमुय छु ठीख। मे प्रुछ यारन, ‘त्रेयिमि लटि कॅम्य व्वसतादन छु वोनमुत?’ तिमन ऑस नु वारु पताह कॅह। दोपुख, ‘असि छु लूकन निशि बूजमुत मगर व्वसताद सुंद नाव छनु पताह कॅह।’ मे दोपुमख, ‘त्रॅटिव कथाह तेलि। यि दोयिमि लटि द्राव, ती छु पज़र।’

यारन गव म्यानि वननु सुत्य तसलाह। ऑखुर ऑस्य अॅस्य यछानुय जि साँरी गॅछ्य पास गछुन्य। तिमव कोर म्याँनिस वनुनस सुत्य पूरु पॉठ्य यितिफाक। निकन वोन, ‘व्वसताद सुंज मिसाल छि बिजॉती गलथ। यि छि दर अस्ल कॅम्यताम ख्वद गरज़न टुड्य फॉलॅवमुत्र।’ तु सुती कोरुन मे मुबारख ति। मतलब, दोयिमि लटि हुंद ताकुलुय छु सॅही तु लेहाज़ा छुख पास। बाकुयव यारव ति कोर मे मुबारख। अमि पतु ह्योत असि प्रक्रम द्युन। असि पतु पतु ऑस्य ज़ु लॅडकु तु त्रे कोरि, यिमव ज़न असि नीरिथुय तोमलु फॅल्य हेत्य तुलुन्य। शायद आसिहे तिमन ति अज़ रिज़ल्ट।

वति पकान पकान युस युस ल्वकुट बोड मंदर तु मूर्ती असि नज़रि गॅयि, तथ तथ कोर असि नमसकार तु पेयस परन। येति येति असि सॅदुर लॉगिथ कॅन्य नज़रि गॅयि, तथ ति लोग अथु तु पतु लोग सु अथु पनुन्यन अॅछन। मतलब ओस सिरिफ जि रेडियो प्यठ रिज़ल्ट वनन वोल गोछ सोन रोल नम्बर ति वनुन।

प्रक्रम दिथ येलि अॅस्य कॉठ्य दरवाज़स निशि वॉत्य, अति ऑस सब्जी कुनुन्य। निकस ओस माजि वोनमुत हंद अनुन्य। अॅकिस सब्जी वाजनि निश ऑस्य हंदि बॅद्य तारु। असि लोग तस सुत्य बाव करुन। यितिसुय कालस आव अख अडवरु ऑनुकी तु तॅम्य बॅर यि हंद पनुनिस जोलुनस तु पिलुनॉवन अॅठॅनी सब्जी वाजनि कुन। असि लोगुस मॅचलु। दोपुस, ‘माहरा यि हंद छि असि ग्वडय मॅल्य ह्यॅत्रमुत्र। त्रे कथ बॅरुथ यि जोलुनस?’ ऑनुकी ओस सख तेशल। दोपुन, ‘मगुज़ मा छिवु खराब गॉमुत्य? वालोवु येती यीरी पीरी। मे ह्यॅत्र ना मॅल्य यि वटु अॅठॅनी दिथ!’ निकस ति खोत योरु अॅछन रथ। दोपुनस, ‘हे, त्रे मा ज़ॉनिथ अॅस्य शुर्य? अॅस्य छुनोय यि जोलनु वोलनु त्रॅटिव येतिथुय। स्योद स्योद दि साँन्य हंद वापस।’ वुछान वुछान समेयि अॅद्य पॅख्य लूख। तिम ज़ु लॅडकु तु त्रे कोरि ति अयि ब्रॉह कुन, यिमव ज़न असि पतु तोमलु फॅल्य तुलिथ पनुन कुसमत अज़मोवमुत ओस। बुथ्यन ओसुख रंग जान। शायद आसिहेख सारिनुय ताकुलुय द्रामुत।

अॅक्य बुजर्ग नफरन तु यिमय लॅडकव तु कोर्यव कोर सोनुय तरफ। सब्जी वाजनि ति प्यव सानी कथि तॉयीद करुन। म्वखसर गव ऑनकी जोलनु मंज़ु हंद न्यबर कडुनस प्यठ मजबूर। असि दिद्य अॅठॅनी तस तु सु द्राव। अमि पतु लॉज असि लॅडकन तु कोर्यन सुत्य कथ, तु दरबाराह करान करान द्रायि वापस गरु कुन।

अड वति ह्योत तिमव कोर्यव तु लॅडकव असि वखसथ। असि कोर तिमन साँन्य तरफदॉरी करुनस प्यठ शुक्रिया। तिमव मंज़ु प्यव अॅकिस कोरि ज्वन। दोपुन, ‘हंद कति छव?’ असि दिद्य नज़र, मुचुकरी मंज़ु ऑस असि हंद तुलुन्य मॅशिथुय गॉमुत्र। अॅस्य दवेयि वापस। कॉठ्य दरवाज़स निशि वॉत्य, अति न ऑस हंद तु न स्व सब्जी वाजेन्य। असि दोप मूद्य व्वन्य। गरि खारन मार दी दी लहा। असि यारव मंज़ु येलि ति कांह अखाह अतुर करिहे, मार ओस सारिनुय प्यवान। सारिनुय हुंघन गरिक्थन ऑस पताह जि यिम छि साँरी रॅलिथ। खास कॅरिथ ओस असि सारिनुय निकुनिस बाँय सुंद, यस अॅस्य साँरी बाँय टोठ अॅस्य वनान, सख बीम। सु ओस नु मार

दिनु वख्तु पथ ब्रॉट वुछान केंह। मगर रछान ति ओस सख। यि निकस क्युत अनिहे, ति ओस असि क्युत ति अनान।

असि कॅर वती मिटिंग जि व्वन्य क्या करव। अँटनी ति यियि नु वापस केंह, हंद कति अनव ? राजन हॉव कमाल हुशॉरी। दोपुन, अगर बूजिव, मे निशि छवु अख सँबील। असि दोपुस, वन जल। दोपुन, 'गँणीशु बलु निशि वुछमवु मे अँकिस जायि द्रमनिस अंदर नुनर खँचमुच्च। अगर म्योन मॉनिव, तूर्य गछव तु तति अनव अँठन आनन बराबर नुनर कँडिथ।' निकस खोत ज़हर। दोपुनस, 'पागला! असि छा हंद अनुन्य किनु नुनर?' राजन वोनुनस वापस, 'रछाह हे अक्लि कॉम। अनुन्य ऑस हंद, मगर दफ अज़ ऑस नु हंदुय कुनुन्य। अज़ ऑस सिरिफ नुनर कुनुन्य।' निकु गव यि बूजिथ थोद वँथिथ। दोपुन, 'सँबील छि मोकूल। पँकिव कँरिव जलदी।' अमि पतु त्राँव असि गँणीशुबल कुन बेयि दव।

अँस्य येलि वापस गरु वॉत्य, दँह आसु बजेमच्च। निकुनि बदलु गोस बु बाँय टॉठिस ब्रॉह कुन तु नुनर ब्रॉट कनि त्राँविथ वोनुमस, 'अज़ हसाँ बनेयि नु हंद कुनी। तति ऑस सिरिफ नुनर कुनुन्य। साँरी बटु अँस्य जोलनु बँर्य बँर्य निवान। असि ति अँन्य।' बाँय टॉठ्य तुज नुनर अथस क्यथ। दोपुन लॉव नुनराह छि, अस्ल। जान कोरव।' असि च़ाव सारिनय जुव वापस।

बाह बजे ओस रेडियोहस प्यठ रिज़ल्ट। मे ओस पनुनि जायि फ़ठय। जांगुर कँरिथ ओस मे दोयिमि लटि हंद ताकुलुय पोज़ मोनमुत, मगर अँदुर्य ओसुस म्वकल्योमुत। यूत यूत रिज़लटुक वख नँज़दीख ह्योतुन वातुन, त्यूत त्यूत ह्योतुन मे ऑस ह्वखुन। मगर माजि शारिकायि ओस रुतुय मंज़ूर। काह बजे वोनुख जि मैट्रिकुक रिज़ल्ट नेरि व्वन्य पगाह। बु गोस यि बूजिथ ख्वश। रिज़ल्ट पगाह नेरनुक मतलब गव जि पगाह छु बेयि असि परबथ गछुन तु नवि सरु तोमलु फँल्य गँज़रावुन्य। म्यानि खॉतरु ओस यि अख चान्स बेयि। म्याँन्य बाक़य यार अँस्य नु ख्वश केंह। तिमन ओस फ़ठ जि खबर छा, पगाह क्या सपदि ? कस नेरि ताक तु कस नेरि जुफ ?



पास तु फेल

कालु आयि नु मे चेर ताम नैदुरय। युथुय मे नैदुर ऑस ह्यवान पेन्य, बु ओसुस कांह नतु कांह खोफनाक सोपुन वुछान तु वूर्य वूर्य गछान थोद वॅथिथ। अमि पतु सूच मे जि नैदुर करनी छु गलथ। मे ह्योत लेफि तल बिहथुय यँद्रोखी पाठ परुन, तु यि पाठ रूदुस बु तोत ताम परान, योत ताम विजन ब्वनु प्यठु क्रख दिच। मे दिच गरि कुन नजर। पांछ आसु तयार बजुनस। मे द्युत बुथिस पां फशाह तु द्रास यारन सुत्य परबथ कुन।

म्योन अख यार ओस रोजान गुरगॅर्य मँहलु। नाव ओसुस चमन लाल। परुनस क्युत ओस सु असि ति पथुय। मे सुत्य ऑसुस खास यारज तिक्याजि बाक्यन लॅडकन नाव तु र्यछु कडुनस मंज ओस नु असि द्दशवन्य कांह मुकाबलु। जय कृष्ण ओस असि निशि आँठ खंड थोद, नाव ओसुस कोरमुत फ्रस। मूती लालुनि अँछ आसु हमेशु बासान ज़न शरॉब्य अँछ, नाव कोरुस ठरु। शिबुनस ऑस अकि दूह ज़रकु बरक करवन्य बँनियान लॉगिथ, नाव कोरुस ज़रबाबु। प्राण नाथस ओस गरि ज़मीन ज़िराथ स्यठाह तु सु ओस दूहय असि नवि तोमलुचि तु नवि खादि हुंजु कथु बोज़ुनावान। नाव कोरुस खंडु खाद। टोजस ओस कलस मस कमुय, नाव ओसुस कोरमुत टिनि। क्याह क्याह वनोवु ?

गुरगॅर्य मँहल नँजदीख वॉतिथ प्यव मे खयाल जि चमनु ति कडोन सुत्य। मे कोर तस आंगनु मंजु आलव। तसुंद मोल गव हुशार तु द्राव दारि किन्य। मे वोनस, “माहरा, कति छु चमनु? असि सुत्य यिया परबथ?” सु वोथ तोरु कमि ताम बुथि, “तस क्या करुन परबथ गँछिथ? सु छु पास।” यि वँनिथ चाव सु अंदर। बु गोस क्युथ ताम ह्यु। बाक्यव यारव वॉल्य मे पॉजार जि चै कथ ओसुय अँमिस आलव करनि गछुन? मे मँजिमख मॉफी।

चमनुस ओस नु असि ब्रॉंतुय रिज़ल्ट द्रामुत केंह। दर अस्ल ओस तसुंदिस मॉल्य सुंद माम साधु लयि सुत्य। नाव ओसुस काकूजी। काकूजी ओस गाह बे-गाह यिहुंद गरु यिवान तु चमनु ओस तस स्यठाह खँदमथ करान। केंह मॉल्य सुंदि बीमु तु केंह पनुनि मतलबु। दपान इम्तिहानु ब्रॉंतुय ओस काकूजी चमनुनिस गरस मंजु डेरु त्रॉविथ ब्यूठमुथ। चिमटु तु कमंडल ओसुस सुत्य, यथ रॉछ रावठ करुन्य चमनुस जिमु ओस। येलि चमनुन्य मॉल्य तस चमनुनिस इम्तिहानस मुतलिक वोन, तु सुती यि ति वोनस जि यि माहरा छुनु खास मेहनथा करान केंह, काकूजियन वोनस, “क्या छुस करुन पॅरिथ? गछ कर पनुन्य कॉम। बु दिमय नाबद रछाह पॅरिथ। तमि मंजु गछ्यस रछाह रछाह दूहय दिन्य सुबहस नेरनु वख्तु। अदु यि तति लीख्यतन केंह या मतु लीख्यतन, पास छुस गछुन। गछतु, सेकंड डिविजन थवस बु अँज्य दिथ।” यि सॉरुय दॅलील ऑस मे चमनुनुय बोज़ुनॉवमुच। मे कर्योव पनुन्य किन्य तस ज़ारु पारु जि मे ति नितु काकूजियस निशि, तु सु गॅयोव तयार ति, मगर तसुंद्य मॉल्य दिच नु तथ वथ केंह। दोपुनस, यिम राज छिनु आसान लूकन बावन्य।

ब्रॉह कुन पॅकिथ समखेयि असि लॅडकु जोराह बेयि। तिम ति ऑस्य परबथ गछान। येलि असि तिमन कालु सपदेमति वाकहुच कथ वँन्य, तिमव त्रोव असुन। दोपुख, पास फेल छा आसान वुछुन तोमलु फल्यन? सु छु आसान वुछुन कनि फल्यन। असि सूच, असि छि तेलि कालु गॉमुच गलती। यिनु अज़ ति बेयि कांह गलती गछि, अमि किन्य ह्योत असि तिमन सुत्य सुत्य पकुन।

गॅणीशु बलु नीरिथ वॉत्य अँस्य तथ जायि, येति असि व्वन्य कनि फॅल्य तुलिथ पास फेल वुछुन ओस। हुमव दूयव लॅडकव वुछ पनुन कुसमथ ग्वड। अख ओस पास तु ब्याख फेल। युस फेल ओस, सु ब्यूठ कनि थरस प्यठ पथर तु लोगुन वदुन। व्वन्य छुनु ब्याख लॅडक तस पोशान छ्वपु करुनावुनस। असि गव पनुन पास फेल वुछुन मॅशिथुय। बु गोस तस ब्रॉह कुन तु वोनुमस, “हता यारु पतु छा ती पोज आसान! बॅल्यकि बगवान च़े ति पासुय करी। व्वथ हे पानस गणीशु सुंद नाव तु दि गुरु कुन कदम।” बु ओसुस अँमिस यि वनानुय ज़ि राजन दिच़ मे ज़ीर। कनस तल वोनुनम, “तेलि कथ छु असि ति पनुन पान रंदि कडुन। यि कुस्मतस आसि, ति वाति। वुन्यकि प्यठय क्याज़ि ह्यमव परेशॉनी मॅल्य?” मे दोपुस, “तेलि क्या, पास फेलुय वुछव ना?” सु वोथ दर जवाब, “अहानू, येलि अँमिस छुख नॅसीहथ करान ज़ि पतु छा ती पोज आसान, पानस क्याज़ि छुख नु वनान?” मे सूंच ज़ि राजु ति छु पोजुय वनान। मगर च़कि ओस तस पानस ति अँज्यकिस फ़ठ।

लॅडक ज़ु द्रायि वापस गर कुन। फेलु वॉलिस अँस्य वुनि ति गित्य गछान मगर यार ओसुस दिलसु दिवान। तिम नीरिथुय बुलॉव असि बोनि तल मीटिंग ज़ि असि छा अज़ कनि फॅल्य तुलिथ गँजरावुन्य किनु नु, तिक्याज़ि हुमिस लॅडक सुंद वदन बुथ वुछिथ ओस असि न्यसुब जुव नीरिथ च़ोलमुत। निकन द्युत फॉसलु। दोपुन, अँस्य त्रावव यि मामलु स्योद माजि शारिकायि प्यठ। स्वय दियि तार। बॅल्य कथ छि वॉलिंज अथस क्यथ थवुन्य? सारिनुय आयि अथ कथि बराबंदी।

प्रक्रम दिथ वॉत्य अँस्य काँठ्य दरवाज़स प्यठ। कालुच सबज़ी वाजेन्य अँस अज़ ति तँथ्य जायि बिहिथ। असि दिच़ ओरु योर नज़र। सु अँनुकी गव नु कुनि नज़रि। अचानक पेयि सबज़ी वाजनि मे प्यठ नज़र। तमि लोय नाद, “हयो गोबराह!” अँस्य गँयि तस ब्रॉठ कुन। तमि वॅड चंद मंज़ु अँठनी तु दिच़ुन असि। दोपुन, त्वहि गँयिवु ना राथ हंद येती मॅशिथ। स्व कुन्य मे बेयिस खॅरीदारस त तुहँद्य पाँसु आयि वापस। अँस्य गँयि ख्वश। निकन दोप, “हयो, दँसलाबय द्राव जान, दूह हबा नेरि वारु कारु रुत। मे छुवु बासान, अँस्य आसव सॉरी पास।” मे कोरुस तॉयीद। अमि पतु वॉत्य अँस्य असान तु गिंदान गरु वापस। डेरु लोग निकुनि गरि।

मसाह गव असि ओड गंटु गरु वॉत्यमुतिस ज़ि नेबुर्य गव आलव “हयो निका!” असि दिच़ दारि किन्य नज़र। निकुन यार अँली मीर ओस आंगुनस मंज़ अख अखबारु वरुखाह अथस क्यथ रँटिथ। असि वुछिथुय च़ाव सु दव तुलिथ अंदर तु दोपुन निकस कुन, “माजि हुंद कसम, अज़ त्रावथ नु अँकिस रच़ि। अज़ छय काकनि हुंदि अथु गाड ख्यावुन्य। बा ख्वदा बोज़ुनावथ रुच़ खबर।” निकन कोरुस गाड ख्यावुनुक वादु। अँली मीरन कोड अखबारु वरुख तु त्रोवुन असि ब्रॉठु कनि। यि ओस सानि रिज़ल्टुक अखबार। अँली मीरस ओस मोल अँकिस अखबारु प्रेसस मंज़ काँम करान तु तँमी ओस अख वरुख सुबहॉय गरु वोलमुत। असि दिच़ अखबारस नज़र। असि आयि नु पनुन्य रोल नम्बर ज़न बोज़ुनय। अँली मीरन दिच़ अखबारस बेयि थफ तु रोदुन अथस मंज़। दोपुन, हता वुछान क्या छिवु? सॉरी छिवु पास। बु ति पास। अमि पतु हॉविन असि वारु पाँठ्य पनुन्य रोल नम्बर। पँज्य पाँठ्य अँस्य अँस्य सॉरी पास। असि कोर तस नालुमोत। यीतिस कालस लॅज सारिनुय पताह ज़ि अँस्य गँयि मैट्रिकस पास। सारिनुय हुंद्य गरिक्य समेयि निकुनि गरि। बाँय टोठ ति ओस नु व्यच़ान कुनि। थर्ड डिविजन यिनस प्यठ कोरुन असि लानु तानु मगर अँदुर्य ओस ख्वश। अँली मीरुन्य डिमांड बूजिथ द्राव सु पोत खोरी वापस बाज़र गाडु अनुनि। अमि दूह लोग निकुनि गरि मॉलु। गाड वुछिथ कस यियिहे नु अँसस पोन्य? मगर बु

ओसुस रछाह दिल मलूल। चमनुन रोल नम्बर ओस नु अखबारस मंज कुनी। मतलब सु ओस फेल। यि ह्यकव नु वॅनिथ जि तस दूहदिश नाबद रछ दिनस मंज वॅरा तसुंघ मॉल्य कांह कोताँही, किनु काकूजियुन नाबदय ओस गलथ।

रेडियोहस प्यठ रिजल्ट बोजान बोजान छु अर्यन दर्यन फ्रठ गछान। येलि रिजल्ट वनन वोल परान छु “वन वन टू, वन वन फोर, वन वन सेवन, वन टू वन” वॉलिंजि छि दुबुरारय बडान तु शाह छु बंद गछान। मे ऑस्य यिथ्यन वख्तन प्यठ कम कम हट कट जवान कूनन चामुत्य वुछमुत्य। सारिनुय बोजन वाल्यन छि अमि सातु बुथ्यन लेदरि छठ आसान फीरमुच। अँस्य ऑस्य रिजल्ट नेरुनस बेसबरी सान प्रारान ज़रूर, मगर फ्रट वरॉय। अखबार नय आसिहे वुछमुत, असि ति आसिहे वॉलिंज ऑसु किन्य खँचमुच।

बाह बजे त्रोव असि रेडियो। रिजल्ट वनुन गव शोरू। अँस्य ऑस्य ठाह ठाह वॅरिथ असान तु गँजरावान जि येमि नम्बर प्यठ यथ नम्बरस ताम वॅच पेयि। निकु ओस असि सुत्य सुत्य वनान जि यि कुस स्कूल गव तु अमि पतु कुस स्कूल यियि। येलि सोन नम्बर नजदीख ह्योतुन वातुन, असि व्वशल्यव बुथ। फ्रठ रूद जि यिनु वनन वोल सोन रोल नम्बरुय वनि नु! मगर ति सपद्यव नु केह। सोन नम्बर आव पनुनि वारि प्यठ। राजन दिच क्रख, “असली मुबारख हबा छुव व्वन्य।” अमि पतु मतु पृछ्यतव जि असि काँत्याह पाँसु वॅट्य पास गछुनस, तु अँली मीरन वॅच गाडु गनि खेयि! मगर अफसूस, चमनु ओस रेडियोहस प्यठ ति फेलुय। मे दोप वाय, मोल हय वथ दियिहेस, असि सुत्य आसिहे सु ति परबथ आमुत। अदु यिथु पाँठ्य माजि शारिकायि अँस्य वॅर्य पास, तिथय पाँठ्य करिहे तस ति।



कैटरपिलर

यि ओस बैसाखुक वख। कुल्यन कट्यन ओस नोव पन द्रामुत तु कुनि कुनि ऑस बरजस्तु फुलय। बु ओसुस ऑठी बजि सुबहस तयार गॅछिथ क्वार्टरस नेबर कनि लानस मंज्र बिहिथ चाय चवान। मे सूंच जि यीतिस कालस चाय चवान छुस, तीतिस कालस दिमु बेयि अकि लटि दफ्तरक्यन काकृज्ज पयुर। मे फिर्य फाइलि हँद्य वरख अकि अकि बेयि तु हेतिम केंह ज़रूरी न्वक्तु याद करुन्य। दपान ज़ांह गछि नु गुरिस पॅत्य किन्य तु अफसरस ब्रूह्य किन्य पकुन। गुर छु पॅत्य किन्य लथ लायान तु अफसर छु बुथि वुछिथुय रोब करान। हरगाह नु रोब करुन्य लायख कांह कथुय आसि, तेलि छु तोति हुट मुटुच कांह कॉम दिवान। अज़ ओस नु मे अँक्यसुय अफसरस ब्रूह्य किन्य पकुन केंह, बॅल्यकि ओस अज़ मे चीफ सॉबस सुत्य ति मुलाकात करुन्य। दय ज्ञानान कथ कथि प्यठ रटि तु कथ कथि प्यठ त्रावि ? अमि किन्य ओसुस बु कूशिश करान जि मे गोछ प्रथ कुनि कथि तगुन जवाब द्युन। ऑखुर छना सॉरुय बलायि वातान ल्वकटिसुय मुलॉजिमस प्यठ!!

दॅलील ऑस यिथुपॉठ्य जि चॅर्यवनु ओस बिजलीगरुकिस टॅरबाइनस क्याहताम खुर आमुत तु बिजली हँज पॉदावार ऑस बंद गॉमुच। लोकल इंजीन्यरन हँदि जस्तु खॉज़ु बावजूद ह्योक नु यि टॅरबाइन ठीख सपदिथ। अमि किन्य आव नेबर प्यठु अख ज़्यादु ज्ञानकार इंजीन्यर बुलावनु, येम्य टॅरबाइन ठीख करनु खॉतरु पनुन अख प्लान मुरत्तब कोर। यि प्लान आव मंज़ूरी खातरु चीफ इंजीन्यरस शहर सोज़नु, मगर चीफ सॉबन कोर प्लान अँछ वॅटिथुय मंज़ूर करनुस इनकार। तॅम्य कोर फॉसलु जि न्वकसुच साम ह्यनु बापथ करि सु पानु चॅर्यवनुक दोर। च्वन द्वहन इन्तिज़ार कॅरिथ वोत अज़ सु द्वह येलि चीफ सॉबस पानु ओस ओर वातुन। प्रोग्राम ओस जि सु वाति शहरु प्यठु नव बजे बॉग्य। डिविजनल आफिसु, युस थरगुंडु ओस, करन अतिक्य अफसर चीफ सॉबस सुत्य मुलाकात तु चाय चथ सपदन सॉरी चॅर्यवन कुन रवानु। चॅर्यवनु हेयि चीफ सॉब मोकस प्यठुय वाकातन हँज साम तु बेयि करि नेबरु प्यठु आमुतिस इंजीन्यर तिवारी सॉबस सुत्य ति मुलाकात। तमि पतु वातन तिम वापस थरगुंड, येति बतुक इन्तिज़ाम ओस करनु आनुत। बतु ख्यथ करन तिम पानुवॅन्य सलाह मशवरु।

चीफ सॉब वोत बराबर काह बजे थरगुंड। एक्जिक्यूटिव इंजीन्यर मागरे सॉब ओस पनुन्यन मातुहतन सुत्य, यथ मंज्र जाला सॉब असिस्टेंट एक्जिक्यूटिव इंजीन्यर तु तारिक सॉब अँसिस्टेंट इंजीन्यर शॉमिल ऑस्य, सडकि प्यठुय प्रारान। नेबर्युम इंजीन्यर तिवारी जी ति ओसुख सुत्य। सलाम दुआ कॅरिथ तु चाय चथ सपदेयि सॉरी चॅर्यवन कुन रवानु। मागरे सॉबुन टेक्निक्ल पी.ए. आसनु सबु ओस मे ति तिमन सुत्य ज़रूरी गछुन। चीफ सॉबस पतु पतु ऑस जीपन हुंज लॉन तु बु ति खोतुस अँकिस जीपि। चॅर्यवन वातान वातान बजेयि बाह। अति ओस प्रान नाथ जूनियर इंजीन्यर तु तसँद्य वकर्स सुपरवाइज़र जमाल दीन तु गफार डार फाकय तु फुकरय प्रारान।

चीफ सॉब ओस अथ अलाकस मंज्र ग्वडनिचि लटि आमुत। जीपि मंज्रु ब्वन वॅसिथ हेच तॅम्य नज़रि सुती अलाकच साम। पावर हाऊस ओस सडकि प्यठु स्यठाह ब्वन, दॅरियावस निश। हालांकि पावर हाऊसस ताम ऑस प्वख्तु सडख मगर चीफ सॉबन ज़ोन मुनॉसिब व्वखुली पकुन।

मागरे साँबन कुन बुथ कॅरिथ वोनून, “बुछ हज क्याह नज़र छु? च्चवापॉर्य छु गोन जंगल, ताज़ हवा तु साफ आब। कति बनि यि जाय शहरस मंज़? हरगाह अख मील ति इनसान यथ जायि सुबहस सुबहस पैदल पकि, ज़ु ज़ु सेर माज़ हुरनस। दफ हज यि छि ख्वदा साँबन असि न्यामथ अता कॅरमुच।” मागरे साँबन कोर बडि बडि आंकार। हालांकि हॅकीकथ ऑस यि ज़ि सु ओस पॅतिम्यन त्रे वॅरियन मंज़ योर सिर्फ द्वयि लटि आमुत, तु पावर हाऊसस ताम ओस अकी लटि गोमुत, सु ति जीपि मंज़। असि ति कोर तस सुत्य सुत्य चीफ साँबुनि कथि आंकार, तु लॅग्य तिथुपॉठ्य कदम तुलनि, ज़न तु असि वुमरन हंज़ पकनुच हॉल ऑस। बाक्य साँरी ति गॅयि तस पतु पतु पकनुस मजबूर।

मसाह आसिहे असि ओड मीलाह कोडमुत ज़ि चीफ साँबस पेयि दूरि कथ ताम चीज़स प्यठ नज़र। अख कुल्य लँडाह अख ऑस पथर पेमुच तु अँथ्य कुन ओस चीफ साँब मुदय गँडिथ वुछान। असि ति त्राँव सारिवुय ओर कुन नज़र मगर बोज़नु आव नु कॅह। चीफ साँब वोत यीतिस कालस अथ कुल्य लंजि ब्रॉह कुन। साँरी अफसर क्यो मुलॉज़िम छि तस पतु पतु पकान। मे ति तुज यि दॅप्यज़ि ति दव, ज़ि खबर यिमव मा ख्यव, मेय मा रूद ख्यनय। चीफ साँबस अँद्य अँद्य गॅयि साँरी जमाह। मे दिच तारिक साँबस ज़ीर तु तॅम्य त्राँव मे जाय। चीफ साँब ओस ब्वन कुन जुकिथ पनु वॅथुरस कुन वुछान। अँस्य पॅक्य बेयि रछाह ब्रॉह कुन। अँकिस पनु वॅथुरस प्यठ ऑस्य ज़ु वेठ्य कैटरपिलर (बॅड्य मुहुर्य) आराम करान। अख ओस सबुज तु ब्याख शाह तुल्य रंगु। तापस मंज़ ओस दूशवुन्य हुंद रंग सख चमकान। चीफ साँबन दिच क्रख ‘कैटरपिलर’ तु त्राँवुन मागरे साँबस कुन नज़र। मागरे साँबन हिलोव तिथु पॉठ्य कलु ज़न तु कांह बेश कुमथ खज़ानु ओस कस ताम मॅशिथ गोमुत तु चीफ साँबन ओस वदि कोडमुत। मागरे साँबन बनोव बुथ असुवुन तु दिचुन जाला साँबस कुन नज़र। जाला साँब ओस ग्वडय तयार। तॅम्य ति हिलोव तिथु पॉठ्य कलु ज़न तु चीफ साँबुनि तेज़ नज़रि दाद ओस दिवान। यीतिस कालस पॅक्य साँरी अकि अकि ब्रॉह कुन तु कोरुख कैटरपिलरन हुंद दीदार। साँरी ऑस्य चीफ साँबस तहसीनुचव नज़रव वुछान। मे सूंच, खबर चीफ साँब मा दियि यिमन सारिनय प्रमोशन तु बय रोज़ु यपारी। मे कोर जिगरु तु वोनूम पनुनिस साहबस मागरे साँबस कुन बडि बडि, “जिनाब, यि कस पेयि यिमन प्यठ ग्वडु नज़र?” मागरे साँबन खोर ज़बरदॅस्ती बुथिस खुशी हुंद रंग तु होवुन चीफ साँबस कुन इशारु, युस वुनि ति केम्यन दॅछिन्य तु खोवुर्य ओस वुछान, “चीफ साँबस हसाँ, बेयि कस?” बु गोस चीफ साँबस ब्रॉह कुन तु वोनुमस, “रंग हज छुख बराबर वॉलिंजि मंज़ थवुन लायख।” चीफ साँबन तुल कलु थोद। मे कुन कॅरुन वारु नज़र तु वोनून, “तुहुंद तारुफ?” मे चॅज खवरव तलु मेच नीरिथ। मे दोप हय हे, मे मा गॅयि कथ करुन्य पॅरिथ। मे वोनूस, “बु जिनाब छुस मागरे साँबुन टेक्निक्ल पी.ए.।” चीफ साँब वोथ थोद। मे दोप यि गोछ नु मे थापुर कडुन। मे कोड अख कदम पथ। बाक्य ऑस्य साँरी हयबुंगु। चीफ साँबन कॅर मे अथस थफ तु दोपुन, “तलु साँ हेरि वनख काँसि म्योन कैमरा वालुन।” मे आयि नु वथ कुनि। मे होकुम दिथ युस पानुन्यार चीफ साँबन मे सुत्य होव, तमि सुत्य हुर्वव मे यज़थ। बु फ्यूरुस तेज़ तेज़ पथ तु वोनुमस, “बु जिनाब खारु पानय।” मागरे साँबन त्राँव मे कुन दोलु नज़र तु कनस तल वोनुनम, “पानु कोत छुय गछुन? जमालु सोज़ुन।” तसुंदि बुथि प्यठ ओस साफ यिवान बोज़नु ज़ि तस ऑस नु मे सुत्य हमदर्दी कॅह, बॅल्यकि ओस नु सु यछान ज़ि मे क्या गॅछ चीफ साँबस सुत्य ज़्यादु जान पहचान

सपदन्य। मे गव बुथ अलूंद तु वोनुम जमाल दीनस, “गछ साँ हेरि वाल साहबु संजि जीपि मंजु कैमरा।” जमाल दीनन तुज दव।

चीफ साँब ओस व्वन्य व्वदनी, क्याहताम साँचान। सारिवुय अफसरव लोग त्युथ ज़न तु तिम ति आँस्य साँचान। यि ओस नु काँसि पताह ज़ि कुस क्याह छु साँचान। मिनट वुह मरु गँयि। जमाल दीन आव नु वापस कैह। चीफ साँबन दिच़ गरि नज़र। अख आँस तयार बज़नस। मागरे साँबस कुन कोरुन बुथ तु वोनुनस, “मे छु बासान तीतिस कालस खसव अँस्य व्वनु। तति कूत काल लगी?” मागरे साँबन दिच़ जाला साँबस कुन नज़र। जाला साँबन वोन, “बस जिनाब, मसाह ओड गंट।” साँरी पँक्य व्वन्य पावर हाऊस कुन। चीफ साँब तु मागरे साँब ब्रोंठ ब्रोंठ, तु बाक्य पतु पतु। पकान पकान ओस चीफ साँब वुनि ति पथ कुन नज़र नज़र दिवान ज़ि कैटरपिलर छा अँत्य किनु चँल्य! मागरे साँबन वोन गफार डारस, “चु प्रार साँ येत्य। जमाल दीन यियी कैमरा ह्यथ, पतु यि तँस्य सुत्य।” बिजली गरस निश आँस अख पार्क। चीफ साँबस आयि शायद पार्क पसंद। दोपुन, “व्वन्य क्या करनि छु व्वन वसुन। येती लॉगिव कुर्सी तु ब्यहमव।” होकुमस आयि यकदम तॉमील करनु। चीफ साँब, मागरे साँब, तिवारी साँब तु जाला साँब बीठ्य कुरसियन प्यठ। बाक्य रूद्य व्वदनी। यीतिस कालस अँन्य अतिक्य स्टाफन चाय तु बिसकूट, तु लॉज सारिवुय चाय चैन्य। मागरे साँबन ह्योत पनुनि डायरी मंजु क्याहताम लेखुन।

चाय चवान चवान दिच़ चीफ साँबन नेबरु प्यठ आमतिस इंजीन्यर तिवारी साँबस कुन नज़र। तिवारी साँबन युथुय चीफ साँब पानस कुन वुछान वुछ, तँम्य कोड जल जल पनुन ड्राइंग तु थोवुन तस ब्रोंठ कनि।

बिजली गरु किस टँरबाइनस ओस संगीनु कोस आमुत, यि ओस तिवारी साँबुन वनुन। चीफ साँबन दिच़ नख्वस आँकवनी नज़राह। तिवारी साँबस ओस वनुन ज़ि टँरबाइन किथु वँन्य छु खराब गोमुत तु तथ ठीख करनुक तसुंद प्लान क्या छु। जाला साँबन कोर तस इशारु तु तँम्य ह्योत पनुन आँस खोलुन। मगर चीफ साँब ओस नु मूडस मंजु कैह। तस आस्य शायद वुनि ति प्रान कैटरपिलरन मंजु। तँम्य वोन मागरे साँबस, “व्वलु हज़ यि यिथि ना पतु करनु। बतु ख्यथ क्या छु असि बेयि करुन?” मागरे साँबन होव तिवारी साँबस इशारु ज़ि अथ प्यठ करव कथ बतु ख्यथ। यीतिस कालस वोत जमाल दीन कैमरा ह्यथ। कैमरा वुछिथुय वोत्यव चीफ साँब। जमाल दीनस पृछुन, “यूत काल छा लगान कैमरा अननुस? च़े क्या छुय नाव?” जमाल दीन व्वशल्यव। तस फूर नु जवाबुय। मागरे साँबन वोननुस, “क्या साँ जवाब क्याजि छुख नु दिवान? यूत वख कथ लोगुय?” जमाल दीनन वोनुस, “जिनाब, तति आँस नु साहबु संजु गॉडी। साहबु सुंद ड्राइवर ओस गोमुत ह्योर गाम चाय चैनि तु गॉड्य आँसुन नीमुच़ सुत्य। बु ओसुस जिनाब तँस्य प्रारान।” अथ कथि न फूर चीफ साँबस जवाब तु न मागरे साँबस। चीफ साँबन रोट कैमरा अथस मंजु तु वोनुन मागरे साँबस, “वँलिव नेरव।” मागरे साँबन पृछुनस, “जिनाब, टँरबाइनस दिमव ना नज़र।” चीफ साँबन वोनुस वापस, “व्वन्य क्या नेरि तथ नज़र दिथ। त्वहि आसिवु ना वुछमुत।” मागरे साँबन हिलोव आंकारस मंजु कलु, हालांकि खराब गछनु पतु आँस नु तँम्य तथ अकि लटि ति नज़र दिच़मुच़।

चीफ साँब ओस तेज़ तेज़ दवान। पतु पतु ओस सोरुय कारवान दवान। चूंकि योरु ओस चडायि खसुन, अमि किन्य ओस सारिनुय फ़ख़ खोतमुत। वातान वातान वॉत्य साँरी तथ कुल्य लंजि निश यथ प्यठ कैटरपिलर आँस्य। मगर अफसूस! लँड आँस अँत्य, मगर केम्य आँस्य नु

कुनी। चीफ साँब छु ओरु योर दवान, मागरे साँब तस पतु पतु। मागरे साँबन वोन जाला साँबस, “तलु साँ तोह्य बुछिव हुमि तरफु। जाला साँब द्राव अकि तरफु तु तारिक साँबस वोनून बेयि तरफु बुछुन। बु ओसुस अँन्यूर ह्यू प्रारान जि मे मा दियि चीफ साँब बेयि कांह होकुम। मगर ति सपद्यव नु कैह। व्वन्य ह्योत मे ति ओरु योर दवुन, कैटरपिलर छांडनु खाँतरु कम तु चीफ साँबस हावनु खाँतरु जादु। मे ओस पूर यकीन जि साँरी आँस्य ती करान।

अचानक पेयि मे चीफ साँबनिस बुथिस कुन नज़र। तस आँस लेदरि छठ फीरमुच। मे कँर ह्यमथ तु गोस तस ब्रोंह कुन। बिचौर्य बुथ लॉगिथ वोनूमस, “जिनाब, यिमन कैटरपिलरन क्याह ओस त्वहि करुन?” चीफ साँबस व्वजुल्यव बुथ। कैमरा त्रोवुन पनुनिस फेकिस प्यठ अलूंद। मे कुन कँरुन दोलु नज़र तु वोनून, “चे क्या छुय बासान? मे आँस्या यिम गरु सुत्यु निन्य?” मे वँछ यीरी पीरी। सारिन्य ब्रोंठ कनि गोस रुसवा। मागरे साँबन बनोव बुथ तुथ, ज़न मे ज़िंदय चापिहे। जाला साँबन वोन वुठव सुती क्याहताम। शायद ओस वनान जि चे क्वसु चेट्च आँसुय मँज्य कथ करुन्य? मे तोर फिकरी जि चीफ साँब यि करि तु ति करि, मगर यिम साँरी त्रावन नु मे अज़ ज़िंदु कैह।

“न जिनाब, म्योन मतलब ओस नु ति ...”, मे हेचौर्यि चीफ साँबस पनुन्य सफौर्यी दिन्य। तँम्य चँट म्योन्य कथ तु वोनून, “बलायि आयि अथ टँरबाइनस, अँम्य ख्यव ना वख्त! वारु कारु हय येत्य आँस्य तु कोत गँयि यितिसुय कालस?” चीफ साँबन वोन तिथु पाँठ्य, ज़न तस टँरबाइनुक न्वकुस कडान कडान तस दूह वादु आँस्य लँग्यमुत्य। मगर तसुंजि कथि सुत्यु बडेयि मे ह्यमथ। मे दोप, न, चीफ साँब छुनु मे नाराज़ कैह। नाराज़ आसिहे, तेलि खेयिहे बुथ। मे वोनूस, “जिनाब, अगर तोह्य वँनिव, बु छांडन बदल कांह कैटरपिलर पगाह तु तुलस फोटुव। येति छि यिम बिसियार आसान। मे छु कैमरा ति।” मे ओस नु हँकीकतन कैमरा कैह, मगर मे सूंच, अमि सुत्यु तरि अँमिस फिकरी जि बु छुस नु शिकसलद कैह। हरगाह कैमरा ज़रूरथ ति पेयि, काँसि ह्यमव व्वजुम। या तमि पतु मागरे साँबस छुना पानस ति कैमरा! तँस्य ह्यमव। सु क्या नकार कर्या? म्यानि खाँतरु छुसु द्युन, द्युन छुसु चीफ साँबुनि खाँतरु।

चीफ साँब ओस वुनि ति व्वदौस्य, मगर म्यानि कथि सुत्यु गोस शायद तसलाह। तँम्य थोव मे फेकिस प्यठ अथु। बु गोस बाह बाह गज़ थोद वँथिथ। जाला साँबस तु तारिक साँबस कुन कँरुम दोलु नज़र। मतलब, बु गोस व्वन्य चीफ साँबुन खास नफर। चीफ साँबन प्रुछ मे नाव। मे वोनूस पनुन नाव तु तँम्य वोन तोरु, “मंज़ूर साँब छु ना साँ परान ज़ोलोजी। तँस्य क्युत ओसुम यि फोटू बकार।” अमि पतु वोनून मागरे साँबस कुन, “बु हज़ योत योत गछान छुस, कैमरा छुस अवय सुत्यु थवान जि बुथि मा पेयि कांह केम्य ज़ाथ या जानवर, बु निमस फोटुव तुलिथ। मंज़ूर साँबस छि यिम फोटू बडु बकार यिवान।” मंज़ूर साँब आसिहे शायद चीफ साँबस नेचुव। मागरे साँबन हिलोव शाबौशी हुंदिस अंदाज़स मंज़ कलु तु वोनूनस, “जिनाब, सु ति मा छु युथ तुथु बचु। सु छु बडु मेहनती। वँचिम वँरी छुस हज़?” चीफ साँबन खारि ड्यकस दूह। ओरु योर त्रॉवुन नज़र तु पतु वोनून मागरे साँबस, “तस हज़ छु फाइनल इयर। मगर तुह्य कति ज़ॉन्यून सु?” मागरे साँबस गव शाह बंद। तँम्य ओस नु ज़ांह मंज़ूर साँब वुछमुतुय। तसुंद मतलब ओस सिर्फ चीफ साँबस थँन्य करुन्य। मगर फ्यार ओसुस आँसु नीरिथ च़ोलमुत, अवु किन्य प्योस जवाब द्युन, “जिनाब, मे छु सु कति ताम दावुथस मंज़ त्वही सुत्यु वुछमुत। शायद पँत्यमि र्यतय, वँमिशनर साँबुनिस नेचिव्य सुंदिस खांदरस प्यठ।” चीफ साँबस वँछ नु यि कथ हटि कैह।

दोपुनस, “न हज, सु कति? तस गॅयि व्वन्य ज़ु वॅरी अम्रीका गॉमति।” मागरे सॉबस फीर लेदरि छठ बुथिस। असि सारिनय थी गॅयस खजालथ। तोति लोगुन बुथ्य त्रकुर तु वोनुनस, “तेलि हज आसि मेय गलथ-फहमी।” चीफ सॉबन द्युत नु येमि लटि जवाब कैह। सु ओस वुनि ति ओरु योर नज़र दिवान ज़ि कुनि मा गछि कैटरपिलर नज़रि। रछाह गॅछिथ वोन मागरे सॉबन चीफ सॉबस, “व्वलु हज पकव व्वन्य, बतु गछि ना यख।” चीफ सॉबन त्राँव गरि कुन नज़र। चोर आसु बजेमचु। दोपुनस, “आ, पॅकिव जल, पतु लगे ना डिसकशन करुनस ति वख।”

मागरे सॉबन आसु चीफ सॉबस खॉतरु कमु कमु ज़ियाफतु बनावनाविमचु। वाज़वान ओस तयस प्यठ आमृत लागनु। अँकिस र्वपयि हुँजि जायि आसु ज़ु खर्च करनु आमचु तु हिसाबस यिहँन पाँछ हावनु। यि सोरुय खर्चु यियिहे कुनि हिसाबस मंज त्रावुन तु अमिच मंजूरी दियिहे चीफ सॉब अँछ वॅटिथ। चीफ सॉबस आव बतु ख्यनस मजय। बाक्य अफसर क्यो मुलॉजिम ति ऑस्य टास कॅड्य कॅड्य ख्यवान। बतु ख्यनु पतु आव ज़ाफरॉनी कॅहवु पेश करनु। यीतिस कालस बजेयि शे।

चीफ सॉबन दिचु बेयि गरि कुन नज़र तु वोनुन मागरे सॉबस, “चेर गव स्यठाह। यि वुछिवुन ना ड्राइवर कोत गव? खबर तॅम्य ख्यवु कैह? दॅपिवुस नेरव। मागरे सॉबन वोनुस, “अहन हज, तॅम्य ख्यव बतु। यि छु यपॉर्य तिवारी सॉब प्रारान, अँमिस सुत्य करव ना कथ?” चीफ सॉबस गव यि वनुन बडु नागवार। दोपुनस, “हतु हज, व्वन्य कथ छि अँमिस सुत्य मगुजमॉरी करुन्य। दीवुस हज कॉम करनु। यि क्या गलथ वन्या?” तिवारी सॉब ओस अँकिस अंदस कुन बिहिथ क्याहताम लेखान।

चीफ सॉब द्राव शहर कुन। मे वोन मागरे सॉबस, “दूह हज द्राव जान। चीफ सॉबन चाहे कैह वुछ या न वुछ, मगर कामि दिचुन अप्रवल। असि क्या ओस बेयि बकार!” मागरे सॉबन कोर आंकार। जाला सॉबस कुन त्राँवुन नज़र तु वोनुनस, “खबर यिम कैटरपिलर कति पॅट्य अँज्य? मे ऑस बेयि ति कुनि कुनि खर्चस अप्रवल हेन्य, स्व कॉम रूज यपारी। प्यठु वनय सिरु कथ। यि कैमरा छुय डिपार्टमेंटुक। बु ओसुस सॉचान यि तुलि अमि सुत्य टॅरबाइनस तु असि फोटू। मगर अँम्य छुनय यि लोगमुत केम्यन क्रुलन फोटुव तुलुनस। वनतु क्याह वनुहँस?”

चीफ सॉब नीरिथ आव तिवारी सॉब ब्रॉह कुन। तस ओस अथस क्यथ वुनि ति टॅरबाइनुक ड्राईंग। मागरे सॉबन वोनुस ज़ि डिसकशन करनुक छुनु व्वन्य कांह ज़रुरथ, तु सु हेकि पनुन्य कॉम शुरू कॅरिथ। तिवारी सॉब गव हॉरान तु परेशान। तस ओस नु समजुय यिवान ज़ि काकुद वुछनु वरॉयी किथु पॉठ्य मीज तथ अप्रवल। सु ओस गरा मागरे सॉबस कुन वुछान तु गरा पनुनिस ड्राईंगस कुन। ठीख तिथय पॉठ्य, यिथु पॉठ्य बु ओसुस गरा तसुंदिस बुथिस कुन वुछान तु गरा पनुनि फाइलि कुन, य्वसु मे अकि लटि ति मुचरावनुच ज़रुरथुय पेयि नु।



डुड

कालिजु प्यठु गुरु वसान वसान येलि अँस्य देवान बाग वॉत्य, अति पेयि असि दूरि अँकिस सायबानस प्यठ नज़र। सायबानु ओस नोव तु रंगुदार। विजन त्रॉव मे कुन दोलु नज़र। दोपुन “कस ताम छु खांदर। वुमराह अख गव खांदर साल ख्यनुसुय।” मे कोरुस आंकार। खांदर सालुक नाव बूज़िथुय ओस मे ति आँसस पोन्थ यिवान। विजन थोव मे फेकिस प्यठ अथु तु दोपुन, “क्याह छुख वनान?” मे तोर नु केंह फिकरी। यिथ्यन मामुलन मज़ ओसुस बु सख मुडु। मे वोनस, “कथ मुतलिक।” विजन वोन, “पख ब्रॉट, अँती वनय।”

ओड मीलु कमयु पहन हू पँकिथ वॉत्य अँस्य तथ सायबानस निश। सायबानु ओस सडकि हुंद अख हिसु बंद कॅरिथ लागनु आमुत। ज़ु त्रे नफर आँस्य तँजीरु गंडान तु केंह आँस्य सायबानस अँदरु कनि सतरंडु तु मसनंदु वाहरावान। नेबरु कनि आँस्य केंह जवान ओरु योर दवु दव करान तु पांछु शे बुज़र्ग आँस्य वदुनी दरबार करान। बु ओसुस यि नज़ारु वुछुनस मंज़ मशूल। सायबानस अंदर आँस्य लँडकु तारु वाव मालु लागान मगर अथ वथ ज़न आँसुख नु यिवान केंह। मे गव मथ ज़ि बु हावु यिमन वाव मालु किथु कँन्य छि यिवान गंडनु मगर विजुन बुथ वुछिथ खेयम कथ। सु ओस अक्सर वनान ज़ि बु छुस हंगु तु मंगु ज़हरबादस जंग छुनान।

विजन कोर मे अँती रोज़नुक इशारु तु वुछान वुछान त्रॉवन सायबानस अंदर कुन टुख। बु रूदुस सडकि प्यठ वदनी। येलि नु सु वारियाहस कालस वापसुय आव, बु गोस तस छंडनि। विजु ओस नु कुनी। सायबानस अँदरुय आँस अकि तरफु मकानस अंदर अचुनस वथ, मगर मे ज़ोन नु तोर गछुन मुनाँसिब। मिनठ पंदाह मरु गँछिथ आव विजु वापस तु वोनन, “मे कोरुय सोरुय पताह। कस ताम गूपी नाथस छु नेचिविस खांदर। अज़ छख माँज़िराथ तु नेनि साल छु तयस प्यठ आमुत करनु। दपान अलु पलु छि आँठ सिन्थ रननु आमुत्य। आंचार तु ज़ामुत दूदु प्यालु गँयि अलग।” “मगर चे कँम्य वँनी यि दँलील?” मे पृछुस। विजन वोन, “मे लॉज सायबानु वॉलिस दँदुर तु तँमी वोन। अखतुय ओस वनान ज़ि असॉम्य छे स्यटाह अँमीर।”

ज़ामुत दूदु प्यालुक नाव बूज़िथु आव मे आँसस वारय पोन्थ। मे आँस ल्वकुचारु पानु प्यठय ज़ामुति दूदुच सख कमज़ूरी। अमि ब्रॉट ज़ि बु सॉंचु हॉ बेयि केंह, विजन कॅर मे अथस थफ तु वोनन, “मे करेयि कूशिश ज़ि अति मा नेरि कांह ज़ॉन्य, मगर द्राव नु कांह। तोति छुनु परवाय केंह। अगर चु दिल करख, अँस्य ति यिमव साल खेनि। असि क्या थफ कॅरिथ प्रुछ्या कांह ज़ि तोह्य कम छिवु? सॉरी सॉचन आसन काँसि हुंघ अँशुनाव।” मे द्युतुस नु जवाब केंह। बु ओसुस चकि खोचु बुड। बँल्य कथ ओसुम पनुन पान अँट्य अट्य कडुन! विजस ति गँयि म्यानि जवाब नु दिनु सुत्य तसलाह तु तमि पतु त्रॉव असि गुरु कुन दव।

किताबु गरि त्रॉविथ वॉत्य अँस्य स्योदुय निकस निश। सु ओस पतलूनस कुंघ करान। असि कोर तस निश दुहुक रपोर्ट पेश तु सुती वँनिस सायबानुच शेछ। येलि विजन तस वोन ज़ि कस ताम गूपी नाथस छु नेचिविस खांदर, निकन चारि बुम। दोपुन, “हा दपू यारु सतीशस छु बाँयिस खांदर।” “कुस सतीशु?” असि पृछुस। निकन थँव चुनि कुंघ कनि पाँतरि प्यठ तु दोपुन, “यि सायबानु ओस ना गोल मज़ारस निश खोवरि सडकि प्यठ?” असि कोर आंकार। तँम्य वोन, “तँती गव ना वल्यन हुंद मकानु। गूपी नाथ वोल गव सतीशस मोल। खबर तोरवु

फिकरी केह ?” मे पृष्ठस बेयि, “यि सतीश कुस गव ?” सु वोथ दर जवाब, “सतीश छु मेय सुत्य परान एस.पी.कालिजु। तोह्य कति ज़ाँनिवून!” निकन थोव कुंघ कोरमुत पतलून किलिस अलूंद तु लॉजिन कॅमीज़ि कुंघ करुन्य। असि कुन वुछिथ वोनून, “तोह्य ति कॅरिव पनुन्य पलव तयार, सालस छुना गछुन!” मे पृष्ठस, “असि क्युथ साल छु ?” निकन वोन वापस, “अँती छुख बेकुल लागान। दोपुय ना सतीशस छु बाँयिस खांदर तु सतीश गव मे यार। तँम्य ओस मे पँत्यमि हप्तु वोनमुत मगर मे रूद नु यादुय। त्वहि ति छुवु मे सुत्य युन।” यि बूज़िथ गोस बु ख्वश। मे ओस वख्ताह अख गोमुत खांदर साल ख्यनुसुय। मे कॅर सतीशस तु निकस आँही। विजु ओस ज़्यादय पहन ख्वश। दोपुन, “बलायि छुनुस, बु ओसुस डुडु पाँठ्य ति गछुनस तयार। मगर व्वन्य गव जान ज़ि यज़तु सान गछव।” निकस ओस सु तिथु पाँठ्य बुथिस कुन वुछान ज़न तु तसंज़ सतन पीर्यन मिनथ आँसुस।

साल ओस आँठि बजि मगर अँस्य वॉत्य सती बजि। खांदर वॉल्य आँस्य दवु दव करान। सायबानस नेबर कनि आसु अँकिस जायि कुरसियु लॉगिथ। केह बुज़र्ग आँस्य बिहिथ सियाँसथ दगान। शेख अबदुल्लाहन क्याह वोन तु मीर काँसिमन क्याह वोन ? असि आँस नु तिहँज़न कथन सुत्य कांह दिलचस्पी। अँस्य रूद्य तिमन दूरुय पहन व्वदनी। मे प्रुछ निकस ज़ि सतीश कति छु। तँम्य दोप तोह्य रूज़िव येत्य, बु छँडन।

सतीश ओस आवुर। निकन दोप सु ओस अँदर वुर बलस प्यठ कथ ताम इन्तिज़ामस लोगमुत।

खांदर वाल्यव मंज़ु यिम नफर अँदर नेबर नचान आँस्य, निक ओस तिमव मंज़ु काँसि काँसि नमस्कार करान। तिम ति आँसिस वापस नमस्कार करान। अख्तुय ओसुस कांह कांह पृछान, “वन साँ गोबरा, वारय!” अँस्य आँस्य मंज़ु मंज़ु निकस पृछान ज़ि हु कुस गव तु यि कुस गव ? निक ओस वापस वनान ज़ि हु गव सतीशस माम तु यि गोस पितुर बोय। असि आव समुज ज़ि निक ज़ानि वल्यन हँदिस खानुदानस स्यटाह जान पाँठ्य।

साडि आँठि बजि प्यठु हेतिन सालुर्य यिन्य। गवडनिची छ्वकि सुत्य चायि अँस्य ति अंदर। अँदर आँस्य बतु ख्यनुक्य पँट्य त्राँविथ। निकन रँट अंद कुन जाय तु कोरुन असि इशारु। अँस्य बीठ्य पथर। अँडिस गंटस मंज़ु आयि साँरुय सब बँरिथ।

लड़कु जोराह आयि ब्रॉठ ब्रॉठ अथु स्वरशावान तु पतु पतु आँस्य थालु वॉल्य थाल त्रावान। युथुय रोगन जोश त्रावन वोल म्याँनिस थालस निश वोत, मे वोनुस, बु माहरा छुस वशनँव्य। तँम्य त्रोव रोगन जोशु फोल वापस थालस मंज़। मे कुन कॅरुन व्यखचुय नज़राह तु दोपुन, “वशनँव्य, यूत ल्वकुट! चु मा छुख इम्तिहान दिथ आमुत ?” मे दोपुस, “न माहरा, बु छुस ल्वकचारु प्यठय वशनँव्य।” म्यान्यव साँथियव कोरुहँस ताँयीद।

रोगन जोशु वॉल्य कोर दूरि अँकिस नफरस आलव, “हे गाशु लाल।” गाशु लालन दिच नज़र। रोगन जोशु वॉल्य वोनुस, “येति हसाँ छुय वशनँव्य अख।” गाशु लालन कॅर कस ताम बेयिस सुत्य कथ तु तमि पतु वोनून रोगन जोशु वॉलिस, “बाल जी, तलु साँ बेयि वुछ, बेयि मा छुय कांह वशनँव्य।”

यीतिस कालस लँज बाल जियस पतु बाकुय सिन्य बाँगरावन वाल्यन हंज़ लॉन। मे खोवुर्य युस नफर बिहिथ ओस, तँम्य वोन मे, “चे कुस साँ तफरीक तुलुथ। येलि वशनँव्य ओसुख, तेलि कथ ओसुय सालस युन।” मे गव तसुंद यि वनुन सख बरतबाह। मे वोनुस, “बु क्या पानय

आसु ? मे माहरा छु सतीशन साल कोरमुत।” तँम्य ह्यचोव बेयि क्याहताम वनुन जि बाल जियन दिच क्रख, “हे बेयि छुवु सॉ कांह वशनँव्य ?” चोरव नफरव तुल अथु थोद। बाल जियन गँजराँव्य “अख, जु, त्रे, चोर।” तमि पतु वोन बाल जियन गाशु लालस, “यिम माहरा छिवु चोर।” गाशु लालन कोर बेयि कस ताम नफरस सुत्य मशवरु तु वोनून असि कुन, “वँलिव सॉ वशनँव्य सॉरी येमि तरफु।” तमि पतु वँर तँम्य हुमि अंदु बिहित नफरन गुजॉरिश जि तोह्य त्रॉव्यतव येत्यथ वशनव्यन जाय तु तोह्य बिहतव यिहँजि जायि।

सबि गँयि अफरातफरी। कँह छि होर गछान तु कँह छि योर यिवान। मिनट पांचु मरु गँयि अथ कारवायी मंजु ज़ायि। तमि पतु गँयि स्युन बाँगरावनुच कारवायी बेयि शुरू।

नवि जायि ब्यहान ब्यहान आयि असि सुत्य बेयि जु नफर। व्वन्य गँयि अँस्य शे। पोन्त्य दिनु वोल येलि बजि सबि अथु स्वरशाँविथ म्वकुल्यव, अदु आव सु सानि सबि। कँह काल गँछिथ त्रॉविख असि थाल। सानि सबि आव नु कांह थालन दजि सुत्य फश दिनि। असि मंजु अँक्य नफरन, युस वाँसि जान ओस, कँड चंदु मंजु रुमाल तु व्वथुरोवुन थाल। बाक्यव ति कोर ती। मे त्रोव चंदस अथु मगर मे आँस रुमाल गरी मँशिथ गॉमुच। मे सुत्य युस नफर ओस, सु द्राव बडु दिलदार। तँम्य कोर पनुनि रुमालि सुत्य म्योन थाल ति साफ। मे वुछ तस कुन असवुनि बुथि, मतलब शुक्रियाह।

अँस्य अँस्य व्वन्य प्रारान स्युन त्रावनस। मगर सॉनिस कुसस ओर रछाह चेरुय। मे त्रॉव निकुनि सबि कुन नज़र। तति आँस बाँगरुन वाल्यन हुंज लॉन लँजमुच। रोगन जोश, मछ, चोक चरवन, हाख, मुजि चेटिन्य, नदुर्य चुरमु बेत्री।

मामस ख्यनु वाल्यन हुंजि सबि मंजु गव बतु बाँगरुन ति शुरू। पतु पतु ओस वँगलियि वोल पकान। मे बासेयि पनुन्य ब्वछि तेज़ान, मगर करुहॉ क्या ? म्योन थाल ओस वुनि ति कोरु होखुय तु बाँगरुन वाल्यन हुंद ओस नु पय पतहय कँह।

इन्तिज़ाँमी कारकुन आँस्य ओरु योर तु योरु ओर करान, मगर असि कुन ज़न आँस नु काँसि नज़रुय प्यवान। मे ह्योत तथ दूहस बद रद वनुन येमि दूह बु वशनँव्य बन्योस। दर-अस्तल ओस नु मे वशनँव्य बननुक शोख कँह, मगर म्योन ज़ातुक वुछिथ ओस काकु महाराजन मे स्युन ख्योन मनाह कोरमुत। मे आँस्य तसुंघ लफ़्ज अज़ ति ज़बॉनी याद। येलि म्यानि माजि तस म्योन ज़ातुक ब्रॉटु कनि थोव, काकु महाराजन वँर तथ अकाँय नज़र तु वोनून तस, “बचस छु हना ग्वब्यर। जु चीज़ थव याद। अख छु यि ब्रसवारि ब्रसवारि दूद ज़ालुनावुन तु बेयि छु यि मामस ख्योन त्रावुनावुनु। पतु वुछख च़ु यि मा यियि अथि कुनि। फर्शु प्यठु खारिय अर्शस।” मे दोद अँदरी माज़। आँठि दहि दोह्य ओस वँह्यताम वँह्यताम नेनि फोल अख मेलान बतस सुत्य, तमि निशि ति छोल अथु। म्यानि माजि ओस काकु महाराजुन स्यठाह रोब। सु ओस तस बोड ह्यु प्यँत्रु ह्युहर। नँतीजु द्राव जि बु बन्योस वशनँव्य, ज़बरदस्ती!

काकु महाराजुनि अथ कथि ओस कमय काल गोमुत जि गाडु बतुक वख वोत। म्यॉन्य मातामाल आँस्य गाडु बतु दिवान तयस प्यठ। म्यॉन्य नान्य आँस अमि दूह सारिनुय नँजदीखुव्यन अंगन आँशुनावन साल करान। अमि दूह ओस पँज्य पॉठ्य म्यानि मातामालु मॉलु लगान। बँड्य यक तरफ, अँस्य शुरी आँस्य शुराह सदाह आसान। म्यॉन्य नान्य आँस पनुन्यव अथव गाड रनान, मुजि आँसुस त्रावान सुत्य। इनसान ओस गाड म्वकुलॉविथ अँडिस गंटस अथस तु थालस ल्यवान। बु ओसुस नानि स्वठाह टोट। बु ओसुस ग्वडय थवान सरु वँरिथ जि म्यानि

खॉतरु रोज़ि अख गाडु गॅन्य पगाह सुबुहस किच़ ति। येलि बु अथ मुतलिक नानि ओसुस वनान, स्व ऑस मे हति हति लटि बलायि लगान।

मगर येमि वॅरियुक गाडु बतु रूद मे वुमारि प्यठ याद। मे द्यतुख बतु हाकस तु स्वच़लि सुत्य। साँरी ऑस्य टास वॅञ्च कॅञ्च गाडु ख्यवान। बु ओसुस सारिनय हुंदिस चाँटिस कुन वुछान तु व्वश त्रावान। मे ह्यमथ दिनु खॉतरु खेयि नु अमि दूह म्यानि माजि ति गाडु। येलि राथ गॅयि, साँरी शॉग्य। मे ऑस नैदुर गॉब। मे आसु प्रथ तरफ़ु गाडु यिवान बोज़नु। येलि जाँरिस प्यठ वोतुम, बु वोथुस याशाह वॅरिथ तु चास ल्वति ल्वति चोकस मंज़। सारिनय ऑस मस नैदुर। मे तुज अख गाडु लॅट काकुदस वॅलिथ तु ब्यूतुस चूरि चूरि लेफि तल खेनि। मगर च़कि मे कुस्मथ खराब, मे गव गाडि कौड हॅटिस मंज़ बंद। ग्वडुन्यथ कोर मे दमुय तु रूदुस ल्वति ल्वति चास करान। येलि नु तमि सुत्य कांह फर्क पेयि, मे च़ेज बडि क्रख नीरिथ। म्याँन्य क्रख बूज़िथ गॅयि साँरी हुशार। पतु मतु पृछ्यतव कुस तुफान वोथ। होछी बतु टीर आपुरिथ गव कौड यलु, मगर मे थॅविख मार दी दी डॅकरु वॅरिथ। म्यानि नानि न गव म्योन गाडु ख्योन बरदाश तु न म्योन मार ख्योन। यिथु तिथु बचोवुस तमी बु। मगर काकु महाराजुनिस वनुनस च्वचि करनुक द्राव बुरु नैतीजु। बु गोस अमि वॅरियि फेल। तमि पतु रूदुस बु ज़बरदस्त पाँठ्य वशनैव्य।

म्याँनिस साँचस लॅज जीर। गाशु लाल आव ब्याख नफर ह्यथ असि निश तु वोनुन तस, “शिबन जी, तुल साँ थाल।” शिबन जियन हेत्य साँन्य थाल वापस वटुन्य। मे त्राँव पानस सुत्य वॉलिस कुन नज़र। तस तोर फिकरी जि थाल थोद तुलनु सुत्य गोस बु परेशान। तॅम्य वोन मे कनल तल, “अँस्य छि ना कमुय। यिम अनन ओरय थाल बॅरिथ।” मे खँच वॉलिंज बोठ। शायद आसिहे गाशु लालन यि कथ ब्रॉठय वॅन्यमुच़ तु मे आसिहे नु बूजमुच़। बोज़ु हाँ ति किथु पाँठ्य ? बु ओसुस ना गाडु बतस सन्योमुत!

दहि पंदाहि मिनटु पतु आयि त्रे नफर साँन्य थाल ह्यथ तु थॅविख असि ब्रॉठु कनि। दमु ओलव, व्वज़ुज च़ामन, लेदुर च़ामन, च़ोक्य वांगन, नदुर्य, बेत्री अलावु ऑस्य नदुर्य चुरमु तु म्वंजि आंचार ति। थाल ओस मे कुन वुछान तु बु थालस कुन। मे वुछ नु पथ ब्रॉठु केह तु ह्योतुम बतु ख्योन। अँथ्य मंज़ पेयि मे निकस कुन नज़र। सु ओस दोयुम बोड रोगन जोशु फोल रॅटिथ विजस माज़रथ करान तु बाँगरन वॉलिस इसरार करान जि तस ति त्राव। विजु गव मजबूर ब्याख फोल रटनु बापथ।

थाल असि ब्रॉठु कनि थॅविथ आव नु असि निश कांह यि पृछनि जि तोह्य मा हेयिव केह। साँरी ऑस्य स्युन ख्यनु वालिनय ल्वलुमतु लाय करान। मे प्यव ह्यस, दूद प्यालु नय द्युतुखुय नु असि। मे कोर अँकिस इन्तिज़ाँमियस आलव तु वोनुमस, “माहरा दूद प्यालु गोवु मॅशिथुय।” तॅम्य वॅरु बेयिस अँकिस शेछ तु तॅम्य त्रेयिमिस अँकिस। मगर दूद प्यालु ह्यथ आव नु कांह। अचानक पेयि मे गाशु लालस प्यठ नज़र। बु गोस तस निशि तु वोनुमस, “माहरा, असि म्यूल नु दूद प्यालय।”

गाशु लालन त्राँव मे दोलु नज़र। दोपुन, “दूद प्यालु कति छि ?” मे वोनुस, “माहरा, आँदी हय असि वुरुबलु प्यठु पताह कोर जि दूद प्यालु ति छि।” गाशु लालस व्वज़ल्यव बुथ। मे थोवुन फेकिस प्यठ अथु तु दोपुन, “गोबराह! दॅलील छि यिथु पाँठ्य जि ज़ुय हथ दूद प्यालु ऑस्य बनॉव्यमुत्य, मगर ग्वडनिची सब छि डायन हतन हुंज़। अड्यन दिमव तु अड्यन दिमव नु केह, ति मा बनि। अमि म्वखु कोर फॉसलु जि दूद प्यालु दिमवुय नु। अज़ छना त्रठ। असल सालर छि

पतु यिवान, डुडु छि आसान ग्वडय बिहिथ। व्वन्य ह्य रँन्यमुतिस पाकुवमुतिस बराबँदी यियि तु किथु पॉठ्य।” म्यॉन्य हालत ऑस वुछिन्य लायक। म्योन बिचॉर्य बुथ वुछिथ वोन गाशु लालन मे कनस तल, “मे तोर फिकरी जि म्यॉनिस रँवी जियिन्य पॉठ्य छुय च़े ति ज़ामुत दूद स्यटाह टोट। म्वकल बतु ख्यथ, बु दिमय च़े अख प्यालु लोत पॉठ्य। मगर खबरदार छुय, यिनु येति सु कुनि जायि नोन कडख। गरु गँछिथ खेज़ि।” मे कोर ज़्यूठ आंकार।

बु वोतुस वापस पनुनिस थालस प्यठ। मन ओसुम परेशान। यिनु गाशु लाल मे दूद प्यालु दिनु वरॉयी नेरि ? सुती सूंचुम, न न, ति बनि नु। गाशु लाल छु रुत इनसान।

मे ऑस गाशु लालुन्य कथ फीर्य फीर्य यिवान च़्यतस। येलि नु इनसानस सालस पृछनुय, डुडु लॉगिथ क्या मतलब गव युन ? यि गँयि ना पनुनिस पानस बेज़ुती करुन्य।

बतु ख्यथ द्रास बु न्यबर कुन। म्यॉन्य यार ति द्रायि। मे ह्योत गाशु लाल छंडुन। मगर गाशु लाल आव नु मे अथी। मे प्रुछ अँकिस नफरस, माहरा गाशु लाल कति छु ? तँम्य द्युत नु म्यानि कथि जवाबाह कैह, मगर म्यॉनिस कलस प्यठ थोवुन अथु तु वोनुन, “च़ु मा छुख जिगरि हुंद नेचुव ?” म्यानि बदलु द्युतुस निकन जवाब, “अहन माहरा, आ।” अमि ब्रॉठ जि सु नफर वनि हे बेयि कैह, निकन कँर मे नरि थफ तु कोडुनस अँकिथ कुन। दोपुन, “दलवांजुव कथ लोगुथ ? पख नेरव।” मे वोनुस, “गाशु लाल गछि ना बिचारु पतु दरबुदर मे छंडान! बेयि सतीशस समखव ना!” निकन हेच़ोव क्याहताम वनुन जि मे वुछ सु नफर बेयि असि निश यिवान येम्य मे जिगरि हुंद नेचुव वोन। अमि ब्रॉठ जि सु पृछिहे बेयि कैह, मे पृछुस, “माहरा सतीश कति छु ?” “कुस सतीशु ?” तँम्य वोन वापस। निकु आव बेयि मँज्य तु दोपुनस, “सु माहरा छु असि यार अख। वुन्य ओस येती।” यी वनान वनान कँर निकन मे बेयि नरि थफ त कोडुनस गरु कुन। म्योन दूद प्यालु रुद अँती।

वति पकान प्रुछ विजन निकस, “असि क्याजि समखोवुथन नु सतीशु। अँस्य ति करुहोस मुबारख।” निकन चॉर्य दंद। दोपुनस, “च़ु मा छुख बावरु गोमुत! कुस सतीशु तु कुस यार ?” असि व्वशल्यव बुथ। मे वोनुस, “च़ु क्या छुख यि वनान ? च़े छुय ना सतीशु यार ?” “हा कुस साँ यार! दपू यारु त्वहि ओसवु साल ख्यनुक शोख गोमुत तु मे कोरुमवु सु शोख पूर। यि कँरमु च़ूर ?”

मे फ्यूर बुथिस व्वशलुन। “मगर च़े क्याजि वोनुथ नु असि पज़र ? अँस्य ऑस्या तेलि डुडु सालस ऑमुत्य ?” निकन वोन, “हरगाह बु त्वहि ग्वडय असलियथ वनुहोवु, तोह्य मा यीहिव ? मे ति ओस स्यटाह काल गोमुत खांदर साल ख्यनुसुय। येलि त्वहि सायेबानुच शेछ वँनिवु, मे ज़ोन गँनीमथ।”

डुडु साल ख्यथ ओसुस बु दिल मलूल ह्यु। मे तोर फिकरी जि दूद प्यालु क्याजि गँयि कम। तिम कम गछुनुक वजह ऑस्य अँसी। निकन द्युत मे कलस फश तु वोनुन, “त्राव परेशॉनी। यिमन चीज़न लगी नु पतु सनुन।” मे वोनुस, “मे छनु स्व परेशॉनी। बु छुस सॉचान यिनु गाशु लाल दूद प्यालु ह्यथ मे छंडान छंडान यूर्य वाति।”



सह शिकार

कथ ऑस स्यठाह सँगीनु। पज़र ह्य बूज़िव, मे ओस बुथ्युक रंग कर ताम ज़र्द गोमुत, मगर 'सिको दिल कर' याद कॅरिथ ओसुस बु बोहोदुर आसनुक बास दिवान। सानि जमाँच मंज़ु सेहतु हिसाबु सारिवुय खोतु सरस ग्वलाम रसूल ओस अँदुरी क्याहताम परान। मे युथुय तस ज़ीर दिच, सु आव हलकॉर्य हून्य सुँद्य पॉठ्य मे चॅपिस। मगर ज़ेवि ह्योकुन नु कैह वॅनिथ। जलाल दीन तु राज नाथ ऑस्य अख अँकिस तिथु पॉठ्य थफ कॅरिथ, ज़न तु अलग न गछुनुक कसम ओसुख ख्योमुत। जय कौल ओस ह्यमथ सौबुरावनु बापथ सिग्रेटस दामाह दामाह दिवान, मगर यि नु खयालय जि सिग्रेट मा ओस ज़ालुनय। मुनीर अहमद ओस क्याहताम सौचान, शायद हालातन साम ह्यवान। सु ओस टीम लीडर, अमि किन्य ऑस सॉरुय ज़िमुवॉरी तँस्य। हनीफ खानस ओस बुथ व्वज़ल्योमुत मगर ज़्यव नदारद। यि ओस नु समजुय यिवान जि सु छा फ़ट सुत्य व्वज़ल्योमुत किनु जोश छुस आमुत।

खुमु लूठ अकि अंद तुलिथ दिच मुनीर अहमुदन बेयि नज़र। अजि बरि मंज़ु लोगुस बु ति न्यबर कुन वुछनि, मगर वॉलिंजि थँवुम चीरु थफ कॅरिथ। सह ओस ज़ोतवुनि अँछ कॅरिथ असी कुन वुछान। फ़ट सुत्य ऑस मे सह सुंज़ अकॉय अँछ यिवान बोज़नु मगर मुनीर अहमुदन वोन दूशुवय अँछ छस ज़ोतान। कथ करुनस ओस नु इजाज़थ काँसि, यि सोरुय ओस इशारव सुत्य यिवान वननु। मुनीर अहमुदनि वननु पतु वुछ मे बेयि अकि लटि वारु पॉठ्य। व्वन्य आयि मे ति सह सुंज़ दूशुवय अँछ ठीख पॉठ्य बोज़नु। राज नाथन ति कोर अथ कथि तॉयीद। जलाल दीनस आसु नु अँछ यिवान अथी कैह, मगर तस ऑस सह सुंदि त्रेश च्यनुच आवाज़ साफ कनन गछान। तँम्य वोन असि कनस तल, "बा ख्वदा छुवु सह आबस ख्वलुव कॅरिथ त्रेश चवान। बु छुसवु येत्यथ बिहिथ ति तसुंज़ आवाज़ बराबर बोज़ान।" जय कौलस आयि नु तसुंज़ि कथि सुत्य बराबँदी कैह। दोपुनस मे छु फिलुमन मंज़ वारु वुछमुत, सह छुनु ज़हुन्य ख्वलुव कॅरिथ त्रेश चवान। जलाल दीनन हेचोव तस सुत्य तक़रार करुन मगर मुनीर अहमुदस कुन नज़र प्यथ कॅरुन छवपु। अकि लटि त्रॉव असि बेयि बरि मँज़्य नज़र। अनि गटु ऑस ज़बरदस्त। अँछन मूरन मूरन दिथ ऑस्य अँस्य यि वुछनुच कूशिश करान जि अमि पतु क्याह सपदि।

राज नाथस पथ कुन दकु दिथ आस बु ब्रॉह कुन। मे वुछ सह वारु कारु त्रेश चवान। अमि पतु वोथ सु थोद तु कोडुन काड। तसुंद बाडव वुछिथ गव मे हॉबथ। हालांकि अनि गटि मँज़्य ओस नु तसुंद पान यिवान बराबर बोज़नु कैह मगर तसुंज़ छाय ऑस साफ बोज़नु यिवान। छायि हिसाबु आसिहे सु शे फ़टु ज़्यूठ। मे युथुय तसुंदि काड कडनुच शेछ मुनीर अहमुदस वँन्य, तँम्य ति दिच खोचान खोचान बेयि नज़र। ग्वडु ग्वडु आव नु तस कैह अथि। सु ओस वुनि ति वनान जि सह छु त्रेशुय चवान। मगर येलि तँम्य वारु साम हेच, तँम्य वुछ वारु कारु सह खडा गोमुत। तसुंदि हिसाबु ओस सह चोरय फ़टु ज़्यूठ।

अचानक दिच ग्वलाम रसूलन क्रख 'हयो मूद्य हा!' अँस्य आयि अख अँकिस प्यठ लायिनु। काँसि आव नु समुज जि ग्वलाम रसूलस कथ प्यठ चँज क्रख नीरिथ। येलि मुनीर अहमुदन पृछुस, तँम्य वोन हॉरान गँछिथ, "त्वहि बूज़वु ना सह सुंज़ ग्रज़?" मे तु मुनीर अहमुदन हिलोव

नकारस मंज कल, मगर जलाल दीनन कोर तस तौयीद। दोपुन, “बा ख्वदा बूज मे पानु सुह सुंज खतरनाख ग्रज। मगर मे कॅर अवु म्वखु छ्वपु जि त्वहि मा गछिवु फ्रठ।” जलाल दीनन्य यि कथ बूजिथ द्राव असि न्यसुब जुव। अम्युक मतलब गव जि सुह ओस वारु कारु व्वन्य असि ख्यनस ज़ागान। जय कौलन ओस व्वन्य सिग्रेट पथर थोवमुत। शायद ओस तस एहसास गोमुत जि सिग्रेट छु ज़ालनय।

मे ह्योत तथ गरि डाख करुन यथ गरि बु मुनीर अहमुदन्यन कथन मंज यिथ तस सुत्य ऐडवेंचर करनि द्रास। मे हेच अँदरी पनुनिस मॉलिस माजि माँफी जि मे ह्योक नु तुहँदि खॉतरु किहिन्य कॅरिथ तु पुंचुह वुहरि पानय लोगुस सुहस छेपि। मे ह्योतुन अँछव मंजु ओश वसुन। अकि अकि पेयम पनुन्य सॉरी अंग ऑशुनाव तु यार दोस याद। वुछान वुछान ह्योत मे टुंगि वदुन, तु मे वुछिथ ह्योत सारिवुय मे सुत्य सुत्य वदुन। व्वन्य ओस यि ऑखुरी वख तु असि थँव सारिवुय अख अँकिस चिरु थफ कॅरिथ। मे ह्योत मनु मँजी यँद्रॉखी पाठ परुन।

अँस्य अँस्य कुल ऑठ नफर टीमस मंज। शे ऐडवेंचर करन वॉल्य याने मुनीर अहमद, ग्वलाम रसूल, जय कौल, राज नाथ, जलाल दीन तु बु, बेयि ज़ु कुली हनीफ खान तु कसाना। दरअस्ल गँछ्य अँस्य कुल काह नफर आसुन्य, मगर म्यॉन्य बेयि त्रे यार, यिम हर हमेशु मे सुती अँस्य आसान, आयि नु येमि लटि असि सुत्य कैह। वननु पॉठ्य वोन तिमव जि अँस्य छि आवुय मगर मे ओस पूर येकीन जि तिम खूच्य जंगुलस कुन नेरुनस। म्यॉनिस मिनतु करुनस ति आव नु हॉसिल कैह। तिमव कोर असि सुत्य यिनस साफ इनकार।

वति पकान पकान तु बालु डकरि खसान खसान आव असि पोग। अँकिस दु-वँतिस प्यठ वॉतिथ गँयि कसाना तु हनीफ खान असि निशि छ्यनु। अँस्य द्रायि अकि वति तु तिम द्रायि रछाह चौर्य वॉतिथ बेयि वति। यि कथ लँज नु असि जलदुय पताह कैह। अँस्य येति दुपहरस बाँग्य अँकिस ल्वकटिस मरगस प्यठ वॉत्य, त्रेश च्यनु बापथ दिच असि सामानस छाँड। मगर अफसूस! त्रेश तु दूद ओस तथ सामानस सुत्य रूदमुत युस कसानाहस तु हनीफ खानस अथि ओस। अँस्य रूद्य प्रारान, मगर तिम आयि नु कैह। गंटु जोराह प्रॉरिथ द्युत मुनीर अहमुदन होकुम ब्रॉठ पकनुक। असि ओस नु नर्यन जंगन जुवाह ज्यताह कैह, मगर टीम लीडर सुंद होकुम मा बनिहे टालुन? यिथु तिथु वॉत्य अँस्य पाँछ बजे बाँग्य बजि मरगि प्यठ तु द्युत अति डेरु। अति ओस नागाह अख तु असि सारिवुय लॉज नागस प्यठ तिथु पॉठ्य त्रेश चैन्य ज़न नु बेयि अँकिस वँरियस अँस्य पोन्थ वुछुहॉव। रछाह गँछिथ पेयि कसाना तु हनीफ खान ति वॉतिथ। तिहुंज हालत ऑस सानि खोतु ति खराब। तिमव बिचार्यव ऑस नु त्रेश सुत्य ऑसिथ ति वति त्रेश चेमुच। हनीफ खानन वोन जि तिम अँस्य वथ रॉविथ परेशान हाल तु सिरिफ असि छांडनुच कूशिश करान।

ग्वडु लँग्य अँस्य सॉरी खुमु गंडुनस। खुमु गँडिथुय बाँगरॉव मुनीर अहमुदन बाकुय कॉम। जलाल दीनस तु राज नाथस आव बतु स्युन रनुनुक चार्ज दिनु। ग्वलाम रसूलन तु जय कौलन हेच खुमन अँद्य अँद्य नॉल्य बनावनुच मटिदॉरी। हनीफ खानन तु कसानाहन ह्योत नागु प्यठु पोन्थ सारुन तु मुनीर अहमुदन तु मे ह्योत कॅप फायर लागनु खॉतरु होख होख ज्युन छांडुन। राज नाथ

द्राव अँद्य पँख्य अलाकुच साम हेनि। गरज प्रथ कांह नफर गव पनुनिस पनुनिस कारस सुत्य आवुर।

जंगलस मंज छे सुली राथ प्यवान। बतु ख्यनु ब्रोंठ लँग्य अँस्य पानुवँन्य कथाह बाथाह करनि। हनीफ खान ओस पनुनि बहोदरी हुंजु देंलीलु बोजुनावान। बंदूक तु बंदूकच लासन आसन म्वखु ओस सु विजि विजि हाइकिंग पारटियन सुत्य गछान, युथ जन तिमन वख्ते ज़रूरथ जंगली जानवरव निशि बचॉविथ हेकि। अमि सुत्य ऑस तस जान कमाँय सपदान, हालांकि तसुंदि वननु मुताँबिक ओस नु तस वुनिस ताम काँसि जंगली जानवरस सुत्य रू-बरू मुकाबलु सपुदमुत। हनीफ खान ओस सेहतु जान मगर शक्लि बढ। बासान ओस जि तसुंज शक्ल वुछिथुय हेयिहे सुह तु हापुत पथ।

तकरीबन नव बजे राथ ह्योत असि कैप फायर करनु बापथ ज्युन आयि आयि लागुन। फॉसलु गव जि कैम्प फायरस ब्रोंठ कनि ख्यमव बतु। वुनि ओस असि अथ चुख दिनय जि ग्वलाम रसूलस गँयि कनन क्याहताम आवाज़। दोपुन कुस ताम छु बासान दूरि पकान। असि दिच प्रथ तरफु नज़र। अनि गटु आसन म्वखु आव नु कैह लबनु। पतु द्युत कन। मे बास्यव नु कैह मगर जलाल दीनस बास्यव साफ। दोपुन हँकीकतन छे क्वसु ताम बलायि नागस कुन यिवान। यि बूजिथ कोर मुनीर अहमुदन असि बँडिस खुमस अंदर अचनुक इशारु। अँस्य चायि खुमस अंदर तु बीठ्य सॉरी अख ऑकिस सुत्य, यीतिस कालस मुनीर अहमुदन वारु पॉठ्य हालातन साम हेच। तसुंदि यि वननु पतु जि पँज्य पॉठ्य छे कमि ताम बलायि हुंदि पकनुच आवाज़ गछान, फँट असि तुर। यि कथ गँयि पतु सरु जि बुथि यिनु वाजेन्य बलाय ओस सुह।

यँद्रॉखी परान परानुय बूज मे मुनीर अहमुदन्य कथ। सु ओस ल्वति ल्वती हनीफ खानस बंदूक कडनु खॉतरु वनान। हनीफ खानस प्यव व्वन्य याद जि तस ओस बंदूक ति सुत्य। तँम्य कँड पनुनि जोलनु मंजु दु-नँल्य। मुनीर अहमुदन त्रॉव तस जाय तु सु आव ब्रोंह कुन। जाय संबॉलिथ लोग हनीफ खानन दु-नलि सुत्य निशानु गंडुन। हनीफ खान ओस तयार गूल्य चलावनस जि जलाल दीनन दिच क्रख। दोपुनस, खबरदार छुय, युथ नु गूल्य चलावख। असि दोप यि गव सुह वुछिथुय पागल। मे ह्योत तस ड्यकस अथु लॉगिथ तफ वुछुन। तँम्य द्युत मे दकु तु वोननु, “म्याँन्य मॉल्य छु वोनमुत जि हरगाह सुह गूल्य लँगिथ ज़ख्मी गछि तु मरि नु कैह, तेलि छु सु ज़बरदस्त खतरनाक सपदान तु युस बुथि पेयस तस छु ख्यवान।” असि सूंच यि आसि पोजुय वनान। मगर हनीफ खान ओस नु यि बोजनु खॉतरु तयार कैह। तँम्य दोप मे छि सॉरुय खबर तु अथ मामुलस मंज छे नु मे काँसि निशि ति कैह हेछिनुच ज़रूरथ।

अँदरु ऑस हमलु दमल चलान जि सुहस छा गूल्य लायिन्य किनु नु, नेबुर्य ओस सुह बे-वायि असि कुन वुछान। जलाल दीनन कँर बंदूकस थफ युथ नु हनीफ खान गूल्य चलावि। मुनीर अहमद चाव मंजु। तँम्य ह्योत जलाल दीन समजावुन मगर सु ओस नु बोजनुस तयारुय। यीतिस कालस पेयि जय कौलस न्यबर कुन नज़र। दोपुन सुह छु वारु वारु असि कुन पकान। कसानाहन दिच वॉलिंज अथस मंजु रँटिथ अख चूर नज़र। तस चँज वदन बाख नीरिथ। दोपुन सुह छु बिलकुल खुमस नेबरु कनि बिहिथ। सारिनुय चँज खवरव तलु मेच नीरिथ। हनीफ खान व्वशल्यव ज्यादय पहान। दोपुन व्वन्य छु नु गूल्य चलावनुक मोकय। गूल्य चलावन्य गव साफ सुहस हमलु

करनुक दावथ द्युन। मे गव व्वन्य यँद्रॉखी परुन ति मँशिथुय। अचानक गव जय कौल थोद वँथिथ। दोपुन, “हयो, मे छुमवु अँकिस फिल्मि मंज़ युथुय सीन वुछमुत। सुह ओस ब्रॉठ कनि ऑस वाहरॉविथ। हीरोयिन ऑस फ्रट सुत्य मूमच। स्व ऑस सुहस निशि मसाह शे फुट दूर। हीरो ओस दूरि वुछान मगर सुहस ब्रॉठ कुन यिनस बँहयव नु कैह। सुह ओस अख नज़र हीरोहस कुन दिवान तु ब्याख नज़र हीरोयिनि कुन। तमि पतु पोक सु ज़ु कदम बेयि हीरोयिनि कुन। व्वन्य ओस सु तयार तस प्यठ जेफ्य मारुनस ज़ि हीरोहस प्यव ज़्वन। तँम्य वुछ ब्रॉठ कनि अख गासु लोव। वुछान वुछान तुल तँम्य सु गासु लोव तु द्युतुन लाइटरु सुत्य तथ च़ुख। गासु लॉविस लोग नार। हीरोहन तुज कुनी दव तु आव दज़वुन गासु लोव ह्यथ सुहस कुन। युथुय सुहस तस प्यठ नज़र पेयि, तँम्य त्रॉव हीरोयिन अँती तु च़ोल कुनी दव तुलिथ।” जलाल दीनन वोनुस, “चोन मतलब छा अँस्य ति ज़ालव गासु लोव। गासु कति छु?” जय कौलन वोनुस, “हता पागुलाह! लँश छना?” यि वँनिथ तुज जय कौलन अख लशि हँट अथस मंज़ तु न्यून तथ च़ुख दिथ। पतु ज़ॉजिन ब्याख हँट तु रचन द्वश्य लशि अथन मंज़। अमि पतु तुजि बाकयव ति लशि तु द्युतुख तिमन च़ुख। मुनीर अहमुदन तुल खुमस पर्द थोद तु सॉरी द्रायि दज़वुनि लशि नचुनावान नचुनावान न्यबर। खोचु बुड आसनु किन्य रूद्य बु तु कसाना पथुय। मगर मे आव यकदम खयाल ज़ि यिम सॉरी द्रायि लशि ह्यथ न्यबर तु सुह यीतन यपॉर्य तु नीतन असि ख्यथ। अँस्य दवेयि तिमन पतु पतु। तमि पतु यि सपद्यव, ति मतु पृछ्यतव।

अँस्य फीर्य लशि ह्यथ सारिनय खुमन अँद्य अँद्य। तमि पतु गँयि नागस ताम। न ओस कुनि सुह तु न तसुंद कांह निशानु। असि दिच़ अनि गटि मंज़ुय सॉरिसुय अलाकस छँड। कुनि गव नु कांह नज़रि। ग्वलाम रसूलन त्रोव असुन। अमि पतु आव नु समुज कैह, वँम्य त्रोव कस पतु असुन।

फ्रटतमस मंज़ुय ओस असि अड्यन सुह बास्योमुत तु अड्यन तसुंज़ छाय, काँसि सु त्रेश चवान बास्योमुत तु काँसि असि कुन पकान। च़कि नु किहिन्य। वापस यिथ द्युत असि ज़िनिस नार।

कैप फायर ओस तयस प्यठ दज़ान। ट्राईपाडस प्यठ अँस्य सोबूथ क्वकर बुज़नु बापथ अलूंद। जलाल दीन तु जय कौल अँस्य ख्यनु चनुक सामानु सजॉविथ लागान। मुनीर अहमुदस प्यव ह्यस। यिनु कांह हंगु मंगु बंदूकस थफ दियि तु गूल्य गछि नीरिथ! तँम्य कोर हनीफ खानस आलव तु दोपुनस बंदूक अन। हनीफ खानन ओन बंदूक तु द्युतुन मुनीर अहमुदस अथि। तँम्य मुचुरोव गोलि वापस कडनु खॉतरु बंदूकुक मैग़ीन। मगर यि क्याह! दु-नँल्य अँस गोल्यव वरॉयी। मुनीर अहमुदस गव बुथ्युक रंग पँक्य। हनीफ खान ओस कटु चेशमव सुत्य गरा खॉली बंदूकस कुन वुछान तु गरा मुनीर अहमुदनिस बुथिस कुन।

हनीफ खान ओस दु-नलि मंज़ गोलि त्रावनु वरॉयी सुह शिकार गिंदुनि ब्यूठमुत। अदु य्वसु रुसवॉयी अमि पतु तस गँयि, स्व मतु गँछ्यतन काँसि।



नबु लालु

मामलु ज़ेठ्यव हना ज़्यादय पहन। नबु लालन ओस नु सूचमुतुय ज़ि कथ वाति ओर प्यठ। यि ऑस अज़ ग्वडनिच विज़ येलि तस काँसि ठेकुदरस सुत्य तकरार गव तु मामलु गव हदु न्यबर नीरिथ। ह्यड कलर्क सप्रू साँबन करेयि स्यठाह कूशिश ज़ि बाँय बँदी सुती गोछ मामलु अंदुन मगर नबु लालु आव वुठनु। दफ्तरुक दफ्तर ओस हॉरान। नबु लालुन यि रुफ ओस तिमव ग्वडनिचि लटि वुछमुत।

कथ ऑस नु चकि किहिन्य। अकरम खानस ओस ड्राईवरन क्लीनरन हुंदि खॉतरु वरदीयि सपलाई करनुक ठेकु म्यूलमुत। तसुंद वनुन ओस ज़ि तसुंज सारिवुय खोतु कम रेट आसनु किन्य म्यूल तस यि ठेकु। डार साँब, युस बँडिस साहबस पी.ए. ओस, ओस अथ कथि ताँयीदस मगर नबु लालस ओस नु यि व्यचान कैह। नबु लालुसुय योत क्याह, ल्वकटिस काँसि ति मुलॉज़िमस ऑस नु यि कथ श्रपान। हालांकि यि कथ ऑस टाकारु ज़ि बोड साहब, येम्य सपलाई आर्डर कोडमुत ओस, ओस नु रशवु रटान। सु ओस पानु दूदु सुत्य छँलिथ। मगर बँनिम्यव ल्वकट्यव अफसरव ओस ब्वनय यि कार तँरीकु सान अंजाम द्युतमुत। अकरम खानन अँन्य पानय चोर टेंडर तु कॅरिन डार साँबस हवालु। पतु कोर सारिवुय ल्वकट्यव बड्यव ह्यमतो समतो तु बनोवुख तसुंदि नावु आर्डर। बोड साहब ओस पूर मामलु निशि बे-खबर।

बोड साहाब ओस नु वैसे ति यिमन ल्वकट्यन ल्वकट्यन मामुलन सनान। तस ऑस खबर ज़ि चपरॉस्य सुंदि प्यठु पी.ए. हस ताम छि साँरी मुलॉज़िम त्रेशाह तमोकाह रटान तु अमि वरॉय छुनु तिमन बतय श्रपान। मगर सु ओस नु यिमन कथन ज़्यादु सनान कैह। सु ओस तैलि मामुलस सनान येलि लछु बद्यन हुंजु काँम आसिहे। सासु वादन ओस नु सु पृछु गॉरुय करान। दपान तँम्य ओस अकि लटि डार साँबस ननि वानु वोनमुत ज़ि ल्वकटिस मुलॉज़िमस नय बिचारस यिम नाँयिद पाँसु ति बनन, गुज़ारु कति गछ्यस? डार साँबन ऑस यि कथ लुकन कम तु पानस ज़्यादु पहन वँन्यमुच। मगर दफ्तरन मंज़ु छा कांह कथ चूरि रोज़ान? वारु वारु लँज यि कथ सारिनय पताह।

अज़ सुबहस येलि अकरम खान आर्डर निनु खॉतरु आव, सु वोत स्योदुय सप्रू साँबस निशि। ओरुच योरुच कथाह बाथाह कॅरिथ कोर सप्रू साँबन डार साँबस आलव। पतु द्रायि त्रेश्वय दफ्तरु न्यबर, शायद चाय चेनि। कैह काल गँछिथ येलि तिम वापस आयि, अकरम खान वोत स्योदुय नबु लालस निश तु मोंगुनस आर्डर। नबु लालु ओस टाइपिस्ट-कम-डिसपैच कलर्क। तँम्य कॅरुस बुथिस कुन वारु नज़राह। फाइलि मंज़ु कोडुन आर्डर तु रोडुन अथस क्यथ। पतु दोपुनस, “अन हज़ साँन्य चाय।” अकरम खान ओस प्रोन खिलॉड्य। तस ऑस वुम्बुर गॉमुच मुलॉज़िमन सुत्य लेन देन करान, अमि किन्य ओस नु कहुन्य मुलॉज़िम तस मंगु मंग करान। अद सुलि या चौर्य, सु ओस सारिनय हुंद माल तिमन बराबर वातुनावान। मगर नबु लालु ओस नोवुय नोवुय ओर आमुत, अमि किन्य ज़ानिहे नु सु अकरम खानस वारु पाँठ्य कैह। अकरम खानन कोड चंदु मंज़ु दँह वंपुयुन अख तु थोवुन नबु लालस अथस क्यथ। नबु लालन त्रोवुस दँह वंपुयुन वापस चंदस मंज़ु तु दोपुनस, “असि सुत्य नु हज़ मज़ाख कैह। शेठन सासन हज़ छुय आर्डर। बा ख्वदा रटय नु पुंचुहव कम डबल पाँसु।”

नबु लाल ओस वॉसि ल्वकटुय। योहय वुह अकवुह ह्यु आसिहे। ज़ु डाय वॅरी आसुहनस गॉमुत्य नोकरी करान मगर अथ दपत्तरस मंज़ आमृतिस ऑसिस त्रे र्यथ गॉमुत्य। गॅर्य किन्य ओस जान। मोल ओसुस नॉयिब तँहसीलदार तु पेठ्य वॉन्य ओस सु रूदुक्य पॉठ्य कमावान। अवु किन्य ऑस नबु लालस ति पनुन्य जान खर्चहन। पान सिग्रेट गॅयोव ऑसिथुय, ज़ु कदम ति हरगाह कडुन्य आसुहँनस, टांगु ओस छांडान। दपत्तर वॉल्य ऑसिस अवु किन्य लाल वनान, नबु लाल! यज़तु खॉतरु कम तु हज़लन ज़्यादु।

पुंचुहन र्वपुयन हुंद नाव बूज़िथुय खँच अकरम खानस ग्रख। दोपुनस, “हा यारु, चु मा छुख बावरु गोमुत। मे ना पुंचुह र्वपुयि ज़ांह पी.ए.सॉबस दिचुमचु, चु कमि वारि हुंद हाख छुख?” नबु लालस खोत वारि हुंद हाख बूज़िथु खश्मु। दोपुनस, “गछ हज़ पगाह यिज़ि, पगाह दिमय आर्डर। मे छुय वुनि यि डिस्पैच करुनय।” यि वॅनिथ थोव नबु लालन आर्डर बेयि मेज़ुकिस दराज़स अंदर।

कथ वॉच सप्रू सॉबस ताम। तँम्य न्युव नबु लाल बुलॉविथ तु वोनुनस, “गोबुराह! वुनि छुख चु ल्वकुट। यि लागि नु करुन। खान सॉबस छुय ह्योर ताम रसूख। अँमिस सुत्य लागि नु रावुरावुन।” यि वॅनिथ कोड सप्रू सॉबन अकरम खानस आलव, “व्वलु हज़ खान सॉब यूर्य। दिस हज़ पंदाह र्वपयि। बचु हय छु, मारोन मा!”

अकरम खान द्राव बुर्दबार। दोपुनस, “सप्रू सॉब! बु माहरा दिमुहँस नु दहि अलावु कैह। व्वन्य छुख चु वनान तु ठीख छु। बु मा छुस ज़ांह चॉन्य कथ टालान।” यि वॅनिथ कजि अकरम खानन चंदु मंज़ु पंदाह र्वपयि तु दिचन नबु लालस।

नबु लालस आव गुर ज़्यादय पहन। तँम्य सूंच ज़ि डार सॉबन तु सप्रू सॉबन आसि जान माल रोटमुत, मे छि टरकावान पंदुहन प्यठ। दोपुनस, “पुंचुह माहरा छस नु ज़्यादु कैह। अँमिस क्या, कमावुन छुस ना?” अकरम खानस गव यि वनुन सख बरतबाह। दोपुनस, “चे मा छी मगुज़ खराब गॉमुत्य। बु हा करय यारु अकी टासु सुत्य कुलचु।” नबु लालस चायि मॉल्य सुंज नॉयिब तँहसीलदॉरी मगुज़न। दोपुनस, “गछ हज़ कर क्याह छुय करुन। गछ साहबस निश कर रपोर्ट।” नबु लालस ऑस पताह ज़ि यिथिस मामुलस मंज़ गछि नु कांह बँडिस साहबस निश। तस हरगाह रछाह ति शख गछयख ज़ि यि ओस चूरु टेंडर, सु कर्यख आर्डरुय कैन्सल।

अकरम खानस बास्यव ज़ि नबु लालु छु ज़्यादय पहन नचान। शायद अमी किन्य ज़ि मोल छुस नायिब तँहसीलदार। मगर बु ति गोस नु ल्वकचि माजि हुंद कैह। दोपुनस, “बा ख्वदा दिमय नु व्वन्य डबल पाँसु। वन आर्डर म्योन छुयि ह्युन किनु नु?” नबु लालन कोरुस साफ इनकार।

वुछान वुछान गव मामलु संगीन। अमि ब्रॉठ ज़ि सप्रू सॉबस तरिहे कैह फिकरी, अकरम खान गव याशाह वॅरिथ थोद वॅथिथ तु चाव बँडिस साहबस निश। तति क्या सपद्यव, ति लॅज नु काँसि पताह। बँड्य साहबन करुनोव चपरॉसिस अथि दरवाज़ु बंद।

रछाह गॅछिथ द्राव अकरम खान कमरु मंज़ु न्यबर। काँसि सुत्य वॅरुन नु कांह कथ तु द्राव गरु कुन।

यीतिस कालस वॉच डार सॉबस ति शेछ। सु आव दवान दावन सप्रू सॉबस निश। सप्रू सॉबन वॅन्य तस पूरु दॅलील तफसीलु सान। डार सॉबन वोनुस, “मामलु छा यूत बिगर्योमुत? मे गॅछ ना शेछ करुन्य, बु समजावुहन नबु लालु पानय।” सप्रू सॉबन ह्युतुस जवाब, “मे हज़ करेयि

पानु स्यठाह कूशिश जि कथ गॅछ नु ज़ेठन्य, मगर नबु लालु आव वुठनु। किहिन्य बूजुन नु योरुक। ”

डार साँब तु सप्रू साँब गॅयि स्यठाह दिल मलूल। युथ कुसु ओस अज़ ग्वडनिचि लटि सपद्योमुत। बॅडिस साहबस कुन वुछिथुय ऑस प्रथ काँसि तुर फटान, पतु बॅहर्या कांह तस निश रशवु पाँसन हुंज कथ करुनस। यीतिस कालस सूज़ बॅड्य साहबन डार साँबस नाद। डार साँबस व्वज़ुल्यव बुथ। नबु लालस कुन वुछिथ वोनून तस, “छुनिथु साँ त्रठ, पानस ति तु असि ति! खबर क्या आस्यम व्वन्य बोजुन।”

दर अस्ल ऑस बॅडिस साहबस कोत ताम गछनुच जलदी। तॅम्य ओस अकरम खानस ति पगाह सुबहस यिनु खॉतर वोनुमुत। डार साँबस वोनून, “वुछ हज़ पनुन्य एडमिनिसट्रेशन। क्याह वनु बु पगाह अँमिस ठेकुदरस? अँमिस लडुकस गछि वनुन सुबहस हॉज़िर रोजुन।” यि वॅनिथ द्राव बोड साहाब।

रॉत्य रातस ओस नबु लालु तारख गँज़ुरावान। स्व कति नॅदर? मॉलिस ति ह्योकुन नु कैह वॅनिथ। यिनु वोल सीन याद कॅरिथुय फॅट तस तुर। तॅम्य ओस नु यि खाबस मंज़ ति सूचमुत जि अकरम खान अचि पॅज्य पॉठ्य बॅडिस साहबस निश।

सुबहस बुलॉव्य बॅड्य साहबन अकरम खान तु नबु लाल यिकुवटय। डार साँब ति ओस हॉज़िर। बॅड्य साहबन करुनोव दरवाज़ु अँदुर्य किन्य बंदु। नेबरु कनि ऑस्य दफतरुक्य बाक्य मुलॉज़िम कन दिथ बोज़नुच कूशिश करान। सप्रू साँब ओस पनुनिस मेज़स प्यठ बिहिथ दयान।

नबु लालु ओस अँकिस कूनस मंज़ व्वदुनी, बुथि लेदुर्योमुत। अकरम खान ओस कुरसी प्यठ बिहिथ। डार साँब ओस व्वदुनी तु साहबन कोर तस बेहनुक इशारु। बॅडिस साहबु सुंदिस वनुनस प्यठ बोज़नॉव अकरम खानन सॉरुय दॅलील। दोपुनस, मे हज़ दिचॉमस खुशी सान दॅह र्वपयि, मगर यि वोथ नु पुंचुहन र्वपुयन डबल पाँसु। वन तु हज़ मे कुस लास छु त्यूत लबुन।

बॅड्य साहबन बूज़ सॉरुय दॅलील वारु पॉठ्य। यीतिस कालस अकरम खान शेछ ओस वनान, तीतिस कालस कॅर नबु लालन पानस मंज़ ह्यमथ पॉदु। सूचुन, युथुय मे पृछि, बु ह्यमस नलम। दपस यि हज़ छु अपुज़ वनान। हरगाह डार साँब तसुंद तरफ करि, बु दपस डार साँब ति छु अपुज़ वनान। यिम हज़ छि द्वश्वय रॅलिथ।

मगर ति कुसु सपद्यव नु कैह। साहबन पृछुय नु नबु लालस कैह। बुथ गोस खतरनाक। ड्यकस खचस द्रुह। अँछव ज़न ओसुस नार नेरान। डार साँबस कुन वुछिथ वोनून, “मे तार तु हज़ फिकरी, बड्यन बड्यन अफसरन निश गॅछिथ छि यिम ठेकुदर वफूर पाँसु बाँगरावान। जायि जायि छि डालि पकुनावान। व्वन्य हरगाह येम्य मांचुकूलन र्वपयि पुंचुह मंजिनस, तु द्रास जुव। त्वहि ति आस्यन खर्चुहन बराबर दिचमुच, तमि वरॉय मा कॅरिवुस तोह्य काँम। मगर ल्वकुटिस मुलॉज़िमस बिचारस दियिहे नु कैह।” माहोल गव यकसर बदलिथ। डार साँब ओस सौचान, खबर क्वसु त्रठ छुनि यि नबु लालस, मगर अज़ ओस बॅडिस साहबस नोवुय रुफ। डार साँबन थोव कलु ब्वन कुन। तस आव नु समजुय क्याह पज़ि करुन। अकरम खानन ह्योत बुथिस ऑरख व्वथुरावुन। बॅड्य साहबन वोनूस, “चै हज़ छुय अथ कामि मंज़ स्यठाह ज़ेनुन। पुंचुह र्वपुयि क्वसु हज़ कथ गॅयि? यिम कुसु ह्यथ नु हज़ गछि नु मे निश युन। हरगाह युन आसि, काँसि बॅड्य संज़ शकायथ ह्यथ गछि युन। ति करख नु ज़ांह।”

अकरम खानस वोथ दिगनि ऑरख। डार सॉबस आयि नु चलनस वथ। दूधय द्रायि दुह्य लद गगर ही न्यबर। अकरम खान चोल स्योदुय गरु। सु रुद नु अँज्यकिस काँसि बुथ द्युन लायखुय।

नबु लाल ओस अँदुर्य ख्वश। तस ऑस्य ब्वकृ फवलान। सु ओस व्वन्य कमुसस मंज कुनुय ज़ोन। बँड्य साहबन कोर चपरॉसिस आलव तु करुनोवुन दरवाज़ु बेयि बंद। चपरॉस्य द्राव न्यबर। नबु लालस आव नु कैह समज। सु ओस व्वन्य बँडिस साहबस कटु चेशमव वुछान। यीतिस कालस कँड बँड्य साहबन दराज़ु मंजु लूर तु वोथ कुरसी प्यठ थोद। वुछान वुछान त्रॉव्य तँम्य नबु लालस फीतिन्य कँरिथ। तस खचु लहा। बँड्य साहबन दोपुनस, “जुमाह जुमाह गँयी ऑठ दूह नोकरी करान, चु छुहमु वुन्यकि प्यठय डिमांडु करान। सु ति म्यॉनिस दफ्तरस मंज। अकरम खानस छा वर्दीयि सपलाई करनि किनु चोन चंदु बरुन।” यि वँनिथ कँड बँड्य साहबस तस अख दुदरु चपाथ। नबु लालन ह्योत टूंगि वदुन। अमि पतु हेच तँम्य साहबस माँफी। बाक्य मुलॉज़िम ऑस्य दरवाज़ु चुरनि मँज्य सोरुय वुछान।

नबु लालु येलि पनुनिस मेज़स प्यठ वापस वोत, तस आसु अँछ व्वज़ुजि। बाक्य मुलॉज़िम आयि तस निश हमदर्दी हावनु बापथ मगर तँम्य कँर नु तिमन सुत्य कथुय। बुथ थोवुन ब्वन कुन तु ड्यकस द्युतुन अथु। बाक्य मुलॉज़िम गँयि वापस पनुनि पनुनि जायि प्यठ।

गंटु जोराह गँछिथ आव अकरम खान वापस तु वोत स्योदुय नबु लालस निश। सप्रू सॉब आस सुत्य। नबु लालन तुल कलु थोद। खान सॉबन वोनुस, “नबु लाल, मे हज़ दिज़ि माँफी।” अमि पतु कजि खान सॉबन चंदु मंजु पुंचुह वर्पयि तु त्राव्यन नबु लालस ब्रोंठु कनि। नबु लालन त्रॉव सप्रू सॉबस कुन वारु नज़र। सप्रू सॉबन होवुनस इशारु ज़ि रठ, कैह छुनु परवाय। नबु लालन गँज़ुरावि वर्पयि तु कोरुन तिमन ताह। अकरम खानस कुन कँरुन नज़राह तु त्रोवुन हल्कु असुन। तमि पतु तुजन वर्पयि तु त्राव्यन खान सॉबस चंदस मंज वापस। दोपुनस, “व्वन्य हज़ ह्यमय बराबर पंचाह वर्पयि, अदु दिमय आर्डर।” अकरम खानस गव हेरिम शाह ह्योर कुन तु बँनिम शाह ब्वन कुन। सप्रू सॉब चोल वापस पनुनि जायि प्यठ। तस आव नु समजुय ज़ि यि क्याह छु सपदान।

यि सूचिथ ज़ि बँडिस साहबस निश बेयि गछनुक छुनु कांह फॉयुदय, अकरम खानन कजि चंदु मंजु पंचाह वर्पयि तु दिचनु नबु लालस। तँम्य पिलुनोवुस आर्डर। सप्रू सॉब ओस दूरि प्यठ वुछान। तस आव नु समजुय ज़ि कँम्य कोर ठीख तु कँम्य कोर गलथ।



तालेह

गर् वॉतिथ ति आव नु बख्शी सॉबस करार। फीर्य फीर्य ओस तस आलम दीन यिवान अँछन तल। गेनि दार होखुमुत बुथ, चिपु अँछ, कलस कमय मस, ओड सफेद ओड कृहुन तु ह्विछिमचु नरि जंगु। आलम दीन ओस बोजान बराबर, मगर अँछन ओसुस गाश कम। कथ करनुक अंदाजु त्युथ ज़न तु प्रथ कांह कथ ज़ानुवन ओस।

आलम दीन ओस हयतु हिसाबु शेठि डोलमुत, मगर लूख ऑस्य वनान सु छु द्वयित्रह वुहुर। यि कथ बीठ नु ग्वडु ग्वडु बख्शी सॉबस ति, मगर येलि तस यि कथ तारिक सॉबस निशि सरु गँयि, सु प्यव असमान ?

आलम दीन येलि कथ ओस करान, तस ओस प्यवान पांचि पांचि मिनटि पतु थख द्युन। अज़ येलि तस अँछव किन्य पँज्य पॉठ्य ओश वोथ, बख्शी सॉबस गव नु बरदाशुय। दोपुनस, “आलम दीन! बु करु पनुनि तरफु प्रथ कांह कूशिश चु नोकरी लागुनस। बस मे दि कैह वख चु। मे हरगाह चानि खॉतरु ह्योर ताम ति पेयि गछुन, बु गछु।” अमि पतु वँर बख्शी सॉबन तस अथस थफ तु द्रास न्यबर ताम सुत्य। नेरान नेरान येलि आलम दीनन तस कुन बेयि आरु हति बुथि वुछ, बख्शी सॉबस गव ज़न जिगुरस चाक।

आलम दीन ओस अज़ ब्रॉठ ज़ु र्यथ तारिक सॉबन बख्शी सॉबस निश ओनमुत। तारिक सॉब ओस अथ अलाकस मंज़ बी.डी.ओ. तु बख्शी सॉबस सुत्य ओसुस दोस्तानु। तारिक सॉबस ओस अलाकस मंज़ स्यठाह काल गोमुत नोकरी करान तु लूख ऑस्य तस व्वन्य अमी अलाकुक बाशंदु मानान। नोकरी हुंदिस सिलसिलस मंज़ ओस तस लूकन सुत्य सेदि स्योद रॉबितु, अवु किन्य ऑस तस तिमन सुत्य ज़ॉती ज़ान पहचान। तँम्य ऑस बख्शी सॉबस आलम दीनुन्य सॉरुय दँलील बोज़नॉवमुच।

दपान आलम दीन ओस वँहरि बहि, येलि सु स्कूलुक्यन बेयि च्वन यारन सुत्य लाल पुल किन्य पॉकिस्तान च़ोलमुत ओस। अमि कथि हुंद पय लगिहे नु काँसि अगर नु मँजीदु यि कथ पनुन्यन गरिक्यन वनिहे। मँजीदु ओस आलम दीनस ब्याख यार तु प्रोगरामु मुताँबिक ओस तस ति यिमन सुती पॉकिस्तान च़लुन, मगर तफ खसनु किन्य ह्योक नु सु अमि दूह गरि नीरिथ कैह। शामस च़ेर ताम येलि नु आलम दीन तु तसुंघ यार स्कूलु प्यठु वापस आयि, तिहुंघ गरिक्य वॉत्य तिमन छांडान छांडान मँजीदुन गर्। अति ननेयख हँकीकथ। आलम दीनुन मोल, युस ज़ंमीनदॉरी ओस करान, प्यव यि कथ बूज़िथुय मरुनस। माजि बिचारि गँयि लारनि तु स्व च़ायि बिस्तरस। अमि अलाक मंज़ु ऑस्य अमि ब्रॉठ ति वारियाह लँडकु विज़ि विज़ि पॉकिस्तान च़लिमुत्य, मगर वापस ओस नु आमुत कांह। आ, मंज़ु मंज़ु ऑस तिहुंज़ शेछ खबर वातान, दपान कैह ऑस्य जान ख्यवान चवान तु कैह यि दँप्यिज़ ति बेछान। यिम बेछान ऑस्य तिम ति ऑस्य नु गरिक्यन हुंदि बीमु किन्य वापस ह्यकान यिथ। दपान ज़ु च़ोर बचु ऑस्य अकि लटि च़ूरि च़ूरि वापस तरान येलि मिलट्री वाल्यन तिमन प्यठ नज़र पेयि। पतु लँज नु पताह कैह ज़ि तिम च़ँल्या वापस किनु दँरियावु बुज़्य गँयि।

अँकिस बेयिस निशि कथ वँडिथ लँज आलम दीनुनिस मॉलिस पताह ज़ि पॉकिस्तान गछुनुच स्कीम ऑस असली तल रँशीदन बनॉवमुच। रँशीदुन मामतुर बोय ओस ज़ु वँरी ब्रॉठ

मुज़फ़राबाद च़ोलमुत तु तँमी ऑस रँशीदस ति अँकिस बेयिस अथि शेछ सूज़िथ कल कँडमुच़। अखतुय ओसुनस वतु हावुक्य सुंद ति नेब द्युतमुत। यि वतु हावुक ओस बेयि अकि गामुक हँबीबु डार, युस विज़ि विज़ि च़ूर वति किन्य मुज़फ़राबाद ओस गछ़ान। दपान हँबीबु डार ओस ओरुक माल योर तु योरुक माल ओर करान तु जान पाँसु हन कमावान।

रँशीदन येलि पनुन्यन यारन पाँकिस्तान गछ़नुच कथ बोज़नाँव, तिमव मंज़ु गँयि स्यठाह तस सुत्य यिनस तयार। रँशीदन कँर हँबीबु डारस सुत्य कथ तु चलनुक ताँरीख कोरुन मुकरँर। यूत यूत यि दूह नँज़दीख गव यिवान, अख अख यार गव लोब ह्यवान। म्वखसर बचेयि कालु शाम ताम शे मगर द्रायि ऑखरस पांच़य।

आलम दीन तु बाक़ुयन शुर्यन हुंघव गर वाल्यव च़ोट ख्वनवटु ख्वड, मगर शुर्यन हुंज़ लँजिख नु पताह कँह। पनुन्य किन्य वॉत्य तिम लाल पुल ताम पय पताह कडान कडान, मगर हॉसिल नदारद। जंगल आसनु किन्य आसु सरहदु अपोर तरनुचि वतु बिसियार। योदुवय जायि जायि मिलट्री वॉत्य गारुथस ऑस्य मगर तमि पतु ति ऑस्य चलन वॉत्य चलान।



आलम दीनु संदि पाँकिस्तान चलनु पतु वुहि वुहुर्य लँज पताह जि सु छु जेमि अँकिस जेलस मंज़ बंद। यि कथ वँन्य तमी जेलु मंज़ु रिहा गॉमुत्य अँक्य नफरन, यस सँलीम खान नाव ओस। सँलीम खान ओस आलम दीनुनि गामु नखय बेयि अकि गामुक रोज़न वोल। येलि आलम दीनुनि माजि यि कथ बूज़, स्व गँयि नेचिविस बुथ वुछनु खॉतरु देवानु। आलम दीनुन मोल ओस नु व्वन्य जिंदु कँह। सु ओस ऑठ वँरी ब्रॉट गुज़र्योमुत।

आलम दीन क्याज़ि ओस जेमिकिस जेलस मंज़ बंद तु सु किथुवँन्य वोत पाँकिस्तानु प्यठ तोर, ति ऑस नु काँसि पताह। ग्वडु ग्वडु ज़ोन लूकव मसाँवी। तिमव कँर नु अथ मामुलस मंज़ बेयि पय पताह करनुच कूशिश कँह। मगर येलि तारिक साँबन यि कथ बूज़, सु गव संजीदु। तँम्य बुलाँव गामु जिठ्यन हुंज़ अख मीटिंग। सँलीम खान, येम्य ग्वडु आलम दीनुन्य शेछ ऑस वँन्यमुच़, आव बुलावनु। सँलीम खानन वोन जि तँम्य वुछ पानु सु कुद्य तु तँस्य निशि लोगुस पताह जि सु छु आलम दीन। आलम दीन क्याज़ि ओस जेलस मंज़ तु कति प्यठ ओस आमुत, तथ मुतलिक ऑस नु सँलीम खानस ति कँह पय पताह। आलम दीनन ओस नु तछ व्यछुनाँविथ कँह वोनमुत। सिर्फ़ ओसुनस दोपुमुत, हरगाह मोकु यियी, म्याँनिस मॉलिस माजि कँर्यज़ि शेछ। मगर सँलीम खानन युस हुलियु आलम दीनुन वोन, सु ओस नु असली आलम दीनुनिस हुलियस सुत्य वाठ ख्यवान। मसलन तसुंदि वननु मुताँबिक ओस आलम दीन स्यठाह वाँसि, येलि ज़न असली आलम दीन वँहरि त्रुहि दूयत्रुहि गोछ आसुन।

तारिक साँबन कोर पनुन रसूख इस्तेमाल। सु वोत गामुक्य कँह नफर ह्यथ जोम तु अति समख्यव पनुनिस अँकिस दोस्तस, यस परवेज़ अहमद नाव ओस। परवेज़ अहमद ओस पुलसस मंज़ नोकरी करान। सु गव पानु तिमन सुत्य तु वातुनाँविन तथ जायि येति आलम दीन बंद ओस। अति करुनोव तँम्य यिमन आलम दीनस समखुनुक इन्तिज़ाम।

दपान तारिक साँब तु बाक़ुय नफर येलि आलम दीनस समखुनि तसुंज़ि कूठरि मंज़ वॉत्य, तिमन आव नु साफ बोज़नय कँह। अँदरु ऑस अनि गटु। अख नफर ओस कूनस मंज़ बिहिथ,

कलु क्वठचन मंज त्रॉविथ। बॅशीरु मॅलिक, युस तारिक सॉबस सुत्य ओस आमुत, गव ब्रॉठ कुन तु दिचुन तस ज़ीर। अँम्य नफरन तुल कलु थोद तु त्रॉवुन ग्वडु बॅशीर मॅलिकस तु पतु बाकुय सारिनय प्यठ नज़र। बॅशीर मॅलिकन वुछ तस बुथ वारु तु द्युतुन फॉसलु। दोपुन यि छुनु आलम दीन। कूद्य वोन तस, “बु छुस आलम दीनुय। चु कुस छुख?” बॅशीर मॅलिकन वोनस, “बु छुस बॅशीर मॅलिक। चु हरगाह आलम दीनुय छुख, वन मे छुखु परज़नावान?” कूद्य वोनस, “कति परज़नावथ। वुह वॅरी गॅयि मे त्वहि निशि दूर गॉमति। चु मा छुख मही दीन मॅलिकुन नेचुव।” बॅशीर मॅलिकस आयि कथ बराबर। दोपुनस, “आ, सुय छुस। यिम ज़ानुहँखु?” बॅशीर मॅलिकन होवुनस बेयि दून नफरन कुन। कूद्य हेक्य नु तिम पछॉनिथ कैह। दोपुनस, चुय वन। बॅशीर मॅलिकन वॅनिनस तिहँद्य नाव तु तस प्यव ह्यस। दोपुनस, “यूसुफ छु मे हमसायि तु मॅजीद ओसुम स्कूलुक च़ाटु बोज, यस असि सुत्य पॉकिस्तान च़लुन ओस, मगर च़ोल नु कैह।” बस, अमि पतु वॅर्य तिमव सारिवुय पानुवँन्य नालुमँत्य, म्वनि तु मीठ्य। बॅशीर मॅलिकन करुनोव तारिक सॉबुन तारुफ आलम दीनस सुत्य तु दोपुनस ज़ि तसुंज़ी मेहरबॉनी सुत्य वॉत्य तिम तस निशि।

आलम दीनन पुछ तिमन ग्वडु पनुनि गर्युक हाल। तिमव वोनुहँस, “मुहम्मद दीन सपुद अज़ ब्रॉठ ऑठ वॅरी रहमते हक। मॉज छय ज़िंदय, बस च़ेय प्रारान। चु वुछिथ मेलि तस बिचारि नँव ज़िंदगी।” आलम दीनन ह्योत मॉल्य सुंदि मरनुच शेछ बूज़िथ वदुन। मगर ओश कति ओसुस ज़ि दिगनि वसिहेस। बॅशीर मॅलिकुनिस ज़ोर करुनस प्यठ बोज़नोव आलम दीनन ति सोरुय यि तस प्यठ यिमन वुहन वॅरियन गुज़र्योमुत ओस।



वुह वॅरी ब्रॉठ येलि आलम दीन तु तसुंद्य यार गरि प्यठ च़ॅल्य, हँबीबु डारन, युस तिमन वतु हावुक ओस, वातुनॉव्य तिम मुज़फ़राबाद। अति वॅरिन तिम अँकिस कॉशिरिस हवालु यस चायि दुकान ओस। दुकान वॉलिस ओस नाव मकबूल खान। सु ओस मुज़फ़राबादकुय रोज़न वोल। दूहस दून दूहन यड बॅरिथ बताह ख्यॉविथ लॉग्य तँम्य आलम दीन तु तसुंद्य यार कामि। बानु छलुनस तु साफ सफॉयी करुनस। ग्वडु ग्वडु गव तिमन यि करुन सख बरतबाह, मगर वारु वारु लोगुख दिल। अथ अलाकस मंज ऑस्य वॅशीरि प्यठ च़ॅलिथ आमुत्य शुर्य आम तोर यी करान। वारु वारु गॅयि आलम दीनस तु तसुंद्यन सॉथियन बाकुयन कॉशिर्यन सुत्य बरादँरी। रॅशीदस म्यूल नु पनुन मामतुर बोय कैह। हँबीबु डारन कोर पताह तु नन्योस ज़ि सु छु मुज़फ़राबाद त्रॉविथ कराची गोमुत। यि बूज़िथ गव रॅशीदु स्यठाह मोयूस। तस ओस नु व्वन्य मुज़फ़राबादस मंज दिलुय लगान।

र्यथ ड्वड र्यथ गॅछिथ च़ोल रॅशीदु ति। आलम दीनस तु बाकुयन यारन लँज नु पतहुय ज़ि सु कोत गव। सॉरिसुय अलाकस छॉड दिथ ति लोग नु तसुंद कैह पताह। आलम दीनन सूच ज़ि सु ति आसि करॉची च़ोलमुत।

आलम दीन रूद अथ चायि दुकानस प्यठ लगबग दून वॅरियन। रॅशीदुनि च़लनु पतु गव तस ति शोख कराची गछुनुक मगर वथ हॉवुनस नु काँसि। ज़ु वॅरी गॅछिथ वॅर तँम्य अँकिस खँरीदारस सुत्य कथ यस सुत्य सु बडु अँज्य मँज्य ओस गोमुत। खँरीदारस ओस नाव जमाल

खान। जमाल खान ओस ट्रक चलावान तु अक्सर लोहूर गछान। सु ति ओस मुजप्फराबादुकुय काँशुर। तँम्य द्युत आलम दीनस दिलासु जि करॉची नु कैह, अलबतु ह्यकथ बु लोहूर वातुनॉविथ। आलम दीनन ज़ोन यि ति गँनीमथ।

अकि दूह सँबील कॅरिथ न्युव जमाल खानन आलम दीन पानस सुत्य पनुनि ट्रेकि मंज़ लोहूर। बाकुय यार त्रॉविन चायि वॉलिस निशी। जमाल खानन पुछ आलम दीनस, “लोहूर वॉलिथ क्याह करख चु? चे छुयि कांह पनुन तति?” आलम दीनन वोनस, “कांह नतु कांह मेलि पनुन। सानि गामुक्य छि वारियाह नफर योर आमृत्य। मे छु बूजमुत जि तिम छि सॉरी जान कारुबार करान। कांह नतु कांह रटी पानस सुत्य।” “मगर चे क्या मजबूरी ऑसुय गरि चॅलिथ यिनुच? चु क्या ओसुख तति करान?” पृछुस जमाल खानन। “बु ओसुस स्कूल परान। मे ओस सख शोख पाँकिस्तान वुछनुक तु येती रोज़नुक। रॅशीदस ति ओस मामतरुय बाँय वोनमुत जि पाँकिस्तान छु पॅज्य पाँठ्य जनथ। येतिक्य लूख छि काँशिर्यन सख माय बरान तु अथु रोट करान। यि बूजिथ ऑस मे ति सख कल द्रामुच।” जमाल खानन वोनस, “गोबराह, गरु गव गरय। गरु छुनु कुनि बनान। चे वुछुथ ना येति किथु पाँठ्य छि काँशिर्य मोज़ूर्य करान तु यड बरान।”

आलम दीन गव जमाल खानुन्य कथ बूजिथ सॉचस। कैह काल ओस तस गोमुत गरु पनुन याद यिवान। मोल मॉज, यार दोस, ऑशुनाव रुशनाव मगर पाँकिस्तान वुछनुक तु अति रोज़नुक जनून ओस तस वुनि ति जॉरी। जमाल खानन वोनस, “चु छुख वुनि ल्वकुट। यीतिस कालस येति कांह नोकरी बनी, तीतिस कालस रोज़ मेय सुत्य गाडि प्यठ।” आलम दीनस आयि बराबँदी। वैसे ति ओस तँम्य सूचमुत जि मे ति छु ऑखुरस करॉची गछुन, येति कस छु रोज़नुक ?

जमाल खानस सुत्य कॅड्य आलम दीनन चोर वॅरी। जमाल खान ओस तस बाँय सुंघ पाँठ्य रछान। यीतिस कालस हेछ तँम्य गॉड्य ति चलावुन्य। जमाल खानन अँन्य ब्याख गॉड्य तु स्व कॅरुन आलम दीनस हवाल। अमि पतु गव आलम दीन नॅव गॉड्य चलावुनस सुत्य आवुर। जमाल खानन द्युतुनस तनखाह मोकूल। आलम दीनन कोर अलग डेर।

बेयि पांछ वॅरी गॅयि। आलम दीनस गॅयि जान पाँसु हन जमाह। अकि दूह आव तस मोकु ट्रक ह्यथ करॉची गछुनुक। जमाल खान गोस सुत्य। तसुंदि दँस्य गव आलम दीनस कैहन काँशिर्यन सुत्य तारुफ। तिहुंदि जॅरियि कॅर आलम दीनन रॅशीदु छांडनुच कूशिश मगर सु लोगुस नु कुनि अथि। लगेहे ति कति? करॉची ऑस थोडॉयी ल्वकुट जाय कांह? आलम दीनन त्रॉव तसुंज़ ब्रांथुय।

मगर आलम दीनस आयि करॉची पसंद। दोपुन असली पाँकिस्तान गव योहय। तँम्य ह्योत अँती अख कमरु मॅल्य। सु ओस नु व्वन्य यछान गॉड्य चलावुन्य। गॉड्य कॅरुन जमाल खानस हवाल तु करॉची मंज़ुय त्रोवुन अख ल्वकुट म्वकुट किरानु दुकान।

वारु वारु कॅर आलम दीनन स्यठाह तरकी। ल्वकटिस दुकानस बन्यव बोड दुकान। दुकानस खोत बोर्ड ‘आलम किराना स्टोर’। दुकानस मंज़ आयि नोकर चाकर। शेन वॅरियन मंज़ सपुद आलम दीनस जान गुज़ारु। तँम्य ह्योत दुकानस सुती अख ल्वकुट मकानु ति मॅल्य।

आलम दीनुनिस दुकानस ब्रॉठु कनि ओस अख ल्वकुट म्वकुट होटल। अम्युक मॉलिक ओस सरवर खान। सरवर खान ओस असली पुंछुक रोज़न वोल मगर पाँकिस्तान बननु वख्तु ओस सु अयाल ह्यथ कराची आमृत।

सरवर खान ओस रुत इनसान। वाँसि आसिहे योहय पंचाह दुवंजाह ह्यू। आलम दीनस सुत्य आयि तस सख बराबँदी। मंजु मंजु ओस सु आलम दीनस पनुनि अँकिस ऑशुनाव कोरि सुत्य खांदर करनुक मशवुर ति दिवान। मगर आलम दीन ओस नु वुनि तयार। सु ओस यछान अयालुक बार तुलनु ब्रॉट मॉलिस माजि समखुन।

सरवर खान ओस यछान पनुन कारुबार बडावुन। तस ओस शोख बोड होटल बनावुनुक मगर सरमायि ओसुस नु त्यूत कैह। कथ कथ करान वोन तँम्य अकि दूह आलम दीनस, “बु ओसुस सौंचान सौंन्य बरादँरी गँछ रोज़न्य ता-हयात ज़िंद। मे छु शोख पनुन होटल थदि पायि बनावुनुक, मगर गुज़ारु छुम कमय। छुना सलाह, चु रोज़ख मे शँरीक तु द्वश्वय करव रँलिथ मीलिथ कार।” आलम दीनन वोनस, “बु कति हैकु ज़ु ज़ु चीज़ सम्बॉलिथ। चु छुख ना वुछान बु कोताह आवुर छुस।” सरवर खानन ओस ग्वडय सूंचिथ थोवमुत। दोपुनस, “चे छुयि वुम्बरि व्वन्य नून तीलय कुनुन? अगर तरकी करुन्य छि, तैलि छु ज़मानस सुत्य पकुन। ख्वदा तालुहन हय योछ, बेयि दहि वुहुर्य आसि असि इन्टरनेशनल स्टँडार्डस प्यठ होटल। लछि बँदिस आसव ऑगुजन प्यठ हिसाब करान।” आलम दीनस आयि कथ समुज। सरवर खान ओस यछान तसुंद किरानु दुकान कुनिथ होटलस मंजु शँरीक सपदुन।

आलम दीनन कोर सौंच। तस बासेयि सरवर खानुन्य कथ मोकूल। कैह वख्त गँछिथय गव सडकि दु-वँतिस प्यठ ‘होटल सरवर आलम’ खडा। दूशवुन्य शँरीकन यि कैछा जमाह ओस, ति लोग अथ। होटल ओस नु त्यूत बोड कैह मगर अथ अलाकस मंजु ओस यि अमि कृस्मुक कुनुय। वारु वारु गव यि होटल दर्मियानु तबकुक्यन लूकन तु दपतरी मुलॉज़िमन मंजु स्यठाह मँहशूर। दूह पतु दूह गँयि आमदँनी हरान।

आलम दीन ओस अकि दूह बाज़रस मंजु नचान ज़ि तस पेयि अँकिस बुज़र्गस प्यठ नज़र। यि बुज़र्ग ओस तसुंदी अलाकुक। आलम दीनन कोर तस आलव। सु नफर आव ब्रॉह कुन तु आलम दीनन वोनस, “बु हज़ ज़ानथ चु। चु छुख ना कँशीरि रोज़ान सलामाबादु?” बुज़र्गन कोर यकरार तु वोनस, “मगर बु ज़ानथ नु चु कैह। चु कुस छुख।” आलम दीनन वोनस, “बु छुस आलम दीन। बु ओसुस रामपोरु रोज़ान। बु छुस १८ वँरी ब्रॉट गरि प्यठ चँलिथ आमुत।” बुज़र्गन वोनस वापस, “मे छु शख ह्यू गछान। चु मा गोख मुहम्मद दीनुन नेचुव?” आलम दीनन कोर आंकार। बुज़र्गन वोनस, “बु छुस दह पंदाह दूह ब्रॉट योर अँकिस ऑशुनावस निश आमुत। बु ज़ानुहन चोन मोल वारु पॉठ्य। सु ओस स्यठाह जान इनसान। चानि चलनु किन्य वोट तस सख तकलीफ तु गव रहमते हक। मगर मे छु बूजमुत ज़ि चे छय मॉज ति स्यठाह ब्यमार। स्व छि खबर कथ गरि प्रारान, शायद चे बुथ वुछुनस।” आलम दीन गव दिल मलूल।

कैह दूह गँयि। आलम दीन गव गरु गछनु खॉतरु सख बेताब। तँम्य कँर सरवर खानस सुत्य कथ। सरवर खान ओस जान रसूखु वोल तु बड्यन बड्यन सुत्य ऑसुस ज़ान। दोपुनस, बु करुनावय चानि कँशीरि तरनुक इन्तिज़ाम।

दूह दूह गव गछान। आलम दीन ओस माजि हुंद बुथ वुछनु खॉतरु तरसान। कॉशिर्यन ओस नु सँहल सँहल कँशीरि वापस तरनु खॉतरु इजाज़थ मेलान मगर सरवर खानस ओस यकीन ज़ि सोरुय सपदि ठीख।

सरवर खानुन रसूख चल्यव नु कैह। आलम दीनस म्यूलय नु गरु गछनुक इजाज़थ। पॉकिस्तान यिनु पतु ह्योत तँम्य ग्वडनिचि लटि वदुन।

आलम दीनन्य हालथ गॅयि बिगरान। सरवर खानन ह्योक नु तसुंद यि हाल वुछिथ कैह। तॅम्य कॅर ब्याख अख सॅबील। पॉकिस्तानस मंज़ ऑस्य तिथ्य नफर मूजुद यिम पाँसु रॅटिथ सरहदु अपोर ऑस्य वातुनावान। युथुय अख नफर छोंड सरवर खानन। तस ओस नाव वकार खान। तॅम्य मॅग्य ज़ु सास। दोपुनस, “मुज़प्फराबादु वति वापस तरुन छु अज़ कल खतरनाक। म्याँन्य कॉम गॅयि चु सियालकोट निश हिंदुस्तानुकिस अलाकस अंदर छवपु दम कॅरिथ वातुनावुन। अमि वति छुनु खतरु कैह मगर तोति छुय ह्यस करुन। अपोर तॅरिथ छुसय नु बु ज़िमुवार।” आलम दीन गव आमादु।

सफर ओस स्यठाह ज़्यूठ। वकार खान तु आलम दीन वॉत्य ग्वडु लोहूर तु तमि पतु गुजरानवाला। अति प्यठु खॅत्य तिम अँकिस ट्रुकि तु वॉत्य सियालकोट सरहदस ताम। अति हॉव वकार खानन आलम दीनस स्व वथ, येमि वति तॅरिथ सु जोम अलाकस मंज़ वातिहे। आलम दीन ओस बेताब मगर वकार खानन दोपुस, “अनि गटु हिश गॅछिन, पतु छुनु परवाय कैह।” युथुय शामुचि सथ हिशि बजेयि, वकार खानन वातुनोव सु अथस थफ वॅरिथ सरहदु अपोर।

आलम दीनन त्रोव अपोर वॉतिथुय फ़ख। अति प्यठु लगहन तस सिर्फ़ ज़ु दूह गरु वातुनस। सु रूद ब्रोंह कुन पकान। अँछन तल ओसुस सिर्फ़ पनुन गरु तु माजि हुंद बुथ।

मगर कस्मतन द्युत नु आलम दीनस साथ कैह। तस आव नु समजुय ज़ि कपॉर्य आयि जवान तारु तु कॅरुख तस नरि थफ। जवान ऑस्य नु हिंदोस्तॉन्य फोजुक्य कैह, बॅल्यकि ऑस पॉकिस्तॉन्य रेंजर। तिमव येलि आलम दीन पनुनि चोकि प्यठ वातुनोव, अदु लॅज तस पताह ज़ि सु ओस वुनि ति पॉकिस्तॉन्य अलाकस मंज़ुय। वकार खान ओस गोमुत तस ननि वानु दोखु दिथ।

आलम दीनुन प्लान प्यव पथर। तस फीर ऑरकू छठ बुथिस। पॉकिस्तॉन्य रेंजुरव वातुनोव सु गुजरानवाला वापस तु तति कोरुख मिलट्री इंटेलिजनुसस हवालु। तिमव बनाँव आलम दीनुनि नावु फाइल यथ मंज़ सु हिंदोस्तॉन्य एजेंट आव करार दिनु। काकुदन मंज़ आव लेखनु ज़ि रेंजुरव रोट सु हिंदोस्तॉन्य अलाकू प्यठ पॉकिस्तॉन्य अलाकस मंज़ तरान तरान। तमि पतु यि तस सुत्य सपद्यव, ति छुनु बयान करुन लायखुय। तसुंद नाव, तसुंद कराची हुंद गरु तु तसुंद कारुबार, किहिन्य आव नु पोज़ माननु। यिम पाँसु तॅम्य पानस सुत्य ऑस्य तुल्यमुत्य, तिम नीहॅस अथु मूरिथ।

आलम दीन रूद पॉकिस्तॉन्य इंद्रोगेशन सेंटरन मंज़ बराबर दून वॅरियन। गरा अँकिस जायि तु गरा बेयिस जायि। तस सुत्य सपुद थर्ड डिगरी हुंद ति वरताव। ऑखुरस येलि सु पॉकिस्तॉन्य मिलट्री इंटेलिजनुसन हिंदोस्तानुकिस अलाकस मंज़ ‘पुश बैक’ कोर, सु ओस पूर अडु मोर सपद्योमुत।

मगर आलम दीनुनि खॉतरु ऑस नु जिंदुगी यिचुय कैह। तस ओस बुथि ति तकलीफ वुछुन। जोम अलाकस मंज़ वॉतिथुय पेयि बी.एस.एफ. वाल्यन तस प्यठ नज़र। तिमव वुछ कुस ताम पॉकिस्तॉन्य ‘जोसूस’ हिंदोस्तॉन्य अलाकस मंज़ अचान। तमि पतु सपुद बराबर ती यि आलम दीनस सुत्य पॉकिस्तानस मंज़ सपुदमुत ओस इंद्रोगेशन, मार, थर्ड डिगरी तफतीश, अकि इंद्रोगेशन सेंटरु प्यठु बेयिस इंद्रोगेशन सेंटरस। मारु निशि बचनु खॉतरु कोर व्वन्य आलम दीनन सु सोरुय कबूल यि तस वोनुख। तसुंज हालथ गॅयि दूह पतु दूह खराब गछान यीतिस

कालस तस अँछन ति गाश कम गव। त्रुह पांचत्रुह वुहुर जवान बन्यव वुछान वुछान शेठ वुहुर बुड।



तारिक साँब वोत अँकिस बेयि सुँदि मदतु सुत्य मँनिश्टरस ताम। तस निश कँरुख आलम दीनुन्य साँरुय दौद्य कांगुर बयान। सुती द्युतुख बरुसु जि तिम छि आलम दीनुन्य ज़मनाथ दिनु खौतर तु ज़िमुवौरी तुलनु खौतर तयार। तारिक साँबस प्यव अथ सिलसिलस मंज अँकिस पछस जेमिस मंजुय रोजुन।

बराबर अँकिस वँरियस तु त्रेन र्यतन काँद रोजनु पतु कोरुख आलम दीन रिहा। तस खलाफ केस आव हेरि प्यठ हुकम अनुनौविथ वापस निनु। तमि पतु वातुनोव तारिक साँबन सु गरु पनुन। मगर आलम दीनुन खोट तालेह रुद तस बदस्तूर सुत्य पकान। येमि दूह सु गरु वोत, तमि कालु आँस तसुंज माँज अमानथ दिथ गाँमुच। यस माजि हुँदि खौतर आलम दीन यूताह मुसीबथ तुलिथ आव, तसुंद बुथ वुछनुय ओस नु तस नँसीबस। लूकव वोन जि माँज ति आँस नेचिविस बुथ वुछनु खौतर बेकरार तु मरनु वख्तु ति आसु तस अँछ सडकि कुनुय दरस लगिथ।



बख्शी साँब ओस यिमनुय ग्वतन जि माजि कोरुनस आलव। तसुंज माँज आँस व्वन्य अक्सर ब्यमारुय रोजान तु बख्शी साँब ओस गरु वौतिथ ज़्यादु तर तँस्य निश ब्यहान। माजि हुँद आलव बूजिथुय पेयि बख्शी साँबस आलम दीनुन्य माँज याद। सूंचुन, स्व बिचौर ति आसिहे पनुनिस नेचिविस यिथय पाँठ्य छांडान। बख्शी साँबन व्वथुरोव अँछन हुँद ओश तु वोत माजि निश।

आलम दीन ओस नोकरी यछान करुन्य। तसुंद पाँकिस्तान वापस गछनुक ओस नु व्वन्य सवालुय कांह। बाज़ाँप्यतु इजाज़थ ह्यथ दिथिहे नु तस कांह गछनु तु चूरि छेपि गछनुक ओस नु सवालुय। अँथ्य सिलसिलस मंज आँस तारिक साँबन बख्शी साँबस सुत्य कथ कँरमुच। बख्शी साँबस आँस्य पनुनिस दफतरस मंज कैह नफर नोकरी लागुन्य। आलम दीनन ओस चपरॉस्य पोस्टु खौतर दरखास कोरमुत। बख्शी साँबन ओस तसुंद दरखास ह्योर सूजमुत तिक्याजि अख ओस नु सु खास पोरमुत ल्यूखमुत, बेयि ओस सु स्यठाह कालस जेलस मंज बंद रुदमुत। बख्शी साँबन कँर सख दोड दूप मगर तसुंज मेहनथ ति गँयि बेसूद। आलम दीनुन दरखास आव ना-मंजूर करनु। यि कथ वँन्य तँम्य तारिक साँबस ति।

अँथ्य दोरान कँर आलम दीनन सरवर खानस सुत्य रॉब्यतु करनुच कूशिष। टेलेफोनस प्यठ कँर सरवर खानन चटवुन्य कथुय। ग्वडु दोपुनस सोरुय छु ठीख, चु मु बर परवाय कैह। बेयि लटि दोपुनस, होटुलस गव सख गाटु। त्रेयिमि लटि कोरुनस कथ करनसुय इनकार। आलम दीनुनिस अँकिस ज़ॉन्यकारस ओस पाँकिस्तान गछनुक इजाज़थ म्यूलमुत। आलम दीनन सूज तस अथि सरवर खानस चिठ्य। सु नफर येलि सरवर खानस चिठ्य दिनि गव, तँम्य

दोपुनस बु ज्ञानुनय नु कांह आलम दीन। जॉन्यकारन वोन जि सरवर खानुन होटल ओस श्री स्टार होटल बन्योमुत।

आलम दीन रूद वारियाहस कालस बख्शी साँबस निश यिवान तु नोकरी हुंद पताह करान। बख्शी साँब ओस नु बँहरानुय तस पोज़ वनुनस। दपान ओसुस, कथ बाथ छि चलान तु कैह नतु कैह सपदि। तसलाह गँछिथ त्रोव आलम दीनन तस निश युनुय।

अख र्यथाह आसिहे गोमुत आलम दीनस बख्शी साँबस निश यिनस जि अख मोज़ु सपद्यव। बख्शी साँबस सूज़ बँड्य साहुबन नाद। दोपुनस हरगाह च़ु पानु जिमुवॉरी ह्यख, आलम दीन ह्यकोन नोकरी लॉगिथ। शेन र्यतन आरज़ी पाँठ्य, पतु करोन तुहँजि सुफॉरशि प्यठ मुस्तँकिल। बख्शी साँबन हेच़ जिमुवॉरी।

देयिमि दूह सुबहस तुल बख्शी साँबन तारिक साँब सुत्य तु गँयि आलम दीनुन गरु युथ ज़न तस यि ख्वश खबर बोज़ुनावन। युथुय तिम तसुंद गरु वाँत्य, तति ओस बदलय आलम। गामुक गाम ओस जमाह। साँरी आँस्य हयबुंगु। बख्शी साँबन कोर पताह जि क्या दँलील छि ? येलि तँम्य जवाब बूज़, सु प्यव असमानु। आलम दीन ओस वापस च़ूर वति किन्य पाँकिस्तान च़ोलमुत। यि कथ ननेयि समद मागरेहस निश। समद मागरे ओस आलम दीनस हमसायि। तम्य वोन व्यस्तॉरिथ, “आलम दीन आव राथ शामस च़ीर्य मे निश। दोपुनम, मे कोर फॉसलु पाँकिस्तान वापस च़लनुक। योत आयोस बु माजि हुँदि खॉतरु, स्व रूज़ नु कैह। नोकरी ति बनेयम नु कैह युथ बु जिंदुगी हुँद्य बाक़ुय दूह आरामु सान गुज़ारहॉ। व्वन्य छु म्यानि जिंदुगी हुँद अकोय मक्सद, सु गव कराची गँछिथ सरवर खानस बदलु ह्योन।”

अमि पतु लँज नु कैह पताह जि आलम दीनस क्या गँयोव ?



पँत्युम बाज़

तिमन ओसुख नाव कोरमुत 'शुच'। तिमन मंज़ युस सारिवुय खोतु बोड ओस तस ओस नाव लालजी। सु ओस च्वदाह वुहुर। शेनुवय ऑस्य सॉनिस महलस नँज़दीखुय मनियार मँहलस मंज़ अँकिसुय जायि रोज़ान।

'शुच' ऑस तिमन र्यछ। यि र्यछ ऑस नु तिमन हुट मुटय आमुच थवनु कैह। समु काकन ऑस यि र्यछ तिमन बडु सूचिथ समजिथ तु तिहँदि वँतीरुक संजीदु मुशॉहिदु कँरिथ थँवमुच। समु काख ओस अमी मँहलुक अख रिटायर गोमुत पुलसु अफसर। तसुंद वनुन ओस जि अमि शुचि छि अख अँकिस सुत्य जादु वख्तस लरि लोर रोज़नुक्य तमाम रिकार्ड फुटरॉव्यमुत्य।

हरगाह पोज़ बूज़िव, ऑठ वँरी ब्रॉठ यनु यिम लँडकु नँज़दीखुकिस प्राइमरी स्कूलस मंज़ दॉखुल आयि करनु, तनु वोत तिमन यिकुवटय व्थान ब्यहान। मँहलस मंज़ बाग ओस अख बोड शाह तुलु कुल। अँथ्य तुलु कुलिस तलु कनि ओस तिहुंद माठ। यि माठ ओस तिमव डुविथ शीरिथ साफ सुथरु बनोवमुत तु रूदु शीनु मूसिमु वरॉय ऑस्य तिम सॉरी प्रथ सातु अती ब्यहान। अँती ऑस्य तिम स्कूलुच कॉम ति करान, बहस मुबाहसु ति करान, सॉलस गछुनुक प्रोग्राम बनावान तु कुलिस प्यठ खँसिथ शाह तुल्य ति ख्यवान। शाह तुल्य ख्यनु खॉतरु ऑस तिमव सारिवुय पनुन्य पनुन्य अख अख लँड रँटमुच। अमि कुलिक्यन शाह तुल्यन प्यठ ओस तिहुंदुय योत हक, यि हावनु म्वखु ओस तिमव कुलिस प्यठ श्रापकुचि सुत्य पनुन पनुन नाव लीखिथ थोवमुत। शीन प्यनु वख्तु ऑस्य तिम अख मोट तु द्रोड शीनु मोहन्युव बनावान तु तस ऑस्य अँथ्य कुलिस तल अँकिस खास जायि बेहनावान। तसुंद कलु तु नरि जंगु ति ऑस्य शीनुवुय बनॉविथ तस लागान। लँडुकन मंज़ ओस सारिवुय खोतु ल्वकुट लँडकु राम जी। तसुंज कॉम ऑस अमिस शीनु मोहनिविस चुनि फलि सुत्य कन, अँछ, नस तु ऑस बनावुन। शीनु मोहनिविस ब्रॉठ कनि ऑस यिवान अख प्रॉन्य कांगुर थवनु, येमि सुत्य तस बदलुय ह्यथ ऑस गछान। लँडुकन हुँदि बदलु ओस योहय शीनु मोहन्युव सॉतस ताम तीतिस कालस तथ कुलिस तल रोज़ान, यीतिस कालस सु सॉतु वावु सुत्य व्यगुलान तु म्वकुलान ओस।

लँडुकन हुंज यि कारवॉयी रूज़ तोताम बराबर चलान योताम दिलि हुँद्य अँक्य ऑशुनाव लँडुकन लाल जीयस अख ट्रांसिस्टर रेडियो द्युत अँनिथ। सुती वोननस जि जल्दुय छु इंगलँडस मंज़ हिंदोस्तानस तु इंगलँडस दरमियान किरकटुच पूर सिरीज़ सपदन वाजेन्य, तु तिमन किरकट मैचन हुंज कामेंट्री यियि सैदि स्योद अथ रेडियोहस प्यठ। बस, अमि कथि पतु बदल्यव त्युहुंद तोर तँरीकय।

तिछ कथ ऑस नु कैह जि तिमव क्या ओस नु अमि ब्रॉठ रेडियो वुछमुत या बूज़मुत। पज़र गव यि जि तिमव मंज़ ऑस्य दून लडुकन गरन मंज़ ति रेडियो, मगर रेडियो आसुन न आसुन ऑस तिहुँदि खॉतरु हिशी कथाह। तिहुँद्य मोल मॉज ऑस्य सिर्फ खबरु बोज़नु खॉतरुय योत रेडियो त्रावान, तिक्याजि किरकटस विरकटस सुत्य ऑस नु तिमन कांह दिलचस्पी। यि ट्रांसिस्टर यिनु सुत्य सपदेयि तिहुँदि मनुच मुराद पूर। व्वन्य ह्यकुहन तिम कुनि ति वख्तु पनुनि मरज़ी हुंद प्रोग्राम बिला रोक टोक बूज़िथ।

लाल जियस हुरेयि कॉम। सु लोग व्वन्य किरकट मैचन मुतलिक ज्ञानकॉरी जमाह करनि। अमि खॉतरु पेयि तस अख नॅव कापी अनुन्य, यथ मंज तॅम्य तमाम ज्ञानकॉरी लीखिथ थॅव युथ ज्ञन वख्तु विजि छांडुनस मंज कांह मुशिकल यियि नु। इंडिया-इंगलैंड सिरीज शुरु गछनु ब्रॉतुय थोव तॅम्य बुथि अॅकिस वॅरियस सपदन वाल्यन मैचन हुंद पूर हिसाब किताब लीखिथ। सु ओस व्वन्य विजि विजि माठु प्यठु गॉर हॉजिर रोज्ञान, मगर यि ऑस नु कांह परेशॉनी हुंज कथ। सारिनय ऑस पताह जि सु छु 'कामि' लॅगिथ।

लॅडुकव मंजु ओस नु काँसि ति अमि ब्रॉठ किरकट गिंदुमुत या किरकट मैच वुछमुत। मगर तिमव ओस अथ मुतलिक स्कूलुक्यन बड्यन लॅडुकन निश स्यठाह बूजमुत। लाल जियिन्य ऑशुनाव लॅडुकन ओस तिमन वोनमुत जि यि खेल गिंदुन्य छी तीच सख जि बॅड्य बॅड्य ताकतवर मुल्क मसलन अग्रीका, रूस तु जापान ति छि यि गिंदुनस खोज्ञान। मगर अमि सुत्य पेयि नु लॅडुकन हुंदिस शोकस कांह फर्ख। तिम साँरी रुद्य इंडिया-इंगलैंड सिरीजि हुंद ग्वडन्युक मैच शुरु गछुनस बे-सब्री सान प्रारान।

मैच गव शुरु तु पॅज्य पाँठय आयि अमिच कामेंट्री ट्रांसिस्टर रेडियोहस प्यठ। ग्वडु ग्वडु आयि नु लॅडुकन वारियाह लफज समजुय, मगर पांचि दोही गॅयि तिम अथ बोलि मंजु मॉहिर। मैचस दौरान ऑस्य तिम न्यसुब रातन ताम तुलु कुलिस तलय ब्यहान तु कामेंट्री बोज्ञान। कुनि कुनि सातु ऑसिख गरिक्य छांडान छांडान वातान तु बेजती वॅरिथ गरु वापस निवान तु बतु ख्यावान।

लाल जियस बडेयि जादय पहान जिमुवॉरी। ज्युठ आसनु सबु ओस यि जरूरी जि तस आसि किरकटस मुतलिक पूर ज्ञान। अमि किन्य ओस सु पनुन्यन जिठ्यन तु व्वसतादन दूहय कृसमु कृसमुक्य सवाल पृछान तु तिमन हुंद्य जवाब मंगान। यिमय जवाब ओस सु पनुन्यन साँथियन ताम ति वातुनावान। तिमन प्यठ पनुन रोब त्रावनु खॉतरु ओस सु पनुनि तरफु ति कैह नतु कैह तबसरु करान, येमि सुत्य सु यि फिकरी तरिहे जि तस क्या हेचुन व्वन्य किरकटुच पूर वाक्फियथ सपदन्य। ग्वडन्युकुय मैच खत्म गछुनस ताम गॅयि लॅडुकन स्यठाह ज्ञान, कम अजु कम तिम ऑस्य यी साँचान।

पांचन मैचन हुंज सिरीज खत्म गॅछिथ गॅयि लॅडुकु किरकटस मुतलिक स्यठाह वॉकुफ। तिमन ऑस व्वन्य अमिक्न कॉयिदन हुंज ति वाक्फियथ। कुनि कुनि सातु ऑस्य तिम कामेंट्रेटु सुंदिस तबसरुस प्यठ ति तबसरु करान तु पनुन अलग फॉसलु दिवान। “बस, व्वन्य छि अॅस्य पूर पाँठ्य किरकट गिंदुनस कॉबिल”, यि सूच तिमव। “हरगाह मॅहलुच कांह ति टीम असि सुत्य व्वन्य मैच येछि गिंदुन, अॅस्य छि तयार”, वोन लाल जियन साफ साफ। बाक्यव लॅडुकव कोर चरि पोप।

टीम बनावनु खॉतरु ऑस्य काह बाँज बकार, तिम ऑस्य शेय। मगर अमि सुत्य सपुद नु तिमन कांह मुशिकल। युस कॅड्य तारि वोल प्लाट ओड मील दूर ओस तु युस हाल हालुय तिहुंद्य अॅक्य हमसायन पनुन मकानु बनावनु बापथ मॅल्य ओस ह्योतमुत, ओस ल्वकटुय तु तथ मंजु हेकुहन नु काह बाँज अकी सातु कैह गिंदिथ। बेयि सूच तिमव यि जि हरगाह जरूरथ पेयि, तमाशु वुछन वाल्यव मंजु ति ह्यकोख कैह लॅडुकु फील्डिंग करनु खॉतरु तुलिथ। योताम बैटिंग करनुक सवाल ओस, तमि वख्तु गिंदन तिमव मंजु पाँछ बाँज दूयि दूयि लटि, यि न्युव तिमव फॉसलु वॅरिथ।

अकि दूह रुत साथ वुछिथ कोर लॅडुकव पनुनि टीमुक ऐलान। तिमव करि तुलु लोरि च्वम्बरु जमाह, यिमु ज़न विकटन हुंज कॉम दिहॅन, त्रे बैटिंग तरफु तु अख बालिंग तरफु। बाज़रु ओस नोव बैट मेलान दॅहन र्वपुयन। सु ह्यनस ऑस नु तिमन सूरथ कैह। सारिनय लॅडुकन हुंद चंदु खर्च जमाह कॅरिथ तु ओरु योर छाँड दिथ समेयि तिमन चोर र्वपुयि। लाल जी, युस ज़्युठ आसनु सबु बिला शक कैप्टन बनन वोल ओस, गव गरु तु तति अँनिन च़ोरिथ अख अस्ल पहान वीरि ज़िन्य हॅट। यि ज़िन्य हॅट आयि अँकिस छानस हवालु करनु येम्य अथ जान स्वंदर बैट बनॉविथ द्युत। छानस लॅज पताह ज़ि लॅडुकन निश छुन च़ोरि र्वपुयि अलावु किहिन्य, तँम्य कॅर नु ज़ोर ज़बरदस्ती कैह। पुशनय द्युतुनख अख हचुव बीरु मुफ्त। लॅडुकु गॅयि ख्वश। व्वन्य बास्यव तिमन पॅज्य पॉठ्य ज़ि तिम हेकन कुनि ति टीमस चलेंज कॅरिथ। मगर लाल जियस आव क्याहताम खयाल। तँम्य दोप ज़ि बेयिस चलेंज दिनु ब्रॉठ पज़ि असि दून त्रेन दूहन ग्वडु प्रेक्टिस करुन्य।

बेयि आथवारि वॉत्य तिम सोरुय सामानु ह्यथ 'प्ले ग्राउंड।' मँहलु मंज़ तुलिख ल्वकुट्य शुर्य बाह मरु ति सुत्य, युथ तिम गिंदनु वख्तु च़रि पोप करन। बैटिंग करनु बापथ आयि चीरि त्रावनु। लाल जियस आव बैटिंग करुनस ग्वडन्युक नम्बर। सु गव ख्वश। कुंदनु, यस पोतुस बैटिंग ऑस करुन्य, द्राव बालिंग करनि। कैप्टन आसनु किन्य दित्य लाल जियन कुंदनस कैह रुत्य मशवर् 'फास्ट बाल किथु कॅन्य छि लायिन्य तु सुपिन बाल किथु कॅन्य।' कुंदनन कॅर यि बूज़िथुय कलस ज़ीर, मतलब मै छु सोरुय फिकरी तरान।

लाल जी वोट बैटिंग करनु बापथ क्रीज़स प्यठ। अँद्य पॅख्य कॅरुन तिथु पॉठ्य नज़राह ज़न तु सु कांह बोड बारु बैट्स मैन ओस। ओवरुच ग्वडुनिच बाल रटनु ब्रॉठ कॅर लाल जियन गुज़ारिथ ज़ि तस गछि ग्वडु अख ट्रायल बाल यिन्य लायिनु। सु गव व्वन्य बाल रटनु खॉतरु तयार तु कोरुन कुंदनस इशारु। कुंदनन लॉय फास्ट बाल, मगर तथ लोग लाल जियस ताम वातुनस कैह वख। लाल जियन कोड तथ कुनुय टास मगर बाल वॉच नु बालरु सँज़ि जायि ताम ति बराबर। शुर्यव कोर च़रि पोप।

व्वन्य वोट वख ओवरुच ग्वडुनिच असली बाल लायिनस। कुंदनु आव दूरि प्यठ दोरान दोरान तु लॉयिन बाल। लाल जी द्राव अख कदम ब्रॉठ युथ ज़न येमि लटि ज़्यादु ताकतु सुत्य हिट मारिहे। मगर ति करनु ब्रॉठुय गव सु आउट। तसुंद मँज़िम विकेट ओस ज़ु गज़ दूर प्यथ मेचि लार्योमुत। लाल जियुन बैट रुद हवुहस मंज़ुय। शुर्यव कोर बेयि च़रि पोप। लाल जी ओस मून्य ह्यु खडा। बुथ गोस व्वजुल नार।

अमि पतु ऑस मखनुन्य वॉर्य। सु ओस लाल जियस ज़ु वॅरी ल्वकुट मगर ओस सेहतु जान। कुंदनु ओस पनुनिस अथस मंज़ बाल नचुनावान। चूकि ग्वडुनिच बाल ऑस तँम्य पनुनि हिसाबु फास्ट लॉयिमुच, येमि लटि सूच तँम्य सुपिन बाल लायिन्य। युथुय तँम्य यि सुपिन बाल लॉय, हालांकि सुपिन वुपिन ऑस नु स्व कैह ति, मखनु पोक अख रछाह खोवुर कुन तु कोडुन बालि हवुहस मंज़ कुनुय टास। बाल वॉच अस्मानस ताम तु च़ायि शीशु फुटरॉविथ अँकिस बंगलुकिस हेरिमिस पोरस अंदर। शीशु प्यव दर दर करान वॅसिथ। मखनुनस गव फ्रठ। अख टिनि कलु द्राव दारि किन्य तु दिचुन क्रख। अँछ आसस शरारतु सुत्य नार हिशि गॉमचु। अमि ब्रॉठ ज़ि लॅडुकन तरिहे वारु फिकरी ज़ि क्या सपुद, बंगलु मंज़ु आव दोरान दोरान अख मोहन्युव तु रॅटुन मखनुनस गरदन। अमि पतय आव टिनि कलु बीरु ह्यथ अथस क्यथ। तस ऑस सफेद कॅमीज़

चायि सुत्य बरनु आमच। तँम्य त्रॉव मखनुस कुनी थापुर। मखनु प्यव पथर। टिनि कलु ओस ज़न पागल गोमुत। तँम्य त्रॉव्य मखनुस बिरयानु कॅरिथ। टीमुक लीडर आसनु किन्य प्यव लाल जियस ब्रॉठ कुन युन। तँम्य कॅर टिनि कलस गुज़ॉरिश, मगर तस लॉय मोहनियव दुदरु चपाथ। यि वुछिथ खोत कुंदनस ज़हर। सु आव दोरान दोरान तु रोदुन मोहनियविस अथु। टिनि कलु आव तु लॉयिन कुंदनस लथ। सु आव दूर लायनु। शुर्य ऑस्य दूरि बिहिथ यि सोरुय वुछान तु वदान। सुती ऑस्य तिम टिनि कलस तु तसुंदिस मोहनियविस वोहव ति कडान। टिनि कलन कॅर मखनुस तु लाल जियस थफ तु छुनु तिमन त्रावानुय। दोपुनख ग्वडु दियिव दून शीशु पट्यन, अकि चीनी मेचि हुंदि कपुक्य तु कॅमीज़ छलनुक्य पाँसु, अदु त्रावोवु। यि ओस कुल ऑठ र्वपयि वातान। लॅडुकन ओस नु चंदस किहिन्य तु टिनि कलु ओस नु तिमन त्रावनु खॉतरु तयारुय। वति ओस अख नफर पकान। सु चाव मंज़ु। तँम्य कॅर टिनि कलस गुज़ॉरिश जि कुमथ कर रछाह कम। टिनि कलस आव आर। दोपुनस अछा ज़ु र्वपयि त्रावु। मगर लॅडकु ऑस्य चंदु खॉली। वति पकवुन्य कॅर अख सॅबील। लॅडुकन दोपुन बैट तु बीरु त्रावुन, यिमन हुंद कुल कुमथ लॅडुकन हुंदि वननु मुताबिक चोर र्वपयि ओस। लॅडकु ऑस्य व्वन्य वदुन ह्यवान। टिनि कलस तोर फिकरी जि तिमन छिनु पाँसु कैह। तस आव बेयि हना आर। तँम्य त्रॉव्य तिम अथ शर्तस प्यठ जि पगाह वातुनावन तिम तस निश बाक्य पाँसु।

टिनि कलु द्राव पनुन मोहन्युव ह्यथ वापस। वति पकन वोल ति द्राव। लॅडकु ति द्रायि लॉन बनॉविथ पनुन गरु कुन। लाल जी ओस लॉनि बुथि तु शुर्य लॉनि पतु। सारिनुय ओस कलु ब्वन कुन। लाल जी, मखनु तु कुंदनु ऑस्य वुनि पानस फश फश दिवान तु दग शेहलावान। वापसी प्यठ ओस नु सुत्य तुलुन लायख सामानु कैह। विक्कट आयि प्लाटस मंज़ुय त्रावनु युथ ज़न सनद रोज़ि जि लॅडुकव छु तथ माँदानस मंज़ु ग्युंदमुत। तिमव कोर फॉसलु जि अमि वाकुहच कथ वनन नु तिम मँहलस मंज़ु काँसि ति। शुर्यन ति थोवुख ठाख कॅरिथ।

लॅडुकन हुंद किरकट गिंदनुक खाब रूद खाबुय। दोयिमि दूह ख्यव तिमव सारिवुय कसम जि तिम गिंदन नु किरकट ज़ांह ति। यि सूचिथ जि कामेंद्री बोज़ान बोज़ान मा तंबलि तिमन दिल, तिमव वोल ट्रांसिस्टर रेडियो अँकिस पलुवस तु थोवुख अँकिस बँडिस संदूकस मंज़ु प्रान्यन किताबन तलु कनि चूरि। युतुय योत नु कैह, बुथि अँकिस वॅरियस ताम द्रायी नु लॅडकु तमि बंगलु ब्रूह्य किन्य, अमि म्वखु जि टिनि कलु मा रटि तु मंगि बाक्य पाँसु। हालांकि स्कूल वातनु खॉतरु ओस तिमन बेयि ज़ेछि वति किन्य प्यवान युन।

योताम ज़न तुलु कुलिस तल तिहंजि जायि हुंद सवाल ओस, स्व रूज़ तमि पतु खॉली। लॅडकु ऑस्य खोचान जि यिनु तथ जायि बिहिथ टिनि कलस नज़र पेयि तु रटि। अमि पतु आव वंदु तु शीनु त्रटु पेयि। मगर येमि लटि ओस नु शीनु मोहन्युव कुनी। अँद्य पँख्य ओस सॉरिसुय शिशुर लोगमुत। तुलु कुल्य लंजि आसु ब्वन कुन नैमिथ तु तमिक्क्यव पनु वँथुरव प्यठ ऑस्य पां फेर्य पशपान। शायद आसुहन तिम लॅडुकन हुंदिस व्वजारु गछुनस प्यठ मातम करान तु वदान।



त्रु-लूर

अमि दूह ऑस चंद्रवार मगर माश्टर जी आव नु स्कूल कैह। तोति रूद्य अँस्य मोहतात। शोर वोर कोर नु कैह। काह बजे बाँग्य येलि यि पकु गव जि माश्टर जियस छुनु अज युनुय, अँस्य गँयि ख्वश। अमि पतु लोग असि ज़ोरु ज़ोरु शोर करुन। अड्यव ह्योत पनुनि पनुनि मशिक प्यठ तबलु बजावुन तु अड्यव ह्योत बाँथ ग्यवुन। अँड्य अँस्य थोद वँथ्य वँथ्य क्रकु दिवान तु अँड्य अँस्य ठहा ठहा कँरिथ असान। सोन शोर बूजिथ आव ह्यड माश्टर सॉनिस कमरस मंज तु असि गव दम। तँम्य तुल मँनीटर थोद तु पृछुनस, “कुस कुस ओस शोर करान?” मँनीटरस फूर नु जवाबुय तिक्याजि सु ओस पानु ति माश्टर जियस नक्ल कँरिथ असि परनावनुक ड्रामा करान। ह्यड माश्टरन द्युत असि कान-पकडी हुंद सजा तु असि प्यव माजि हुंद दूद याद। तमि पतु वोन तँम्य सॉनिस मँनीटरस असि सबख परनावुन।

सॉनिस माश्टर जियस ओस नाव नीलु कँठ। सु ओस रोजान हब्बु कँदलु दँरियावु बँठिस प्यठ। तस अँस्य ज़ु अचकन, अख नीलि रंगु तु ब्याख क्रेहनि रंगु। अकि दूह ओस सु लागान न्यूल अचकन त बेयि दूह कृहुन। जंगन ओस लागान सफेद तंग मुरि पॉजामु तु ख्वरन कृहुन्य गुरगॉब्य। कलस ओस लागान हल्कु गवलॉब्य रंगु दसतार।

अँस्य अँस्य पुँच्यमि जमॉच परान। जमॉच मंज अँस्य कुल अरदाह लँडकु। सुबुहस प्रेयर परनु पतु येलि अँस्य पनुनिस कलासस मंज वातान अँस्य, बुथ ओस गछान वदुवुन। अकि अकि टाटस प्यठ लॉनि मंज बिहिथ अँस्य अँस्य प्रारान माश्टर जी सुंदिस यिनस। येलि सु कलासस अचान ओस, अँस्य अँस्य थोद वँथिथ तस आदाब अर्ज करान। सु ओस कलु सुत्य जवाब दिवान, कुरसी प्यठ ब्यहान तु हॉजिरी रजश्टर खोलान। अमि पतु ऑस सॉन्य हॉजिरी सपदान। यसुंद यसुंद रोल नम्बर सु वनिहे, तस ओस आसान थोद वँथिथ जवाब द्युन ‘हॉजिर जिनाब’। माश्टर जी ओस तस वारु बुथिस कुन नजर दिवान तु तमि पतु ब्याख रोल नम्बर वनान।

असि ओस माश्टर जियुन सख हॉबथ। सु ओस परनॉव्य परनॉव्य असि रथ कडान। हरगाह काँसि पास करनि गछुन आसिहे, तस ओस बुथिस कुन वारु वुछिथ गवडु सरु करान जि सु छा पोज वनान किनु अपुज। यस नु पँज्य पॉठ्य पास आसिहे आमुत, तस ओस बुथ्युक रंग लेदरान तु सु ओस दुह्य लद गगुर ह्यु वापस फेरान। हरगाह काँसि लँडुकन स्कूलच कॉम आसिहे नु बराबर कँरमुच, तस ओस सु अकी क्रेकि सुत्य मुथुर व्यसुरावान। इशारु ओसुस हावान तथ त्रु-लोरि कुन य्वसु माश्टर जियन दरवाजस पँत्य किन्य अलूंद ऑस त्रॉवमुच। त्रु-लोरि कुन नजर प्यथुय आसु लँडुकस क्रकु चलान नीरिथ तु सु ओस तस दहि दहि लटि माँफी मंगान तु आयंदु गलती न करनुक वादु करान। हरगाह काँह लँडकु बँडुय पहान गलती ओस करान, माश्टर जी ओस त्रु-लूर तुलिथ तस लँडुकस अथु दारनु खॉतरु वनान। बस, पतु मतु पृछ्यतव, पूर कलासस मंज कुस हंगामु ओस सपदान। लँडुकस अँस्य मार ख्यनु वरॉयी गित्य गछान तु बाक्य लँडकु अँस्य माश्टर जियस तसुंदि बदलु माँफी मंगान।

माश्टर जी ओस असि अकी लटि ख्वश करान। छुटी गछनु ब्रॉटु ओस सु असि पानस निश बेहनावान तु अकि अकि सारिन्य हुंद हाल पृछान। अँकिस ओस मॉल्य सुंज शैछ पृछान तु बेयिस गाव मरनुक वजह। अँकिस निश फीस न बरनुक वजह मोलूम करान तु बेयिस ग्वरबथ आसनु

किन्य पुवर फंड मंजु कैह पाँसु दिनुक वादु करान। अँकिस ओस पृछान जि तस कति छि मॉलिस ड्यूटी, बेयिस निश मोलूम करान जि ब्यमारस क्या ऑस खबर। गरज, माशटर जियस ऑस प्रथ काँसि हुंज फिकिर तु कुनि नतु कुनि तँरीकु ओस सु प्रथ अँकिस अथु रोट करान। काँसि पाँसु रँग्य, काँसि किताबव रँग्य, काँसि वरदी रँग्य तु काँसि स्कूल नीरिथ ति परनावनु रँग्य।

अँस्य क्याजि अँस्य अथ त्रु-लोरि खोचान तु यि त्रु-लूर क्या ऑस ? यि ऑस स्योद सादु वीरि कुलिच अख मूर, यथ बुधि गंडस निशि त्रे लंजि आसु नेरान। मूर ऑस गंडु पथ कुन तकरीबन त्रे फुट तु गंडु ब्रोंह कुन अख फुट। माशटर जियन ओस अथ मूरि दल तुलनोवमुत तु पतु तील दिवुनोवमुत। यिहय चोर फुट जीठ लूर ऑस असि शुर्यन क्युत अजाब।

यि त्रु-लूर आयि सॉनिस कलासस मंजु सथ रंथ ब्रोंठ। माशटर जियन अँन्य यि पानस सुत्य तु थँवुन मेजस प्यठ। असि कुन वोनुन रोबु सान, “यि लूर छिवु वुछान।” असि हिलोव कलु। तँम्य वोन, “यि छनु स्योद सादु लूर कैह। यि छे मे बाह वँरी ब्रोंठ जस्तु खॉज कँरिथ गांदरबल बालु कि तँतालि प्यठु खास कँरिथ वालुनॉवमुच। अथ लोरि छु शर्फ जि यि हेकि नु कांह चूरि निथ। अमि सुत्य हरगाह अपुज वनन वॉलिस दब कडव, सु छु पोज वनान। हरगाह काँसि चूर आसि कँरमुच, यि लूर छि तस कुन वुछिथुय अलुरान तु तस कुन कलु फिरान। अथ लोरि छि सुह ताम खोचान।” सुह सुंज कथ करान करान तुज माशटर जियन लूर अथस क्यथ तु रँटन सीनस सुत्य। दोपुन, “बु ओसुस अकि दूह पहलगाम गोमुत। यि लूर ऑसुम सुत्य। चीर्य राथ क्युत डँज मे वथ तु बु गोस पनुन्यन गरिक्यन निश छ्यनु। बु ओसुस वथुय छांडान जि मे वुछ बुधि सुह पकान। बु खूचुस। मे दोप अज म्वकलेयि म्यानि जिंदुगी हुंज कथुय। युथुय सुहस मे प्यठ नजर पेयि, सु आव मे जेफि। मगर क्वदरतुन कार, मे ऑस लूर अथस क्यथ तु सुहस लँज यि बुथिस सुत्य। बस पतु मतु पृछ्यतव कैह। सुहन दिच लोरि कुन खोचान खोचान नजर तु त्रॉवुन कुनी टुख जंगुलस कुन। बेयि लटि ओसुस बु गाडि मंजु सोपोर गछान। गाडि ओस सख रश। मे त्रॉव अँक्य नव जवानन सीट तु बु ब्यूटुस पथर। येलि कंडक्टर टिकट दिनि आव, मे फेरि ऑरकु छट। मे ओसुख चंदय चोटमुत त बँटवु ओसुहम चूरि न्युमुत। कंडक्टरन कोर मे रोब। दोपुन गाडि मंजु वस ब्वन। मे ऑस यि लूर दारि सुत्य व्वदुनी थँवमुच। युथुय मे वापस वसनु खॉतरु यि लूर तुज, यि चँज मे अथु मंजु नीरिथ तु आयि पथ कुन अँकिस नव जवानस प्यठ लायिनु। नवजवानन हेचॉयि यि दारि किन्य छुनुन्य जि अम्युक लोट फरस्यव तस चंदस मंजु। अँथ्य चंदस मंजु ओस म्योन बँटवु। यि ओस सुय नव जवान येम्य मे सीट ऑस त्रॉवमुच। मे दिच क्रख, म्योन बटवु! नव जवानन द्युत यि बँटवु मे कुन वापस दारिथ तु त्रॉवुन गाडि मंजु व्वठ तु चोल। यिथु पाँठ्य द्युत अमि लोरि मे पनुन बँटवु नोन कँडिथ। बेयि लटि ओस म्यानि कलासुक्य अँक्य बचन गरि अपुज वँनिथ स्कूल यिनस छुटी कँरमुच। दोयिमि दूह येलि सु स्कूल आव तु लोरि निशि वोत, लूर पेयि तस खवरन प्यठ। मे तोर फिकरी जि अँम्य छु क्याहताम अतुर कोरमुत। येलि मे तस मार दिनु खॉतरु लूर अथस मंजु तुज, तँम्य ह्योत वदुन तु वोनुन सोरुय पोज पोज। बेयि अकि लटि प्यव मे अँकिस बचस खँरिल करनस प्यठ अमि त्रु-लोरि सुत्य अथस प्यठ टास त्रावुन। तस प्यव लोरि हुंद कृहुन आख अथस। अज गँयि तथ कुसस जु वँरी मगर तस छु सु आख तँती।”

यिमु कथु बूजिथ ओस असि फ्रठ गोमुत। अवं किन्य ओस त्रु-लोरि हुंद नाव बूजिथुय असि जुव चलान नीरिथ।

यनु प्यठ माश्टर जियन यि लूर स्कूल अँन्य, तँम्य नियि यि सिर्फ अकि लटि गरु। दोपुन, गरि छु अख बचु सख खँरिल करान तु तस छु अमी लोरि सुत्य मुस्तु वालुन। असि फँट जादय तुर। असि दोप, येलि सु पनुनिस बचस मुस्तु वालि, असि क्या लिहाजु वुछि ?

अज आँस्य अँस्य ख्वश। माश्टर जी आव नु कैह। असि सूच दूहस तुलव अलुगँड्य तु मलुगँड्य। ह्यड माश्टर सुँदि यिनु सुत्य गव रछाह थ्वथ मगर सु नीरिथुय लोग असि बेयि नचुन तु ग्यवुन मगर ल्वति ल्वति। असि दोप युहय अख दूह छु गँनीमथ। त्रु-लूर थँव असि अँकिस जायि चूरि युथ नु तथ असि प्यठ नज़र पेयि। ह्यड माश्टर आव नु बेयि असि वुछनि कैह। तस ओस शायद यकीन जि असि आसि मँनीटर ठीख पाँठ्य परनावान।

रिसु वख्तु प्यव निकस खयाल। तँम्य वोन मे कनस तल, “छुना सलाह, त्रु-लूरय करव गाँब।” मे गव यि बूजिथुय हेह। दोपुमस, “माश्टर जियस येलि पताह लगि, सु च़टि ना मुस्तु ?” तँम्य दोप, “पताह कति लग्यस ? बाक्यन शुर्यन वनव नु किहिन्य। लूर आसि गाँब, तथ किथु पाँठ्य पृछि ?” मे बीठ यि कथ। मगर खतरु ओस स्यठाह। अँस्य आँस्य वुनि कथुय करान जि राजस गव शख। दोपुन तोह्य छिवु चूरि चूरि क्याहताम च्वय करान, मे ति वँनिव नतु वनोवु बु माश्टर जियस।” असि दोप यि तुलि पँज्य पाँठ्य फसाद, अँमिस ति पजि लोत पाँठ्य वनुन। येलि तँम्य साँन्य कथ बूज, सु गव ख्वश। दोपुन, “सँबील छि जान, लूर करु बुय गाँब।” असि मोनुस। दोपुस मगर त्रॉव्यजि दँरियावस अंदर। तँम्य कोर आंकार।

राजु वोथ ब्वन तु असि त्रॉवुस लूर दारि किन्य। तँम्य रँट ब्वन कनि, ओरु योर दिचुन नज़र तु द्राव। ओड गंटाह गँछिथ आव वापस। असि पृछुस, “कतिनस त्रॉवुथ ?” तँम्य वोन इशारव सुती जि दँरियावस त्रॉवुम से-मंज़स। बाक्यन बचन लँज नु कैह पताह तिक्याजि तिम आँस्य साँरी अख अँकिस सुत्य गिंदनस तु मस कडुनस सुत्य आवुर्य। च़ीर्य येलि अँस्य गरु कुन वापस द्रायि, राजु ओस क्याहताम साँचान। असि पृछुस जि दँलील क्या छि ? मगर तँम्य वोन नु कैह। असि सूच जि सु आसि लूर दँरियावस मंज़ त्रावान त्रावान खूचमुत।

बोमवारि दूह आव माश्टर जी तु चाव कलासस अंदर। हाँज़री कँरिथ येलि तँम्य प्रुछ जि कालु क्या क्या कोरुवु, असि गँयि छवपु। तस तोर फिकरी जि कालु छु असि सारिवुय असमान नखस प्यठ तुलमुत। ह्यड माश्टरन ति आँस तस कालुच दँलील वँन्यमुच। माश्टर जियन प्रुछ अँकिस अँकिस बचस जि कालु कँम्य कँम्य कँर खँर्यगी, मगर काँसि वोनुस नु कैह। अमि पतु छाँड तँम्य पनुन्य त्रु-लूर।

मगर त्रु-लूर आयि नु अथी। दरवाज़स पँत्य किन्य, मेज़स तल, टाटस तलु कनि, अलमार्यन मंज़, साँरिसुय दिचु तँम्य छाँड, मगर त्रु-लूर आँस नु कुनी। मँनीटरस ति आँस नु कैह पताह। माश्टर जियस खोत सख शरारथ। तस तोर फिकरी जि कँम्य ताम बचन छि चाल कँरमुच। तँम्य ह्योत अकि अकि पृछुन। बु ओसुस निकस कुन वुछान तु निकु ओस राजस कुन वुछान। थँकिथ हाँरिथ वोन माश्टर जियन असि, “त्वहि मंज़य छि कँम्य ताम लूर नीमुच चूरि मगर तोह्य छिवु नु वनान। हरगाह पगाह सुबहस लूर वापस पनुनि जायि आँस नु, अकि अकि च़टोवु मुस्तु तु त्रावोवु ख्वरन तल।” यि वँनिथ कँर माश्टर जियन असि कुन तिथु पाँठ्य नज़र ज़न तु ज़िंदय च़ापिहे। निकन, राजन तु मे कोर फाँसलु जि हरगाह दालु ति वालन, पँज कथ कडव नु नँनी।

बदवारि दूह येलि माश्टर जी स्कूल आव, तस ओस त्रु-लूर सुत्य। अँस्य अँस्य हॉरान। मे त्राँव राजस कुन नज़र। सु ओस हयबुंग। मे ओस नु यिवान समजुय ज़ि लूर हय राजन दँरियावस अंदर त्राँव, मास्टर जियन कति अँन्य यि बेयि। अम्युक मतलब ओस साफ ज़ि यि अँस नु पँज्य पाँठ्य स्योद सादु लूर कैह, बँल्यकि अँस करामाँती लूर। अँस्य अँस्य माश्टर जी सुंदिस बुथिस कुन वुछान। तसुंद बुथ वुछिथ ओस बासान ज़न तु तस स्यठाह दूख छु वोतमुत। तँम्य थँव त्रु-लूर मेज़स प्यठ तु वोनून असि कुन, “राथ गव अतुर। मे वोनूमवु त्वहि बद रद, मगर खता ओस मे पानस। मे छि दर-अस्ल यि लूर बटवारि दूह पानस सुती गरु नीमुच, मगर मे ओस नु अम्युक ज्वनुय। मे पेयि अज़ सुबहस अथ प्यठ नेरान नेरान नज़र। यि आसिहे मे योरु निथ आंगुनस मंज़ त्राँवमुच। बु छुसवु त्वहि ज्युठ अँसिथुय माँफी मंगान।” तँम्य युथुय असि माँफी मँज, असि ह्योत सारिवुय वदुन। माश्टर जी आव असि निश तु अकि अकि कोरुन असि नालुमोत। खास कँरिथ तुलिन तिम बचु ख्वनि मंज़ यिमन प्यठ तस ज़्यादु शख ओस तु यिमन तँम्य जादु ब्यवॉरी अँस कँरमुच।

रिसु वक्तु वँथ्य अँस्य साँरी गिंदनि मगर राजु वोथ नु असि सुत्य कैह। सु रूद कलासस मंज़ुय। दोपुन मे छि काँम करुन्य। रिसु पतु येलि अँस्य तु माश्टर जी वापस कलासस मंज़ खँत्य, असि वुछ राजु अँकिस कूनस मंज़ बिहिथ टुंगि वदान। तँम्य ओस कलु त्रोवमुत ज़ंगन मंज़। माश्टर जियस तोर फिकरी ज़ि तस छु म्यॉन्य माँफी हेन्य दिलस सनेमुच तु अवय छु सु सारिनुय चूरि वदुन ह्यवान। माश्टर जियन तुल सु पनुनि ख्वनि मंज़ तु बेहनोवुन पानस सुत्य। माश्टर जियन वोनूस, “व्वन्य क्याजि छुख चु वदान? त्रु-लोरि हुंज़ कथुय म्वकलेयि। मे अँस गलती गाँमुच तु अवय हेचुम माँफी। माँफी ह्योन गव जान। अमि सुत्य छि पाफ वसान नखु।” यि वँनिथ द्युत माश्टर जियन तस बुथिस फश। मगर माश्टर जियुन अथु बुथिस लँगिथुय ह्योत राजन बेयि टुंगि वदुन तु कँरिन माश्टर जी सुंदिस अथस म्वन्य तु मीठ्य। तमि पतु दोपुनस, “माश्टर जी! मे दियिव माँफी?” माश्टर जियन वोनूस, “सु क्याजि? चे क्या कोरुथ?” अँस्य पँक्य ब्रॉह कुन तसुंज़ कथ बोज़नु खॉतरु। राजन वोन, “लूर अँसवु नु त्वहि गरु नीमुच कैह, स्व अँस मे चूरि नीमुच।” साँरी बचु गँयि हॉरान। माश्टर जी ति गव हॉरान। दोपुनस, “यि क्या छुख चु वनान? मे हय स्व लूर पनुनि गरि लँब!” राजन वोनूस, “माश्टर जी! लूर गाँब करनुच चाल अँस असि त्रेयव कँरमुच। बु वोतुस यि लूर दँरियावस मंज़ त्रावनु खॉतरु यारबल, मगर तति आम नु व्यस्तार कैह। तति अँस्य कैह नफर श्रान करान। अमि पतु द्रास बु यि कँदलु प्यठु दॉरिथ दिनु खॉतरु ज़ि मे वुछ दूरि पनुन मोल यिवान। तस वुछिथ तुज मे दव मगर बुथि अँस नु चलनस वथुय। बुथि ओस कन्युव देवार। मे दोप यिनु मे मोल वाति ब्रॉह कुन तु रट्यम, मे दिच लूर अमि देवारु पेट्य आंगुनस मंज़ दॉरिथ। शायद आसिहे सु तुहुंदुय आंगुन।” असि कुन वुछिथ वोन राजन, “मे वोनूमवु नु त्वहि ति कैह तिक्याजि बु खूचुस ज़ि तोह्य मॉरिव मे।”

माश्टर जी गव हॉरान ज़ि लोरि हुंदि खोफु सुत्य कोताह मुशिकल कदम छु राजन तुलमुत। तस बासेयि यि लूर व्वन्य स्वरुफ। मगर सुती गव ख्वश। दोपुन राजन वोन पोज़ तु पज़रस छुनु कांह ज़वाल। तँम्य दिच तस माँफी।

माश्टर जियन बेहनाँव्य शुर्य पथर तु दोपुनख, “यि लूर छनु करामाँती लूर कैह। यि अँस मे पनुनिस आंगुनस मंज़ अँकिस वीरि कुलिस चँटमुच। मे यि कँछा त्वहि अथ मुतलिक वोनमुत ओस, सु ओस सोरुय अपुज़। बु ओसुस नु ज़ांह यछान त्वहि प्यठ अथु तुलुन तिक्याजि तोह्य

छिवु मे पनुन्यन शुर्यन हुंघ पॉठ्य। म्योन मुदा ओस सिर्फ त्वहि लूर हॉविथ बीम थवुन युथ ज़न तोह्य हमेशु जान कामि कॅरिहिव, पॅरिहिव तु लीखिहिव।” माश्टर जियस लोग यि वनान वनान होट। अमि वख्तु कोर असि माश्टर जी सख ख्वश।

स्कूल बंद गछनु वख्तु तुज माश्टर जियन त्रु-लूर सुत्य। दोपुन, यथ चीज़स बचु खोचन, सु चीज़ थवुन छु गलथ। तॅम्य दोप, यि त्रु-लूर छुनु बु व्वन्य ज़ॉलिथुय युथ ज़न अम्युक नाम निशानुय मिटि। मगर तॅम्य ह्योक नु ति कॅरिथ कॅह। निकन त्रोव पनुन पान त्रु-लोरि प्यठ तु दोपुनस, “माश्टर जी! यि त्रु-लूर थॅविव येत्य। येलि त्वहि तबदीली गछि, यि रोज़ि असि निश तुहुंद निशानु।” माश्टर जियन त्रॉव लूर अँती।

माश्टर जी द्राव गर कुन। मे पेयि नज़र। सु ओस पकान पकान रुमालि सुत्य पनुन ओश व्वथुरावान।

